




Dittenberg







LIBRARY OF THE  
UNIVERSITY OF ILLINOIS  
**VIRO AMPLISSIMO**

# **REINHOLDO KLOTZIO**

**FAUTORI SUO DILECTISSIMO**

**DIEM FAUSTUM**

**QUO**

**ANTE HOS XXV ANNOS**

**MUNERA ACADEMICA RITE AUSPICATUS EST**

**PIE GRATULATUR**

**GUSTAVUS ADOLPHUS GEBAUER.**

**A. D. VIII. Cal. Jun. MDCCCLVI.**

---

**DE POETARUM GRAECORUM BUCOLICORUM INPRIMIS THEOCRITI CARMINIBUS  
IN ECLOGIS A VERGILIO ADUMBRATIS.**

**PARTICULA PRIMA.**

---

**LIPSIÆ.**

**PROSTAT APUD C. L. FRITZSCHIIUM.**

RECEIVED  
JUL 21 1964  
U.S. AIR FORCE  
MISSISSIPPI DIV

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

RECEIVED JUL 21 1964

Egregie Te, **REINHOLDE KLOTZI**, non solum de studiis meis, sed de rebus meis paene omnibus usque ad hunc diem meritum esse, ita menti infixum haeret, ut humanitatis Tuae et benignitatis memoriam nulla mihi oblivio ereptura sit. At quo magis omni tempore memor fui beneficiorum, quae magna et larga in me conferre non desisti, eo acrius dolui, quod Tibi animi mei pietatem aliquo modo testificari nondum licuit. Quam ob rem gratissimum mihi accidit, quod ex Tuis ipsius rebus nactus sum ejus rei occasionem commodam et idoneam. Nam Dei Optimi Maximi beneficio hodie idem dies Tibi rediit, quo ante hos viginti quinque annos praeceptoris academici dignitatem rite auspicatus es. Ac re-



putanti mihi, quam libenter Tu linguae Graecae studia cum literis Latinis jungeres, placuit Tecum communicare primum specimen ejus quaestionis, quam de Vergilianis Theocriti ejusque aemulorum imitationibus instituere jamdiu animum induxeram. Quod si quaeris, quae causae me adduxerint, ut hoc negotium in me susceperem, eae plures fuerunt. Licet enim non solum ex comparatione horum poetarum, quorum opera angustioribus finibus circumscripta sunt, accuratius ostendere, quaenam utriusque linguae indoles fuerit, sed videtur etiam haec quaestio propterea utilissima esse, quod, modo recte in ea verseris, et interpretationi et rei criticae saepissime inde succurri potest. Quod quamquam jam pridem ab hominibus doctis animadversum est, tamen illi magna ex parte satis habuerunt, singulis innisi imitationibus statim ad corrigendos et Theocriti et Vergilii locos accedere: collegerunt eas imitationes Ursinus in libro, cujus titulus est „Virgilius collatione scriptorum Graecorum illustratus“, et Stephanus in observationibus in Virgilianas et Nasonianas Theocriti imitationes. Mihi vero, quum primum me ad hanc quaestionem accinxi, duo adhuc valde desiderari visa sunt, dili-

gentior universarum eclogarum Vergilli consideratio et curiosior comparatio singularum imitationum. Quum autem omnes locos, de quibus olim disputaturus eram, mihi jam collegissem, in lucem emissa est praestans Ahrensii poetarum Graecorum bucolicorum editio. Quam etsi, quatenus fieri poterat per temporis angustias, etiam in hac prima particula semper consului, tamen vel propterea ea minus quam cupiebam uti licuit, quod vir doctissimus, si ea exceperis, quae disputavit in Philologo et ad Bionis epitaphium Adonidis, neque de universis carminibus neque de singulis locis adhuc sententiam suam uberius exposuit. Contra ea literarum subsidia, quae ante hanc editionem prodierant, quantum necesse esse putabam, diligenter contuli. Horum magnam partem mihi ministravit insignis liberalitas viri gratissima praedicatione decorandi, Hermannii Fritzschi, qui, ut puerum me pater ejus dilectissimus, Dorotheus Fritzschi, literarum antiquarum non solum elementis sed etiam amore imbuat, ita ipse juveni mihi studiorum meorum fautor exstitit et in hoc opusculo conscribendo tanta me humanitate adjuvit, ut facere non possem, quin ei hac opportunitate oblata publice gratias per-

3  
solvam. Praeterea mihi praedicanda est liberalitas viri amplissimi, Ameisii, a quo, quum precibus eum adissem, quae de poetarum Graecorum et de Vergilii carminibus eleganter, ut solet, commentatus est, statim impetravi. Denique silentio praeterire non licet, multa me etiam debere munificentiae praeceptorum carissimorum, Westermanni et Nitzschii, qui idcirco quoque summa mihi pietate amplexandi sunt, quia largissimis doctrinae suae copiis ita me instruxerunt, ut omnino ad hanc quaestionem aggredi conarer.

Habes, vir spectatissime, quae et de consilio, quod secutus sum, et de literarum subsidiis, quibus uti licuit, praefanda fuerunt. Quod reliquum est, peto abs Te omni qua par est observantia, ut eodem animi candore, quo semper errantem me in viam reduxisti, has literarum primitias accipere et, si quae peccavi — vereor autem, ne plurima sint —, ea corrigere et emendare velis. Vale.

Scr. Lipsiae a. d. VIII. Cal. Jun. MDCCCLVI.

## Caput primum.

### De Theocriti et Vergilii pastoribus in universum.

Eo tempore, quo poetae Romani ex poetarum Alexandrinorum operibus et rerum copiam et orationis elegantiam haurire consueverant\*), Vergilius exstitit, qui Theocriti, optimi omnium poetarum Alexandrinorum, lectione, imbutus, ejus carmina bucolica imitatione exprimere constitueret. Quamquam enim jam ante Vergilium Catullus vel Calvus, quae est sententia Ungerii de C. Valgii Rufi Poematis p. 287 sqq.\*\*), Pharmaceutrias Theocriti civitate Romana donavit, tamen, hoc carmen quum non bucolici sit, sed mimici generis, Maro recte de se praedicare potuit ecl. VI. 1 sq.

Prima Syracosio dignata est ludere versu  
Nostra neque erubuit silvas habitare Thalia.

Nihilo minus vehementer erraverit, si quis poetam existimaverit in eclogis solum Theocritum ante oculos habuisse. Nam sicuti praeter poetas Romanos interdum Homeri, Hesiodi, Apollonii Rhodii, Nicandri, Arati, Callimachi sententiis pariter ac verbis in hoc opere usus est, ita a ceteris poetis Graecorum bucolicis quae ei commoda videbantur multis locis deprompsit. Idque jam Servium judicasse, etsi p. 96 ed. Lion. de sola *Theocriti imitatione*

---

\*) De fructibus, qui ex operibus poetarum Alexandrinorum in Romanorum poemata redundaverunt, cf. Bernhardy. H. L. R. p. 253. 257 sqq. ed. III.

\*\*) Nititur haec sententia Plin. H. N. XXVIII. 4, ubi Ungerus pro Catulli scribendum putavit Calvi.

loquitur\*), produnt ea, quae ad ecl. VI. 1 adnotavit: „*Syracoso*; quia Theocritum *praecipue* sequitur, quamvis multi alii bucolica scripserint.“ Hinc quum facile colligas, nomina eorum, quorum carmina sub Theocriti nomine circumferuntur, Servii ideoque etiam Vergilii aetate adhuc cognita fuisse\*\*), tum Vergilio praecipuam Servius Theocriti imitationem tribuens reliquorum haudquaquam excludit. Quae quum ita sint, ego in exploranda Theocriti reliquorumque poetarum bucolicorum imitatione ita versabor, ut, ubi non necesse fuerit, fines eorum carminum, quae aperte Theocriti sunt, non egrediar, ubi res ipsa flagitaverit, etiam reliqua carmina in quaestionem disceptationemque adsciscam. Quod quibus de causis quoque loco fecerim, absoluta tota imitationis disputatione intellectum iri spero et confido; in capite, quod jam tractaturus sum, fines carminum rusticorum fere nusquam egrediendum putavi.

Ut cognoscatur, quatenus sit Vergilii universa imitatio Theocriti, primum mentem nostram ad pastorum, qui ab utroque inducuntur, vitam et mores advertamus oportet. Ac Theocriti quidem pastores, ut ordiamur ab rebus externis, pro *vestimento pellibus* usos esse, constat ex id. III. 25. V. 14 sq. VII. 15 sq. Eisdem etiam in pellibus recubare solitos esse et hujus strati mollitudinem magnopere jactasse, intelligitur ex id. V. 8 sqq. 50 sq. 56 sq. IX. 9 sqq. Talia imitando exprimere in eclogis noluit Vergilius, quamquam in Aeneide heroes non dubitavit ferarum pellibus indutos inducere\*\*\*). Contra Theocritum

---

\*) Quae ibi dicit, haec sunt: „Intentio poetae haec est, ut imitetur Theocritum Syracusanum, meliorem Moscho et ceteris, qui Bucolica scripserunt.“

\*\*) His addenda sunt quae idem Servius dixit p. 96 ed. Lion.: „Sane sciendum, VII eclogas esse meras rusticas, quas Theocritus decem habet.“ Nam ex hoc loco rectissime conclusit Hauptius de carm. buc. Calpurn. et Nemes. p. 7, Servium carmen vicesimum et vicesimum septimum Theocrito non adscripsisse. At prius certe carmen jam Vergilii tempore extitisse, imitationes, apud hunc poetam quae inveniuntur, clare ostendunt.

\*\*\*) Locos qui huc faciunt omnes collegit Lerschius Ant. Verg. p. 77 sqq. ibique etiam causam rei explicavit.

hac in re secutus videtur auctor Moreti v. 22 coll. Theocr. id. VII. 15 sq. Causa, quamobrem poeta Romanus ab auctore discesserit, in eo cernitur, quod et omnino politioris aetatis Augustae et inprimis eorum, quibus scripsit, rationem habebat. De contemptu pellium vestimenti loco usurpatarum cf. Lucr. V. 1418 sqq. ed. Lachm. Quantopere autem Vergilius teretes et superbas Romanorum aures respicere coactus fuerit, et de hoc loco et de multis aliis, de quibus infra commemorabo, Quintiliani verba ostendunt, quae semel hic excitasse satis habeo, Inst. or. X. 1. 55: „Admirabilis in suo genere Theocritus; sed musa illa rustica et pastoralis non forum modo, verum ipsam etiam urbem reformat.“

*Victum* pastorum si spectamus, jure meo tales locos omitto, in quibus uterque ea profert, quae rus ipsum suppeditavit. Memorabiles tantummodo sunt Theocriti id. IX versus 19 sq. et id. VII versus 65, qui loci inter se quodammodo oppositi sunt, quia in priore humillimi, in posteriore splendidissimi victus mentio fit. Quae enim illic laudantur χορὰ, de iis mea quidem sententia recte dixit Greverus in libello: *Zur Würdigung, Erklärung und Kritik der Idyllen Theokrit's* p. 79, cui addas Ameisium Adn. in Theocr. p. 61, sed vocabulum φαγοί, quod ibidem legitur, non de lignis fagineis, sed auctore scholiasta de glandibus, qua subjecta significatione legitur Plat. reipubl. II. 372. C. Dio. Chr. I. 218. 13. R., accipiendum esse sententiarum series evincere videtur. Nam *primum* lignorum mentio jam inest in verbis ἐν περὶ δὲ δρυὶν, *deinde* versuum concinnitas, de qua infra dicam, flagitat ut sicuti in priore ita etiam in posteriore membro edulium quoddam genus proferatur; *denique* a Theocriti oratione simpliciore alienum puto, e verbo ζῆσι ad subjectum φαγοί vocabulum „concremantur“ cogitatione repetere. Praeterea valde me offendit participium χερμαίνοντος. Nam etsi minime ignoro, genitivum absolutum participii saepe a Graecis omisso subjecto usurpatum esse, cujus usus exempla larga manu dat Matth. §. 563. p. 1308 sq. ed. III, tamen hic participium, quum aliter explicari non queat nisi sic „quum hiems

saevit“, ferri non potest propterea, quod ipsius hiemis imago eo loco ante oculos nostros ponitur. Inde etiam factum puto, ut Weisius ed. ster. p. 178. hiemis descriptionem vss. 7 sqq., aestatis vss. 15 sqq. contineri putaret. Omnibus his causis commotus locum corruptum esse existimo, conjiceremque poetam posuisse φαγοί μοι φρύγονται pro φαγοί χειμαίνοντος, nisi id a literarum ductibus paulo longius abesse intelligerem. Res utut est, glandes certe Theocriti loco vindicandas existimo, easque apud plures antiquitatis gentes pro cibo usurpatas esse, ostendit et Platonis locus supra laudatus et Strabo p. 155, ubi de Lusitanis, et p. 734, ubi de Persis loquitur. Cf. etiam Curtium Peloponnes. I. p. 157 sq. Verum redeam ad rem propositam. Vergilius his repudiatis in eo tamen Theocritum aemulatus est, quod Romanorum mores spectans moreti meminit ecl. II. 10 sq., ad quem locum vide quae Vossius adnotavit. Contra id. VII, 65 sqq., ubi commemoratur vinum praestantissimum, poeta Romanus ante oculos habuit ecl. V. 69 sqq. Cur ibi vina Ariusia protulerit, et Vossius explicavit in adnotatione et Klausen. de Aen. et Penat. I. p. 533.

Sequitur, ut dicam de *familiaritate*, quae pastoribus utriusque poetae cum *gregibus suis* intercedit. Silentio transmitto baculi usum, quem quamquam Romanorum quoque pastoribustribuendum esse, apparet ex Colum. VII. 3. extr., tamen in ejus descriptione Vergilius ecl. V. 88 sqq., id quod jam Ursinus putavit, Theocr. id. XVII. 31 spectasse videtur. Magis illud memoratu dignum est, quod apud Theocritum saepe legimus animalia nominibus aut vere propriis aut a corporis quibusdam notis ductis appellata fuisse (cf. id. I. 149. III. 5. IV. 45 sq. V. 102. VIII. 27. 65. 85\*) et locum similem ep. I. 5, ubi verba ὁ μᾶλος, quae e cod. Pal. receperunt etiam Ameisius et Ahrensius, auctore Bachio Quaest. El. Spec. p. 25 *ducem pecoris* significare videntur), id apud Vergilium non reperiri. Excipienda tamen canum nomina sunt, quae graeca forma

\*) Omissi versum 51, quoniam de hoc recte statuuisse puto Ahrensium, in cuius editione est v. 50.

leguntur ecl. III. 18. VIII. 107. Jam quum appareat e Colum. VII. 12. 6, canes apud Romanos aut graecis nominibus, qualia attulit σκύλαξ, λάκων, σπουδή, ἀλκή, βώμη, aut latinis, cujus generis commemoravit *ferox*, *lupa*, *cerva*, *tigris*, vocatos esse, videmus hac in re Maronem morem patrium secutum esse. Hunc eum in appellando pecore destituisse, non sine verisimilitudine quadam ex ecl. IX. 23—25, quos versus ad verbum fere e Theocr. id. III. 3—5 transtulit, mihi conjicere videor. Atque hoc quidem quum ad terrae proprietatem pertineat, illud ingenii et indolis utriusque poetae est. Invenitur enim apud Graecum poetam, egregium naturae observatorem, pastorum id cum pecoribus commercium, ut non solum ea summo se amore amplecti profiteantur (id. IV. 39, quem tamen locum Ahrens. pro corrupto habet) aut amice adhortentur (id. I. 149 sq. V. 1 sq. 145 sq. VIII. 49 sqq. 65 sqq.) aut gaudia sua cum iis communicare studeant (id. V. 141 sq. coll. id. VI. 44), verum etiam nonnunquam iracundia incensi illa gravius admo- neant, verbera adeo minitantes (id. IV. 46 sqq. V. 147 sqq.), ubique vèro aptissimo sermonis genere utantur. Vergilius contra, quamquam et ipse pastores eos inducit, qui greges suos aut amice alloquantur et adhortentur (ecl. I. 75 sqq. X. 77) aut commoneant acerbius (III. 94 sq. VII. 44), tamen in familiaritatis caritatisque sensu depingendo felicius quam in objurgando Theocritum secutus est.

Quod si quaerimus, quid praeterea utriusque poetae pastores temporis fallendi causa in pascuis et saltibus egerint, aut *vasa rustica texebant* aut *inter se colloquebantur* aut *carmina canebant*. Quod primo loco posui, reperitur apud Theocritum id. XI. 73 et, quamquam ibi non agitur de pastore, I. 52 sq., atque hinc adumbravit Vergilius ecl. II. 71 sq. X. 71. De altero et tertio ita disputabo, ut quae res ipsa flagitet ut juxta ponantur conjunctim persequi et illustrare coner. Nimirum, ut jam supra de pecoris commercio significavi, Theocritus tam egregie et omnino popularium et praecipue hominum humiliorum mentes ac cogitationes perspexit et tanta cum fide veritateque in carminibus suis expressit, ut communi omnium doctorum consensu summa laude dignus judicandus sit. Jam satis



constat vel ex iis locis, quos congesserunt Jahn. ad Cic. Brut. §. 46. Notter in Prolegomenis, quae praemissa sunt translationi Germanicae poet. Graec. buc. ab ipso et Moerikio institutae p. 1 n., Hauler. in dissertatione de Theocriti vita et carminibus p. 49., Siculos inprimis dicaces fuisse. Hinc explicationem habent mutua illa dicta et cavillationes, quae per idyllia IV. V. X. multis locis dispersae leguntur\*). His salibus interdum res obscoenas admixtas fuisse, non mirabitur, qui cum Fritzschio de poet. Graec. buc. p. 17 meminerit, id ex eadem fide repetendum esse, qua poeta ab omni parte rerum naturam depingere studuit. Eundem hominum plebejorum usum ac consuetudinem redolent etiam sententiae et proverbia, quae ut in reliquis ita in bucolicis carminibus a Theocrito frequenter usurpata esse, collectio docet a Fritzschio l. l. instituta, quamquam non negligendum est, quod statuit Bernhardyus H. L. Gr. I. p. 27 sq. 65. ed. II, proverbiorum copia Dorienses reliquis Graecis praestitisse. Denique huc refero superstitionum varia genera (cf. praeter idyllii II totam partem priorem ejusd. id. v. 90 sq. III. 28 sqq. 31. 37. V. 121. 123. VI. 39. VII. 126. IX. 30. XII. 23. XIV. 22), imagines maximam partem e vita rustica depromptas (I. 1 sq. 7. 146. II. 38. 55. 78. 88. 106. 110. III. 12. IV. 39. V. 29. 92. 94. 136. VI. 15. 38. VII. 41. 47. 97. VIII. 37. 41. 45. 57. 78. 82. 87. IX. 7. 12. 20. 31. 33. X. 18. 28. XI. 19. 39. XII. 3. XVIII. 26. 29) et rerum naturae descriptiones. In his poeta semper eorum memor, quos loquentes fecit, admirabili quadam cum arte ita versatus est, ut eas praeteriens tantum dataque occasione pro-

\*) Scena id. IV et V non Sicilia, sed Italia est. Verum tamen a vero aberravit Haulerus, qui l. l. et p. 66 etiam idyllii decimi res in Italia agi existimavit. Reputare enim debuit, id. I. VI. IX. non a patria, sed a pastoribus qui producuntur aut celebrantur suavem ac teneram naturam acceperisse et nec Daphnidis nec Menalcae nomina usitata consuetudine de mythicis personis usurpata decimi idyllii messoribus tribui potuisse. Non attendit praeterea, Milonem non solum in quarto, sed etiam in octavo carmine, quod totum Siciliae est (v. 47 et 51), commemorari. Fatendum est igitur cum scholiasta, ignorari, ubi scena idyllii decimi quaerenda sit. De idyllii tertii scena, quod idem p. 49 Siciliae adscripsit, infra commemorabo.

ferret, modo cum mutuis pastorum laudibus (I. 1 sqq. 7 sqq.), modo cum dissensionibus de canendi sede coortis (I. 12 sq. 21 sqq. V. 31 sqq. 45 sqq.), modo cum qualicunque pastorum condicione (VIII. 55 sq. XI. 44 sqq.) connectens. Vide quae de ea re verissime jam observavit Finkenst. Arethus. p. 48. Ab his locis ii discrepant, qui id. VII. 7 sqq. 131 sqq. leguntur, qui, quum totum idyllium ipsius poetae sensa exprimat, talem cautionem non habebant. Sed ex his ipsis versibus, quemadmodum ex id. XXII. 37 sqq., aliam eamque eximiam Theocriti facultatem, quae conspicitur in depingenda naturae pacata et pacante contemplantium animos tranquillitate elucere, scite disputavit Notter. l. l. p. 15 sqq., quocum conferas de toto hoc scriptionis genere a veteribus minus exculto Al. Humboldt. Kosm. II. p. 12. Caesar. Ephem. lit. ant. 1849. Nr. 61—64. Grever. l. l. p. 71 sqq. Bernhardy. H. L. Gr. I. p. 139. sq. ed. II. Becker. Charikl. I. p. 93 sq. ed. C. F. Hermann.

His dictis a Theocrito ad Vergilium progrediar. Ac Romanorum quoque agricolas ad risum quendam solutum proclives fuisse, perspicitur ex festorum agrestium hilaritate et licentia, de qua cf. Verg. Georg. II. 385 sq. Bernhardy. hist. lit. Rom. I. p. 169 sqq. ed. III. Nec minus eos Graecorum flagitiis illo tempore imbutos fuisse, recte contra Wagnerum disputans affirmavit Ameis. ann. phil. et paed. 1850. 4. p. 373. Quare non a vero aberrasse videbor, si Maronem in dicteriis et notationibus, quae leguntur ecl. III, Theocritum imitando simul morem patrium respexisse contendere. Quod vero a rerum abscoenitate adeo abhorruit Vergilius, ut uno tantum loco (ecl. III. 8 sq.), et reticentiae quidem figura usus, quam Theocritus ne in primo quidem idyllio (v. 105) usurpasset, nisi ibi curandum erat, ut Daphnis, divinus pastor, deam Venerem verecundius notaret, eam immiscere vellet, id casto poetae animo jure aliquis tribuerit. In afferendis sententiis et proverbiiis, quae etiam in rusticorum Romanorum ore fuisse quum per se credibile sit, tum ostendit verbum praeter cetera memorabile, quod servavit Plinius H. N. XVIII. 18. 49. „arator nisi incurvus praevaricatur“, ubique fere Maro simplicitatem Theocriti retinuit. Atque imitatus est eum

ecl. VII. 45 (cf. Theocr. V. 50 sq. XV. 125 et Ameis. ann. phil. et paed. 1845. 45. 2. p. 135). III. 102 (id. IV. 15 sq. coll. ep. VI. 5 sq. id. II. 89 sq.). VII. 43 (id. XII. 2), quamquam in his duobus locis potius similia Graeca proverbialia similibus Romanis reddidisse videtur. Item spectavit Theocritum ecl. VIII. 63 (coll. id. X. 25), ubi tamen rei accommodatius erat, quod a Lucilio, ut auctor est Macrobius, Saturn. VI. 1. 35 ed. Jan., depromptum etiam VII. 23 usurpavit. E Graeco, non ab ipso Vergilio translata sunt duo proverbialia, quae legimus ecl. III. 91, etsi posteriori simile est, quod invenitur id. V. 26 sq. Vergilii propriae sunt eae sententiae, quas habes ecl. II. 65. X. 69. Ex eo vero, quod poeta Romanus idque Theocriti exemplo permotus sententias et proverbialia saepius in eclogas intulit, sequitur *primum* quidem falsam esse Macrobianam sententiam, qui Saturn. V. 16. 6 sq. ed. Jan. existimavit, ut in reliquis operibus ita etiam ecl. VIII. 63. X. 69. Maronem in proferendis sententiis Homerum secutum esse, *deinde vero*, explicationem proverbialem ad interpretandos poetae versus in auxilium vocandam esse. Id recte fecit Ameis. Spic. explic. Verg. p. 5 de ecl. II. 58 sq., et magnopere mirandum est, quod etiam in altera editione Ladewigus longam suam huius loci explicationem retinuit. Recte praeterea Vossius mea quidem sententia ejusdem eclogae v. 70. Servii verba secutus ex proverbio quodam Romanorum rustico intelligendum explicandumque esse statuit. Ex vulgari interpretatione non congruit hic versus cum sequentibus, quandoquidem inepte Corydon se uno sententiarum tenore propter neglectam vitium amputationem incusat et ad vasa rustica texenda excitat. Optime vero, si hunc sensum ei subjectum esse putamus: „Demens es; vinum bibisti e vite semiputata“, antegressa verba illustrat et amplificat. Ceterum hoc quoque versu Theocritum aemulatus videtur, cujus similis proverbialis locutio e vita rustica petita quamvis alio sensu exstat id. X. 14 coll. Ameis. Adn. p. 63. — Superstitiones Vergilius e vita plebeja promptas praeter eas, quae ad rem magicam pertinentes in posteriore parte eclogae VIII leguntur, commemoravit etiam ecl. III. 103. VII. 27 sq. IX. 53 sq. Quae

in ecl. VIII a Theocrito sumpserit quaeque ipse finxerit, in parte operis secunda demonstrare conabor; hic satis erit ea laudasse, quae disputavit Lersch. l. l. p. 192 sqq. de ritibus magicis a Vergilio commemoratis. In reliquo eclogarum opere quae dicuntur, aut ipsius Vergilii sunt (III. 103. VII. 27), aut ita a Theocrito desumpta, ut hunc cum imitaretur, a popularium opinione non deflexerit (IX. 53 sq. coll. Theocr. id. XIV. 22 et Plin. H. N. VIII. 34). — Ad comparationes et imagines e vita agresti petendas quum omnino Theocriti exemplo incitatus sit, tum ejus verba aut imitando expressit aut certe spectavit ecl. II. 18. (id. X. 28 sq. XXIII. 28 sqq.) 63 sqq. (X. 30 sq.) III. 80 sqq. (VIII. 57 sq.), V. 16 sqq. (V. 91 sqq. XII. 3 sqq.) 32 sqq. (VIII. 78 sq. XVIII. 29 sqq.) 45 sqq. (I. 7 sq. VIII. 77.) 82 sqq. (I. 7 sq.) VII. 37 sq. (XI. 20 sq.) 51 sq. (IX. 12 sq. 20 sq.) 65 sqq. (XVIII. 29 sq.) X. 39. (X. 28.), 73 sq. (VII. 96 sq.). Ipsius ingenio tribuendae sunt, quas legimus ecl. I. 23 sqq. III. 82 sq. VII. 41 sqq. 61 sqq. X. 29 sq. 54. Ecl. VIII. 85 sqq. ante oculos habuit Varii versus, quos citavit Macrob. Saturn. VI. 2. 20 ed. Jan. In omnibus his imaginibus exceptis ecl. VII vss. 41 sqq. et 51 sq., quas data opera paulo asperiores effinxit, praeter alias virtutes infra commemorandas insignem suavitatem ac dulcedinem cerni, non est quod uberius ostendam, quum jam animadversum sit a Finkensteinio Arethus. p. 50. — E locorum denique descriptionibus, in quibus et ipsis auctorem suum aemulatus est, potissimum eae veritatis laudem habent, quae ad poetae praedium pertinent, I. 47. sqq. VII. 11. IX. 7. Quod in reliquis reprehendit Ladewigus praef. p. VIII, eas minus expressas ac distinctas dicens, cadere credo in ecl. III. 57 sqq. X. 42 sqq., quamquam ne hi quidem versus suis laudibus carent, non cadit in ecl. V. 5 sqq. IX. 40 sqq., qui cum ad Theocriti id. I. 21 sqq. XI. 42 sqq. facti sint, easdem cum illis virtutes communes habent. Vide etiam Greverum l. l. p. 72 sq. et ad utrumque locum quae adnotavit Vossius.

Ab iis rebus, quas non minus in confabulationibus quam in cantilenis pastorum vitae veritatem redolere dixi, jam propius ad ipsa cantica descendam. Quo in genere

illud ante omnia tenendum puto, nisi tam certis signis expressa fuisset apud Siculos vita pastoritia, ne Theocritum quidem sibi poetae bucolici laudem comparaturum fuisse. Illi enim homines, quorum vitam moresque poeta descripsit, non solum dulci syringis flatu et peculiari cantico-  
rum genere celebratissima Daphnidis, Menalcae, Comatae nomina celebraverunt et certaminis pretio proposito inter se contenderunt, verum etiam praecepta rustica versibus incluserunt. Quid, quod eo etiam pastores Siculi honorem ac dignitatem adepti sunt, quod in Dianae templis consuetis hymnis deae laudes extollere solebant? Quae quum ita essent, Theocrito id tantum agendum erat, ut ea, quae rudiora minusque exulta apud populum jam exstabant, expoliret et ad artis praecepta redigeret. Et eum revera aptissimo suae Musae fundamento poesi populari innisum esse, primum creberrimus ostendit caesurae bucolicae usus, quam una cum vocabulo, quod in pede primo positum erat, in pede quinto repetendo ex cantilenis popularibus a poeta in carmina bucolica illatam esse, primus scite observavit Fritzscheius l. l. p. 20, cujus sententiam approbavit G. Hermannus de art. poes. Graec. buc. p. 3. Adde quae nuper de eadem re dixit Hauser. l. l. p. 48 sq., qui tamen, id quod negligendum neutiquam erat, de vocabuli repetitione non commemoravit. Ipsum huiusmodi cantilenae versum nos habere id. IV. 32 ἄ τε Κρότωνα καλὰ πόλις ἄ τε Ζάκυνθος, quamquam aliter visum esse Ahrensio e conjecturis, quas ibi protulit, apparere videtur, mihi quidem persuasissimum est\*), et hoc quoque verisimile puto, quod statuit Welcker Op. I. p. 200, id. I. v. 106 et V. 45 verba τῆναι (τοῦται) δρύες, ὧδε κύπειρος ex carmine populari desumpta esse. Item poeta a popularibus didicit hoc artificium, ex quo quaedam certe carmina addito modo modo omisso ephymnio (cf. Fritsch. p. 20 sqq.) in strophas divideret, ut semper in carminibus amoebaeis, non raro in aliis, pastores sententiis ac quantum fieri posset etiam

---

\*) Haec sententia si vera est, sequitur, ut in illis carminibus popularibus non solum tetrameter, sed etiam trimeter dactylicus subsequente dimetro usurpatus sit.

verbis iisdem loquentes faceret (cf. Fritzs. p. 19 et 23. Notter. p. 4 sqq.), ut id. X. 42 sqq. Milonem sententias ad vitam rusticam pertinentes pronuntiantem induceret. Nam quae duo posuit Hauler. l. l. p. 52 sq., illam cantilenam aut ex Sosithei *Αιτυέσου* aut e cantilenae theristarum popularis, de qua laudavit Athen. XIV. p. 619. a, imitatione compositam esse, ex his solum posterius accipiendum esse existimo. Denique in eo etiam carmina pastoralia ante oculos habuisse videtur, quod Comatam apibus nutritum cecinit id. VII. 78 sqq., de quo loco cf. praeter scholiastam Ameis. Adn. p. 47, quod Menalcam una cum Daphnide produxit id. VIII et IX (cf. arg. id. VIII et schol. ad v. 55), quodque in idyllio primo Daphnidem infelicis amoris causa se in fluctus praecipitasse narravit. De hujus idyllii sensu quum infra accuratius disputaturus sim, hic satis habeo tantum attulisse, non recte mihi egisse videri Ameisium Ann. phil. et paed. 1845. 45. 2. p. 107 sq., idcirco, quia poeta id. XIII. XV. 124. XXII. 27 a vulgari narratione deflexisset, verisimile esse putantem, id etiam in hoc argumento pastortio factum esse.

In his omnibus igitur quum Theocritum cantus popularis modum ac rationem accurate expressisse ostenderim, jam quaerendum est, quo modo Vergilius in ea re cum auctore suo certare potuerit. Leve est, quod ne rusticos quidem Romanos ingenio poetico destitutos fuisse, pulchrae imagines produnt, quibus auctore Plinio (H. N. XVI. 39) ver ab iis significabatur, gravius, quod iidem per festorum agrestium solemnitatem alternis inter se certabant (cf. Bernhardy. H. L. R. l. l. et Lersch. Ant. Verg. p. 257, qui hunc morem a Tuscis repetit) et versibus res rusticas tradebant, ut apparet ex antiquo exemplo, servato a Festo s. v. Flaminius Camillus „Hiberno pulvere, verno luto grandia farra, Camille, metes“, quod inter cantilenas populares retulit Zellius *Ferienschriften* II. p. 207. At caruisse eos prorsus fere fabulis popularibus, nota res est observavitque etiam Bernhardyus l. l. p. 172 n. 116. Quibus ita comparatis, certe quaedam poeta habuit, quae ex ipsa vita depromeret. Sed id neque potuisse neque debuisse illius esse consilium, statim intelligetur, ubi in memoriam

tibi revocaveris locum Quintiliani supra laudatum neque hoc neglexeris, quod a multis passim commemoratum est, uberrime expositum a Spohnio in Prolegomenis, Vergilium potentiorum gratiam his eclogis acquirere studuisse. Quamobrem diligenter omnia vitanda erant, quibus aures eorum qualicunque modo offendere poterat. Quod quanti momenti sit, vel inde elucet, quod id. X. v. 44 sqq., quamvis alias, quae similia apud populares inveniebat, cupide arriperet, imitari noluit. Tanto magis ea notatu digna sunt, in quibus vestigia quaedam quamvis levissima poesis popularis reperiuntur. Unum rei idque manifestum exemplum praebet ecl. VIII. 80. „Limus ut hic *durescit* et haec ut cera *liquescit*“, quem v. factum esse ad similitudinem carminum magicorum praeter ea, quae Vossius in nota protulit, dilucide ostendit versus quidam servatus a Varrone R. R. I. 2. 27. „Terra pestem *teneto*, salus hic *maneto*“. Nec recessit poeta a rusticorum Romanorum usu in carminibus amoebaeis, in quibus, ut silentio praeteream solemne alternorum versuum nomen (ecl. III. 59. V. 14. VII 18 sq.), neque cavillationes, quas habes ecl. III. 90 sq. VII 25 sqq., a rustica Romanorum licentia alienae sunt et duo aenigmata ecl. III. 104 sqq. prolata illaque sive jectio, ut mihi, sive irrisio, ut aliis videtur, quae invenitur III. 76 sqq., populare quiddam continere videntur. Huc etiam referendus videtur liberior et solutior legum amoebaearum usus, in quo sicubi recessit a Theocrito, eum ex parte rusticorum Romanorum carmina spectasse puto. Verbo denique commemoranda est fistulae inflandae scientia. Hanc a Vergilio non affictam pastoribus Romanis esse, sed revera iis fuisse, testantur variae hujus instrumenti appellationes, quas congessit Ladewigus praef. p. XV, quocum cf. quae scripsit Lerschius Ant. p. 256. Quid in ejus descriptione ab auctore suo mutuatus sit, singulis locis demonstrabo; non commemoratum erat a Theocrito, Panem plurium cannarum fistulam invenisse, quod legimus ecl. II. 32 sq., ubi vide quae Vossius dixit, et VIII. 24. Haec fere ea esse videntur, quae e vita ipsa a poeta sumpta sunt; in reliquis enim adeo pastores Romanos sprexit et aspernatus est, ut non solum scenam eclogarum in Graecas

et hephthemimeren, tertia est ea, quam βουκολικὴν appellant; quae quarto pede semper sensum claudente distinguitur ideoque a Graecis sic appellatur, quod bucolici carminis haec lex sit, ut versus ejus ea observatione formetur, ut ante duos ultimos quarto pede terminet aut partem orationis aut sensum, quam legem per omne opus sui carminis Theocritus Syracusanus, exceptis tribus aut quattuor ferme versibus (laudat id. I. v. 28 et 39, sed falsum esse grammaticum, jam Camerarius vidit, cujus verba attulit Gaisford.) custodit. At noster Maro haud ita, quod utrum *scrupulosum an supervacuum duxerit, ipse norit*, quod Graeci sanxerunt, ne pars orationis aut sermo integer ullo verbi discidio interveniente sejungeretur, tamquam

Forte sub arguta consederat

tetrametrus. Sequitur

ilice Daphnis.

Hoc comma dimetrum epicum nuncuparunt. Item

O crudelis Alexi, nihil mea

dehinc

carmina curas.

Unde intelligi datur, bucolicum carmen seu metrum ex tetrametri (conjectura addendum videtur *et dimetri*) copulatione subsistere“. Etsi, inquam, ex his concludas, hunc et ipsum de quarto dactylo cogitasse, tamen aliud suadent quae attulit p. 87 sq. „Nonnunquam autem evenit, ut in eodem versu plures incisiones, i. e. penthemimeren et hephthemimeren et eam quae quarta caesura partem orationis terminat (quam bucolicon Graeci dicunt) reperiamus, ut:

Arma virumque cano, Trojae qui primus ab oris,

Nam *jae qui* pes in versu quartus eam divisionem explicat, quam bucolicon vocari dictum est, subque pedum percussione sensus impletur. Nam bucolici metri haec lex est, quam per omne opus sui carminis Theocritus Syracusanus observat, exceptis paucis versibus, de quibus in processu dicemus.“ Non poterat grammaticus Aeneidis versum excitare, nisi putasset, salvo metro bucolico quartum pedem etiam spondeum esse posse.



Haec omnia non propterea exhibui, quo demonstrarem, quid de caesura bucolica in Theocriti carminibus iudicandum esset, sed ut appareret, eos grammaticos, qui quartum pedem etiam spondeum esse posse putaverunt, Vergilii magis quam Theocriti opus spectavisse. Nam etsi Wordsworthio non concedo, qui id. VIII. 13 et X. 38 caesurae gratia mutare, id. VIII. 31 et 32 ejicere, id. XI e carminum bucolicorum numero excludere voluit, quoniam idylli VIII principium maximam partem ab Artemidoro profectum, in idyllis X et XI ad significandum rudius et incultius eorum qui producuntur ingenium et caesuram saepius neglectam et spondeum immissum censeo, tamen ex his paucis carminum vere bucolicorum locis, ubi spondeus in quarta sede reperitur, grammatici vix poterant concludere, promiscue et dactylum et spondeum poni. E contrario propterea, quod omnes quos attulerunt versus a solo fere Vergilio petiverunt, quodque hic ipse pro dactylo saepissime spondeo usus est, manifestum esse puto, illos de spondeo tantummodo poetam Romanum ante oculos habuisse. Ac profecto Maro in eclogis tam saepe intulit in pedem quartum spondeum orationis partem terminantem, ut omnes locos enumerare inutile et supervacaneum habeam. Causas, cur idem raro dactylo eadem ratione in quarta versus sede usus esset, veteres grammatici has attulerunt: poetam aut sprevisse eum dixerunt aut operis difficultate victum putaverunt. Meam sententiam si quaesiveris, mihi, si univsum Maronis opus spectamus, prima causa in eo posita videtur, quod, quum Theocritus viva popularium carmina ante oculos habuisset, quae quotidie audire poterat quaeque semper ei nova incitamenta suggerebant, ipsi talis adhortatio defuit. Sin vero singulos versus spectamus, quos e Graeco transtulit, ita statuendum puto, eum magna ex parte rei insolentia a caesura imitanda prohibitum esse, id quod apparebit clarissime ex imitationum conspectu, quem extremo hoc opere exhibebo, nihilominus tamen, ubi usurpavit caesuram, id praecipue Theocriti ejusque aemulorum versibus permotum fecisse. Id intelligetur, ubi omnes eos locos excitavero, in quibus ita factum esse, adjecti Graeci versus ostendent, quamquam mihi fatendum est, de

VII. 12 sqq. XI.), in omnibus vero alius semper atque novus evasit\*) in eoque etiam summopere excelluit, quod, ubi duo inducendi erant, eos diversissimi ingenii esse voluit (cf. inprimis id. IV. V. X.). In nonnullis ex his virtutibus poeta Romanus cum auctore suo feliciter certavit. Eadem enim rerum varietas in ecloga tertia, eadem diversa pastorum indoles in septima, utque nova et alia semper proferret, quaedam ipse invenit pulcherrime (cf. ecl. I. IX et septimae initium); at prorsus abest illa irrisiois suavitas ac venustas, et ne illud quidem cavit, quod cavendum erat quam diligentissime, ne diversorum idylliorum versus ut diverso colore praeditos in unam eclogam transferret. Cujus vitii duo luculentissima testimonia praebent eclogae altera et tertia. In priorem enim facile ad intelligendum est quam non apte tertii, sexti, undecimi idyllii versus illati sint, quum in iis omnibus dissimillimus color sit; in posteriore vero parum caute quae usque ad pastorum certamen dicuntur ex idyllio quinto et octavo adumbrata sunt.\*\*)

Quamquam hoc non ita a me dictum volo, quasi nusquam poeta rei subvenerit ita, ut Theocritea liberrime convertere, permutare, inflectere studeret. Quod quum jam alterius partis sit, hoc loco significandum magis quam explicandum erat.

Appendicis loco commemoro, Vergilium in eclogae VIII parte posteriore etiam in depingendo ingenio muliebri operam dedisse, ut idyllii secundi virtutes imitaretur. Quod ei interdum prospere cecidisse, qui haec carmina inter ipsa comparaverit, statim concessurum esse spero confidoque. Mirum tamen aliquem habere possit habuitque Adertum Théocrite p. 52, quod hac occasione oblata amoris muliebris vim ac vehementiam leviter indicare quam copiose depingere maluit. Id quin praestare potuerit, quum nos dubitare non sinat Aeneidis liber quartus, rei causa inde repetenda est, quod hac in ecloga Pollionis jussu hortatu-

---

\*) Hoc in genere inprimis memorabilis est ea ratio, qua in sexto et in undecimo idyllio Cyclopem depinxit.

\*\*) Vide modo v. 32, cujus verba utpote mire cum conviciis angressis discrepantia gravem offensionem praebent.

que et primum et alterum Theocriti idyllium imitatione expressit ideoque, ut inter se concinerent duae cantilenaе, multa, quae in utroque leguntur, prorsus omittere coactus est.

## Caput secundum.

### De Theocriti et Vergilli pastoribus personatis.

Accedere me ad rem valde lubricam ac, quo largiorem praebet conjecturis materiam, eo magis etiam multis magnisque dubitationibus obnoxiam, ut probe cognitum perspectumque habeo, ita, quum ad explicanda utriusque poetae et universa carmina et singula verba utilissima sit, haudquaquam eam silentio praetereundam esse censeo. Tamquam vera et concessa pono, de quibus Finkensteinius Arethus. p. 45 etiam Ameisio, gravi et acerbo allegoriarum exagitatori (cf. Ann. phil. et paed. 1845. 45. 3. p. 198), persuasit, Aegonem et senem idyllii quarti, Bombycam decimi, Cyniscam decimi quarti veros homines fuisse. Nam quae de iis dicuntur, tam propriae et peculiariae naturae sunt, ut pro fictis haberi vix queant. Jam jungamus cum eo, quod dixit Finkensteinius de idyllio quarto, illa quae scholiastae exhibent arg. id. III τὸ δὲ ποιητοῦ πρόσωπον οὐκ ἂν εἴη, ὡς ὁ Μούνατός φησιν, ἐκ τοῦ λέγειν τὸν ἐπικωμιάζοντα, ἢ ῥά γέ τοι σιμὸς καταφαίνομαι, et paulo infra τινὲς δὲ διὰ τοῦ σιμοῦ τὸν Θεόκριτον οἶονται κωμάζειν, Σιμιχίδην καλοῦντες\*), deinde ad v. 8, quae sola Haulero p. 15 cognita fuerunt, τινὲς δὲ διὰ τοῦ σιμοῦ τὸν Θεόκριτόν φασιν, ἐπεὶ καὶ ἐν τοῖς Θαλυσίοις Σιμιχίδας ὠνόμασται· πλὴν οὐκ αἰπόλος ὁ Θεόκριτος οὐδὲ Σιμιχίδας ἀπὸ τοῦ σιμοῦ, ἀλλ' ἀπὸ Σιμίχου, πατρωνυμικόν, denique ad id. IV. 39 ἐνταῦθα σαφῶς αἰπόλος ἦν Βάττος, ὃν εἰκὸς ἦν ἐρᾶν τῆς Ἀμαρυλλίδος, καὶ οὐ Θεόκριτον. Quodsi vero meminerimus, etiam id. VII. 96 sq.

\*) Consulto omisi verba ἡ ἱστορία παρὰ Ἀπολλωνίῳ, de quibus cf. Duebner. in not. ad h. l. et ad arg. id. XIII.

Theocritum suam aliquam amicam significare, et illud quoque reputaverimus, non sine justa causa sive a Theocrito sive ab Artemidoro juxta esse posita idyllia III et IV, quae tamen, quum, cur eo quo habemus ordine reliqua carmina collocata sint, probabiliter explicaverit Jacobsius, cujus sententiam attulit Wuestemann. praef. p. XXIII n. 2., a nullo adhuc indicata est, et in utroque caprarium produci, qui Amaryllidem aut habeat aut habuerit in deliciis: haec omnia si consideraverimus, non mirum videbitur, si haec conjecero, non recte scholiastam — ab uno autem omnia quae attuli fluxisse puto — qui eum antecesserunt, reprehendisse, sed sic potius existimandum: *primum* Theocritum propter id ipsum, quod simus fuit, a vitrico\*) per jocum et appellatum esse ab amicis et ipsum se appellasse Simichidam; *deinde* in idyllio III sub caprarii nomine poetam, amicam ejus sub Amaryllidis latere\*\*); *denique* eundem in idyllio IV Aegonem olim rivalem ejusque patrem sub Batti nomine castigavisse. Haec enim tam arte aliud ex alio apta et suspensa sunt, ut, si unum concesseris, ne reliqua quidem pro falsis habere possis. Cognata sunt, quae Fritzschi p. 28 attulit ex id. IV. 20. XIV. 5; nam ibi sine dubio illius aetatis homines notantur. Nec id. XI et XIII veri dissimile esse puto leviter Niciae amores perstringi, tangique eum nonnullis versibus, ut XI. 11. 72. 81. XIII. 1 sqq. 66 sq., mihi quidem persuaserunt Fritzschi l. l. et Haulerus p. 11. Mirum in modum in idyllio VII aperta cum fictis connexa sunt. Veris nominibus in eo producuntur Aratus cum Philino, praeceptores Philetas et Asclepiades, hic tamen a patre

\*) cf. Hauler. p. 6. Non verum est, quod ibi pronuntiavit, testimonium, quod exstat schol. VII. 21, ante se neglectum fuisse; nam dixerat de eo Ameis. Adn. p. 39.

\*\*) Hanc Theocriti amicam ex Italia inferiore ortam fuisse, ostendit et idyllii quarti scena et quae schol. exhibet arg. id. III: τὰ δὲ πράγματα εἴη ἂν ἐπὶ Ἰταλίας περὶ Κρότωνα, ὅθεν καὶ τὴν Ἀμαρυλλίδα ὑποτίθεται. Inde judicari velim, quae scripsit Hauler. p. 49. Nam praejudicata opinione abreptus, quoniam id. I. VI. IX suavia ac tenera, id. IV. V rustica et agrestia esse vidit, etiam id. III Siciliae, id. X Italiae tribuendum esse putavit. Quem cur non ea, quae ipse dixit p. 15, in veram viam perduxerint, est sane, quod valde mireris.

nominatus, Phrasidamus et Antigenes fratres, Lyoidas cum Ageanacte, quamquam prioris nomen fictum videri potest, incertum veris an fictis Eucritus, Amyntas, Aristis, a patria vocati Acharnensis ille et Lycopites, ficto nomine Tityrus; semet ipsum poeta Simichidae nomine significavit suamque amicam Myrto appellavit. Quod vero et se et Lycidam cum Acharnensi, Lycopita et Tityro pastorum specie induxit, ea re Musae bucolicae facultatem significare voluit. Denique quum aperte laudentur v. 39 sqq. Philetas et Asclepiades, tecte castigatur 45 sqq. sive Apollonius Rhodius sive Antagoras Rhodius sive quicumque intelligendus est. Quum enim non id h. l. agam, ut haec uberius explicem, satis habeo laudasse ea quae dixerunt de hoc idyllio Wuestemann. in arg., Fritzs. p. 3 sqq., Ameis. Adnot. p. 38 sq. et Ann. phil. et paed. l. l. p. 197., Hauler. p. 7 sqq. quique praeterea ab his omnibus commemorati sunt. Memorabiles praeterea sunt duo loci, in quibus poeta ipse ambiguitatem molitus esse videtur. Nam quod de id. III. v. 35 dixit Fritzschi, ita probari posse videtur, si statuimus, tertiam hanc esse Theocriti amicam et casu quodam felici eandem vocem *ἐριδαιλός* et nomen et operam puellae significasse. Id enim si fieri potuisse credimus, explentur ea, quae postulavit de amphibolia Quintilianus VI. 3. 47 sqq. Alter locus est id. VII. v. 125, in quo scribendum esse e Juntina et altera scholiastae lectione *μολών*, cum Ahrensio certum habeo, intelligendus tamen est *Μόλων*, quem cum Simone scholiasta Arati rivalem nominat. Pulcherrima autem h. l. invenitur amphibolia et cum structura versus artificiose connexa. Quae praeterea huc traxerunt viri docti, omni veritatis specie destituta sunt. Nam etsi id, si caute interpreteris, reprehendi non potest, quod Hauler. p. 29 de idyllio XIV dixit, Thyonichi persona Theocritum se ipsum significare, quoniam plura ibi leguntur, quae magis poetae quam homini humilioris ordinis, e Sicilia oriundo, cognita fuisse videantur\*), tamen prorsus respuendum est, quod idem Justini loco (XIII. 4) inductus, p. 61 sq. not. 3 putavit, sub divi Comatae persona (id. VII. 78 sqq.) Hieronem celebrari. Neque

\*) Nimum mihi vir doctus p. 30 e vss. 68—70 conclusisse videtur.

probabilis est Palmerii sententia, quam l. l. attulit Fritzschi, Philoxenum illo loco designari. Comatae historiam quum supra dixerim sine dubio notum cantus pastoritii argumentum fuisse; nunc id ad refellendum satis esse puto, si alterutra sententia vera esset, etiam sub Daphnidis nomine, qui eodem sententiarum ordine cum Comata jnngitur, verum hominem latere existimandum esse. Quod quum absurdum sit, illud quoque incredibile est. Jam ut ea brevi complectar, quae adhuc disputata sunt, apparet, ne Theocritum quidem dedignatum esse in argumentis bucolicis vel mimicis vel aperte vel tecte aetatis suae homines laudare et castigare, atque id cum de septimo idyllio, cujus universa indoles aliquantum a carminis pastoritii natura recedat, mirum esse non queat, idem de reliquis affirmare non licere, ad allegoricam autem speciem prope accedere id. III et IV, quamquam et hic et ubique (excipio semper id. VII) poeta curavit, ut pastorum reliquorumque hominum indoli et moribus describendis veritas vitae servaretur. Nam id tenendum semper esse, vidit jam Finkenst. p. 46.\*)

Vergilii toti poesi bucolicae auctoribus Bernhardy H. L. R. p. 412 ed. II et Ameisio Ann. phil. et paed. 1850. 4. 61. p. 373 *allegoricae* nomen tribuendum esse, si universam quandam appellationem quaerimus, equidem haud negaverim. At nondum a quoquam indicatum video, duo genera probe discernenda esse, quorum alterum a Theocrito acceptum tantummodo amplificavit, alterum fortunae necessitate coactus ipse finxit. Posterius solum a Vergilio usurpatum esse, falso legitur in Servianis ad ecl. III. 20: „refutandae sunt allegoriae in bucolico carmine, nisi cum, ut supra diximus (ad ecl. I. 1), ex aliqua agrorum perditorum necessitate descendunt.“ A Theocrito primum hoc didicit, ut ejus idyllii tertii ratione habita in omnium quas scripsit eclogarum prima (ecl. II)\*\*) sub Corydonis nomine se ipsum,

\*) Mirum est, quod veteres grammatici latini, Servius praef. ad ecl. p. 96 ed. Lion. et Don. vit. XXIII. fin.; a Theocrito omnia simpliciter pronuntiata esse contenderunt. Vergilium ipsum aliter sensisse, e disputatione mea apparebit.

\*\*) Eclogam secundam omnium primam fuisse, hac in causa quam maxime reputandum est; nam illo tempore nondum agrorum necessitate

nominatus, Phrasidamus et Antigenes fratres, Lyoidas cum Ageanacte, quamquam prioris nomen fictum videri potest, incertum veris an fictis Eucritus, Amyntas, Aristis, a patria vocati Acharnensis ille et Lycopites, ficto nomine Tityrus; semet ipsum poeta Simichidae nomine significavit suamque amicam Myrto appellavit. Quod vero et se et Lycidam cum Acharnensi, Lycopita et Tityro pastorum specie induxit, ea re Musae bucolicae facultatem significare voluit. Denique quum aperte laudentur v. 39 sqq. Philetas et Asclepiades, tecte castigatur 45 sqq. sive Apollonius Rhodius sive Antagoras Rhodius sive quicumque intelligendus est. Quum enim non id h. l. agam, ut haec uberius explicem, satis habeo laudasse ea quae dixerunt de hoc idyllio Wuestemann. in arg., Fritzs. p. 3 sqq., Ameis. Adnot. p. 38 sq. et Ann. phil. et paed. l. l. p. 197., Hauler. p. 7 sqq. quique praeterea ab his omnibus commemorati sunt. Memorabiles praeterea sunt duo loci, in quibus poeta ipse ambiguitatem molitus esse videtur. Nam quod de id. III. v. 35 dixit Fritzschi, ita probari posse videtur, si statuimus, tertiam hanc esse Theocriti amicam et casu quodam felici eandem vocem ἐριδαις et nomen et operam puellae significasse. Id enim si fieri potuisse credimus, explentur ea, quae postulavit de amphibolia Quintilianus VI. 3. 47 sqq. Alter locus est id. VII. v. 125, in quo scribendum esse e Juntina et altera scholiastae lectione μολών, cum Ahrensio certum habeo, intelligendus tamen est Μόλων, quem cum Simone scholiasta Arati rivalem nominat. Pulcherrima autem h. l. invenitur amphibolia et cum structura versus artificiose connexa. Quae praeterea huc traxerunt viri docti, omni veritatis specie destituta sunt. Nam etsi id, si caute interpreteris, reprehendi non potest, quod Hauler. p. 29 de idyllio XIV dixit, Thyonichi persona Theocritum se ipsum significare, quoniam plura ibi leguntur, quae magis poetae quam homini humilioris ordinis, e Sicilia oriundo, cognita fuisse videantur\*), tamen prorsus respuendum est, quod idem Justini loco (XIII. 4) inductus, p. 61 sq. not. 3 putavit, sub divi Comatae persona (id. VII. 78 sqq.) Hieronem celebrari. Neque

\*) Nimium mihi vir doctus p. 30 e vss. 68—70 conclusisse videtur.

probabilis est Palmerii sententia, quam l. l. attulit Fritzschi, Philoxenum illo loco designari. Comatae historiam quum supra dixerim sine dubio notum cantus pastoritii argumentum fuisse; nunc id ad refellendum satis esse puto, si alterutra sententia vera esset, etiam sub Daphnidis nomine, qui eodem sententiarum ordine cum Comata jnngitur, verum hominem latere existimandum esse. Quod quum absurdum sit, illud quoque incredibile est. Jam ut ea brevi complectar, quae adhuc disputata sunt, apparet, ne Theocritum quidem dedignatum esse in argumentis bucolicis vel mimicis vel aperte vel tecte aetatis suae homines laudare et castigare, atque id cum de septimo idyllio, cujus universa indoles aliquantum a carminis pastoritii natura recedat, mirum esse non queat, idem de reliquis affirmare non licere, ad allegoricam autem speciem prope accedere id. III et IV, quamquam et hic et ubique (excipio semper id. VII) poeta curavit, ut pastorum reliquorumque hominum indoli et moribus describendis veritas vitae servaretur. Nam id tenendum semper esse, vidit jam Finkenst. p. 46.\*)

Vergilii toti poesi bucolicae auctoribus Bernhardy H. L. R. p. 412 ed. II et Ameisio Ann. phil. et paed. 1850. 4. 61. p. 373 *allegoricae* nomentribuendum esse, si universam quandam appellationem quaerimus, equidem haud negaverim. At nondum a quoquam indicatum video, duo genera probe discernenda esse, quorum alterum a Theocrito acceptum tantummodo amplificavit, alterum fortunae necessitate coactus ipse finxit. Posterius solum a Vergilio usurpatum esse, falso legitur in Servianis ad ecl. III. 20: „refutandae sunt allegoriae in bucolico carmine, nisi cum, ut supra diximus (ad ecl. I. 1), ex aliqua agrorum perditorum necessitate descendunt.“ A Theocrito primum hoc didicit, ut ejus idyllii tertii ratione habita in omnium quas scripsit eclogarum prima (ecl. II)\*\*) sub Corydonis nomine se ipsum,

\*) Mirum est, quod veteres grammatici latini, Servius praef. ad ecl. p. 96 ed. Lion. et Don. vit. XXIII. fin., a Theocrito omnia simpliciter pronuntiata esse contenderunt. Vergilium ipsum aliter sensisse, e disputatione mea apparebit.

\*\*) Eclogam secundam omnium primam fuisse, hac in causa quam maxime reputandum est; nam illo tempore nondum agrorum necessitate



sub Alexidis Alexandrum, Pollionis puerum a se amatum, sub Iollae Pollionem induceret. Quod qui negaverunt, neque reputaverunt illi antiquitatis testimonia, quae collegit Spohnius in Proll. ad hanc ecl., neque exposuerunt, qui fieri potuerit, ut poeta, quamvis imitaretur ibi Theocr. id. III et XI, tamen ab eo desciscens non puellam, sed puerum a Corydone amatum induceret. Immo hac ipsa ecloga vix dici potest quantum lucis affundatur Theocriti idylliis III et IV. Quae de reliquis poetae amoribus traduntur, collecta sunt omnia ab Heynio ad Don. V. 20. Sed juvat et Donati et reliquorum verba ipsa afferre. Et ille quidem haec exhibet: „verum inter omnes maxime dilexit Cebetem et Alexandrum, quem secunda Bucolicorum Ecloga Alexin appellat, donatum sibi ab Asinio Pollione. Utrumque non ineruditum dimisit, Alexandrum grammaticum, Cebetem vero et poetam.“ Praeterea legitur in Servianis ad ecl. II. 1: Alii puerum Caesaris (Alexin) intelligunt, quem si quis laudasset, gratam rem Caesari fecisset“, ad v. 15: „tres dicitur amasse Virgilius, Alexandrum, quem donavit ei Pollio, et Cebetem puerum cum Leria puella, quos a Maecenate dicitur accepisse: unde volunt quidam, per Amaryllida Leriam, per Menalcam Cebetem intelligi,“ et ad V. 89: „aut pastorem quendam pulcherrimum dicit aut choraulam significat, quem legimus admodum a Virgilio fuisse dilectum.“ Pro Leria servile Hieriae nomen reponendum apud Servium esse, admodum probabiliter disseruit Weichertus de L. Var. et Cass. Parm. vit. et carm. p. 88 sqq. Sed longius etiam in hac re amatoria progrediendum esse existimo. Etenim si id demonstrari potest, Vergilium in eclogis praeter Alexandrum Leriam quoque et Cebetem tecte significasse, non poterant hi Maecenatis servi esse, quoniam jam illo tempore poetam in huius viri familiaritatem pervenisse, ne levissimum quidem vestigium exstat, sed erant Pollionis. Atque magna veri similitudo rei eo paratur, quod etiam Alexandri herus apud Martialem VIII. 56, quam famam Heynius l. l. alios multos sequi dixit,

---

allegoria uti coactus erat. Quod si factum esset, facili negotio eam etiam ad alia argumenta transferre poterat.

falso Maecenas, in Servianis ad ecl. II. 1 falso Caesar fuisse dicitur. Nihil erui potest ex ecl. II. 14 sq., quandoquidem quae ibi leguntur poetica quadam ratione ficta esse possunt, erui potest aliquid ex ecl. III. 76 sqq. Ibi Jollae nomine permotus, quod praeter hunc locum non legitur nisi ecl. II. 57, ubi Pollio tecte notatur, Phyllidem Pollionis servam intelligo, a Vergilio amatam neque de rivalis cujusdam irrisione cogito, sed festive sermonem ad Pollionem aversum puto, a quo poeta pastorum alternis certantium verbis puellam eodem modo impetrare voluit, quo eorundem sermone 84 sqq. Pollionem laudavit, Bavium et Maevium castigavit. Et potuit sane haec esse illa Leria vel Hieria, quam Servius Maecenatis puellam vocavit aliique Amaryllidis nomine indicari dixerunt. Quod poeta v. 84 sqq. Pollionem vero nomine appellavit, non obstat, quominus in hac re amatoria ficto uteretur. Huic opinioni ex aliis quoque rebus probabilitas accedere videtur. Ea repeti potest e v. 84 sq., ubi poeta Damoetae nomine se ipsum significat, et e v. 107, ubi Menalcas Damoetam Phyllida solum habere jubet. Adde quod ecl. V. 10 sq. Phyllis una cum Alcone et Codro profertur, e quibus posterior certe vere vixisse videtur. Quae si recte disputavi, etiam ecl. VII. 57 sqq. de eadem poetae amica cogitandum est. Num Cebes a poeta in eclogis celebratus sit, in medio relinquo. Potuit eum illo ipso Alconis nomine significare, quem Ursinus, Culicis v. 66 permotus, statuarium esse putavit, ad quem v. cf. quae scripserunt Heynius et Silligius. Quominus eum sub Antigenis nomine ecl. V. 88 sq. latere existimem, prohibent quae Servius dixit eodem loco coll. Donat. vit. V. 20. De laudibus et notationibus vel apertis vel tectis haec fere memorabilia sunt. Aperte laudatus est a poeta Pollio ecl. III. 84 sqq., Gallus ecl. VI. 64 sqq., Varius et Cinna ecl. IX. 35 (cf. Weichert. poet. lat. rel. p. 158 sq.), Codrus, graecus, ut videtur, ejus aetatis poeta bucolicus, ecl. V. 11 et VII. 21 sqq., ubi quum Corydon poetae personam sustineat, non est quod miremur ea, quae v. 25 sqq. dicuntur. Nam vera videntur quae de hoc poeta disseruit Ungerus de C. Valg. Ruf. poemat. iis locis, quos ipse in rerum indice s. v. Codrus

et p. 303 indicavit. Aperte castigantur Bavius et Maevius ecl. III. 90 sq. (cf. Weichert. rel. p. 308 sqq.), tectius, ut videtur, Cornificius sub Amyntae nomine ecl. II. 39. V. 8 sq. (cf. Unger. l. l. p. 71 sqq.) et pulchra quadam amphibolia Caelius ecl. III. 105 et Anser. ecl. IX. 36 (cf. de priore quae adnotaverunt Serv. et Philarg., de posteriore Weichert. rel. p. 159 sqq.). Postremo in hoc numero habeo, quod ecl. VI. 64 et ecl. X Gallus, ecl. X. 20 poeta ipse, se Menalcam nominans, pastores personati inducuntur, quodque ecl. III. vss. 85 sq., ut mihi recte disputasse videtur Ameisius Spic. p. 7 sq., metaphorico vel allegorico sensu accipiendi sunt.\*) Quae praeterea apud antiquos interpretes leguntur (cf. Serv. ad ecl. I. 1. Add. III. 20. V. 1. Add. de Mopso. VII. 21 et quae e cod. Gud. enotavit Heynius ad Don. XVII. 67), merae argutiae sunt. — Jam vero, ut conferam Vergilium cum Theocrito, praeter ea, quae de ecloga secunda dixi, ingeniosum poetae Siculi imitatore produnt *primum* ecl. IX. 35 sq., in qua cum auctoris id. VII artificiose certavit (cf. id. VII. 39 sqq. 45 sqq.), *deinde* ecl. II. 39. V. 8. 9., ubi quae leguntur, prorsus iis similia sunt, quae de Aegone, Lampriada, Bombyca, Cynisca, philosopho Pythagorico apud Theocritum exhibentur, *tum* ecl. VI. 64 sqq., quamquam ibi poesis bucolicae notio nimium amplificata est, et ecl. X, in quibus ea spectare poterat, quae de Lycida ut caprario Theocritus id. VII. 11 sqq., de semet ipso v. 91 sqq. dixerat, *denique* ecl. III. 105. IX. 36, quibus confirmatur Fritzschi de id. III. 35 meaque de id. VII. 125 sententia. Amplificationem eorum, quae a Theocrito accepit, hujus generis reliqua omnia continent inprimisque illud mirum videri potest, quod pastores etiam per alternos certantes quae ipse sentiret loquentes fecit. At valet etiam

---

\*) Quominus iis adstipuler, quae vir doctissimus p. 8 sq. de v. 109 sp. dixit, impedit me pulchra horum versuum interpretatio, quam primum prolatam a Naegelsbachio Latein. Stilist. p. 451 nunc suam fecit Ladewigus. Neque extremum versum cum Servio allegorice intelligendum puto. Nam tantum abest ut e vulgari explicatione languidus sit, ut ex eo demum videamus, Palaemonem vilicum fuisse, i. e. et nobiliorem et seniore virum, quem Vergilius non sine justa causa arbitrum certaminis constituit.

de hac re Quintiliani iudicium in primo capite laudatum, cui adde quae Spohnius de consilio poetae animo ecl. III. 84 sqq. obversato laudabiliter exposuit in Prolegomenis. Maximi autem momenti est, quod ex ejus modi rebus facile intelligitur, ex cantu amoebaeo, qualis apud Vergilium exhibetur, de legibus a Theocrito observatis nihil posse concludi. Atque haec omnia quum tamquam radices agant in Theocriti carminibus, de reliquis idem dici minus potest. Nimirum vitae condicione coactus novum genus Musae bucolicae condidit, quo pertinent ecl. I. IV. V. IX. Utque concedam, poetam, ut se ecl. V et IX Menalcae, ecl. I Tityri nomine (cf. Wagnerum ad v. 43) significaret, per motum fortasse esse idyllio auctoris sui septimo adeoque in captanda fautorum benevolentia agendisque gratiis paulo pinguius id. XIV imitatum esse, tamen praecipue Asinii Galli (ecl. VI) et Caesaris laudes (ecl. V) a Theocriti Musa prorsus alienae sunt. Ceterum de allegorica eclogae quintae interpretatione praeter interpretes cf. Klausen. l. l. p. 530 sqq.

## Caput tertium.

### De utriusque poetae sermone.

Apud Probum (p. 348 ed. Lion.) haec leguntur: „Bucolica Theocritus facilius videtur fecisse, quoniam Graecus sermo sic videtur divisus, ut Dorica dialectos, qua ille scripsit, rustica habeatur. Opportunum fuit ergo ei, qui pastores inferebat, ea lingua disputasse. Virgilio tanto factum opus majus, quanto una lingua loquens sensus rusticos aptare elaboravit sine reprehensione sermonis.“ Hoc de indole dialecti Doricae iudicium, omissum ab Ahrensio, ubi de ea re disputavit de dial. Dor. p. 398, cum iis conspirat, quae disputaverunt viri docti de Theocriti id. XI. Nam in eo ipsarum formarum asperitate Polyphemi rusticitatem significari praeter alios et Fritzsche affirmavit l. l. p. 24 et Ahrensius p. 254. Quum autem hujus viri

doctissimi uberius expectetur de dialecto poetarum bucolicorum disputatio, in qua, quod praestans est et acre ejus ingenium, hanc quoque rem accurate illustrabit, id unum mihi sumo, ut Vergilio quoque ita visum esse contendam. Nam quum Romanae literae rusticanum sermonem prae urbano respuerent, id saltem egit, ut uno alterove loco antiquas formas immisceret, quod factum videmus ecl. III. 1. IX. 6 (*cujum pecus et necdum* in verbis: „quod nec vertat bene“, quamquam non immemor sum eorum, quae dixit Ameisius Ann. phil. et paed. 1850. 61. 4. p. 386). Quominus talia saepius conaretur, deterritus est sine dubio et eorum quibus scripsit iudicio et castigatione adversariorum, de qua cf. Don. l. l. XVI. Non recte enim Vossius egit, quod in ecl. VII. 54 antiqua et obsoleta inferre voluit; verissime ibi ex mente Lachmanni ad Lucr. p. 94 librorum scripturam Ladewigius interpretatus est.\*) — Huic de dialecto dispu-

\*) Hac data occasione opinionem meam proferam de Calpurnii ecl. III. v. 34 sq.

Nec tam nobis ego Phyllida reddi

Exopto, quam quod Mopso jurgetur anhelō.

Ibi praebet unus cod. R 1. (utor siglis Glaeseri) cum maxima parte veterum editionum *jurgetur*, D 4. G. R 2. cum nonnullis editionibus *jungetur*, *quam ne* pro *quam quod* e correctura, ut apparet, M: Wernsdorffius, quem secuti sunt Beckius et Glaeserus, reposuit *jurgetur* et *anhelō* pro adjectivo accepit. Is exc. VI particulam *quod* posterioris aetatis vitio pro „ut“ positam esse censuit et verba *jurgetur Mopso* ex Graecismo explicavit, excitans hanc in rem Amm. Marc. XXVIII. 5: „(Burgundii) salinarum finiumque causa Alamannis saepe jurgabant.“ Itaque sententiam totius loci huc redire putavit: „Non tam illud exopto, ut ad me redeat Phyllis, quam ut ne cum Mopso sit et quam primum cum illo jurgetur.“ Contra ejus opinionem non solum hoc facit, quod ita frigidissima prodit sententia, sed etiam illud, quod nequaquam Calpurnius pravo dicendi genere usus est. Nempe accidit Wernsdorffio idem, quod Vossio accidisse in Vergilio dixi; rusticos homines existimavit etiam rustice loqui debere. Quum pleraque, quae propter hanc opinionem vitiosa reliquit, jam a Glaesero correctae sint, hoc quoque loco purgandus poeta a naevis et rescribendum *jungetur* et *anhelō* pro *verbo* accipiendum. Ita sententia est aptissima: „Non tam exopto, ut mihi reddatur Phyllis, quam suspiro, quod praevideo, cum Mopso eam junctum iri. Significare voluit poeta, tam acerbo Lycidam odio in Mopsum flagrasse, ut quam ipse amasset, licet sibi non redderetur, tamen ne inimico obtingeret, vehementissime exoptaret.

tationi alia quaedam adjungam, quae mihi ad universam utriusque poesis judicandam fructum quendam afferre videntur. Nihil Vergilius apud pastores suos reperisse videtur, quod simile esset vocabulo σίττα, neque licuit poetae Romano eam linguae Graecae virtutem aemulari, quae posita est in nominativo nominis cum articulo ibi adhibito, ubi alter alterum alloquitur. Ea dicendi ratione Theocritum magna cum vi potissimum in animalibus appellandis usum esse, ii loci ostendunt, quos conguessit Ameisius de artic. p. 17. Proxime tamen ad Graecum usum tales loci accedunt, qualis est ecl. VII. 46, ubi tertia verbi persona in enuntiato relativo posita simile quiddam efficere voluit. Cf. quae ad l. l. adnotavit Ladewig. Eodem trahenda locutionum quarundam suavitas, quam quominus aemularetur Vergilius, lingua sua impeditus est. Insigne exemplum hujus generis praebet ecl. IX. 23, in quo quum Graeca verba id. III. 3 τὸ καλὸν πεφιλαμένε, id quod rectissime dixit Gellius N. A. VIII. 9. 8, quamvis concedere noluerit Stephanus in Virg. et Nas. Theocrit. imit. p. 10 sqq., non translaticia, sed nativae cujusdam dulcedinis esse intellexerit, totum locum aliter convertit. Nec ὀνοματοποιήτα quae vocantur tam crebra in Latina quam in Graeca lingua reperiuntur. Quocirca videmus Maronem, ubi haec obvia apud auctorem fuerunt, aut versuum numeris literarumque sono (id. V. 7 coll. ecl. III. 26 sq. id. VII. 48 coll. ecl. IX. 36) aut alia sententiarum conformatione (id. V. 89 coll. ecl. III. 64 sq. 72) cum eo certare studuisse. Vide quae ibidem §. 4 dixit Gellius de id. V. 89. Verbo etiam disputare juvat de iis appellationibus, quibus uterque poeta amores significat. Dulcissima sunt hoc in genere quae apud illum leguntur λίπος (id. III. 18), quod recte e schol. scripsit Ahrensius, et μελίμαλον, quod idem exaravit, vel γλυκύμαλον, quod vulgo legitur (id. XI. 39), suavia etiam τερπνόν (II. 158), ἔρωτύλος (III. 7), ἔρωτίς (IV. 59), ἄδύς (XX. 44), quod jure ab Ahrensi servatum censeo. Es his quum pleraque linguae culpa, ut videtur, Maro non posset imitando exprimere aliaque, veluti *cura* (ecl. I. 58. X. 22), *ignis* (ecl. III. 66), *furor* (ecl. X. 38) substitueret, ut vocem *Venus* de puella amata poneret ecl. III. 68, excitatus est poetae

Graeci auctoritate id. III. 7 et IV. 59. Atque haec mihi causa est, cur Ameisio adsentiar, qui Adn. p. 19, quamquam ipse in editione aliter statuit, Ἐρωτύλος et Ἐρωτίς literis majusculis reponendum putavit. Quae sententia propterea etiam magnam veritatis speciem habere videtur, quod in hac ipsa re, ubi potuit Vergilius, secutus est Theocritum. Etenim *conjugem* pro puella amata posuit ecl. VIII. 18 (coll. Theocr. id. VI. 26), pro amato juvene ibid. 66 (coll. id. II. 3). — Alia quum posset, tamen noluit ab auctore assumere. A deminutivis enim et hypocoristicis, quae aliquoties apud Theocritum inveniuntur (cf. praeter III. 7. IV. 59 etiam IV. 20. 55. 58. V. 40. VII. 51. 132. XI. 60. XIII. 12) et in simili poeseos genere, ne Catullum testem excitem, magna cum suavitate apud Moreti auctorem, ingenium ipsum Maronis quam maxime abhorruisse, recte dixit Silligius proem. Mor. p. 308 ed. Wagner. Item ex ingenio poetae repetendum puto, quod elliptico dicendi genere a Theocrito multis locis eleganter usurpato semel tantum usus est ecl. IX. 1, atque id ne in hunc quidem locum adhibiturus fuisset, nisi e sequenti singulari numero *ducit* facile ad verba priora numerus pluralis *ducunt* repeti potuisset \*). — Contra poetae Graeci exemplo, apud quem saepissime ad animum alterius ad sequentia advertendum leguntur ἡνίδε vel ἡνίδε, quemadmodum Ahrensius scripsit (I. 147. II. 38. III. 10. V. 23), ὄσσαι (I. 147. III. 12. IV. 50. X. 41. XV. 65), ἰδέ (V. 30, ibi recte ab Ahrensi revocatum. 37), ὄρητε (V. 110), ὄρη (VII. 50. XV. 12), ipse quoque aut ecce (II. 46. III. 50. V. 66. IX. 47)

---

\*) A vero longe aberraverunt, qui locutionem „pedes aliquem ducunt“ sumptam putaverunt ex id. XIII. 70 et XIV. 42 ἃ πόδες ἄγον, quibus verbis dissimillimus color est. Recte enim priore loco Wuestemannus disseruit, verba Theocritea eum significare, qui temerario cursu se in quaevis loca deduci patitur. Nec apte cum verbis Vergilii Vossius comparavit Plin. Ep. VII. 5 „ad diactam tuam ipsi me, ut verissime dicitur, pedes ducunt,“ cum quibus conferre licet Tib. II. 6. 14 „pes ipse redit.“ Prorsus similia sunt Vergilianis, quae leguntur Varr. R. R. II. praef. 6: „propterea quod te empturientem in campos Macros ad mercatum crebro adducunt pedes.“

aut *en* (V. 65. VI. 69 et peculiari sensu subjecto, de quo cf. Wagner., 1. 72 sq. VIII. 7 sqq.), aut *aspice* (II. 66. IV. 50. 52. V. 6. VIII. 105. IX. 58, et quidem II. 66 et IX. 58 spectans aperte id. II. 38) eadem de causa posuit. Hanc observationem etiam ad interpretationem utilem esse, perspexit vir Theocriti lectione maxime imbutus Ameisius, Spic. p. 10, etsi ibi Graecum poetam non commemoravit. Nam quemadmodum apud Theocritum I. 147. V. 37. 110. XV. 12. 65 quae sequuntur post *ᾄσαι, ἰδέ, ὀρῆτε, ὄρη* per se accipienda sunt et exclamationis vim habent, ita apud Vergilium ecl. IV. 52 quae leguntur post verbum *aspice* exclamationem, non interrogationem continent. Huc revoco etiam structuras quasdam, in quibus Maronem Siculum poetam aemulatum esse persuasum habeo. Quae quum ad utriusque linguae comparationem perquam utiles sint, omnes hic in unum locum conferam. Primum commemoro usum praepositionis *ab*, qualis exstat ecl. I. 8 (cf. similem usum praepositionis *ἀπό* id. I. 145 ibique intt. et praep. *ἐκ* id. VII. 15 et Ameis. Adn. p. 41). Hanc structuram saepius usurpasse Vergilium, loci ab interpretibus allati ostendunt, neque tamen id impedit, quominus ejus origo a Theocrito repetenda putetur. Non aliter judico de usu quodam conjunctionis *et*. Ea enim eodem modo ecl. III. 62 antistrophae adhibita est atque factum videmus apud Theocr. id. V. 96. 106. 122 (coll. IV. 9), quos locos afferre debebat Wagnerus, quum in Heynii editione contra eos disputaret, qui *at* inferre voluerunt. Videlicet in his versibus copulationis magis est quam oppositionis ratio habita. Nec desciiit poeta a Theocriteo loquendi genere, quum ecl. I. 27 interrogationem a particula *et* inciperet (cf. id. IV. 7. V. 25. 39 et Wagner. Quaest. XXXV. 7. g.). Semel posuit particulam *que* explicationis gratia, ubi apud Theocritum *δέ* adhibitum erat (cf. ecl. III. 34 cum id. VIII. 16 et Wagner. Quaest. XXXIII. 10). Notabilis est praeterea significatio et structura verbi *suadendi* ecl. I. 56, quo convertit Graecum *πειθεῖν* (id. VII. 153 coll. id. IV. 11), formula *si nescis* ecl. III. 23 (coll. Ov. Ep. XX. 150), quo interpretatus est id. XV. 91 *ὥς εἰδῆς καὶ τοῦτο*, quod ex utrius-



que versus collatione clare apparet\*), usus generis neutrius *longum* pro *longe* positi ecl. III. 79 (cf. id. II. 142. IV. 37, ubi ipse Ameisius in interpretatione *longum* scripsit, cum Ahrens. Phil. I. I. p. 427), quod Horatius quoque art. poet. v. 459 e Graeco assumpsit, *omissio particulae comparandi* ecl. IX. 36 (cf. id. XIV. 38. 51, quamquam de priore etiam nunc aliter sentit Ahrensius), denique *tota periodi conformatio* ecl. IV. 53 sqq. Ea enim tam similis est ei, quae habetur Theocr. id. X. 32. 33, ut equidem non dubitem, quin Vergilius, qui tam penitus quasi imbibere verba Theocriti, hanc quoque ab eo deprompserit. Eadem fortasse inferenda est etiam in id. XI. 73. Multo fortior certe oratio est, si e cod. M. reponitur αἶς' pro αἶχ', quod suadere videtur etiam imitatio Vergilii ecl. II. 71. „Quin tu aliquid saltem potius etc.“, et ad amussim respondet Hom. II. χ. 41. 42. Nolo autem hoc loco silentio praeterire Ameisii verba, quae exhibuit Spic. p. 6. Putavit enim vir doctissimus, exemplis Vergilianis, quae collegerunt Wagner. in IV. 6 et Jahn. in VI. 61 defendi posse Theocr. V. 38, in quo pro καὶ bis posito verbum repetitum est et semel in priore membro posita particula. Hanc sententiam fortasse ipse abiecit, iis permotus, quae scripsit Ahrensius Phil. I. I. p. 438 sqq. At mihi ne hujus quidem viri spectatissimi conjectura ab omni parte satisfacit. Offendor enim gravissime particula κα in hac proverbiali locutione usurpata, idque eo magis, quod sic vis ac potestas repetiti verbi infirmatur et infringitur. Hoc ipse Ahrensius vidisset, nisi tanto amore illam particulam una cum pronomine εἰ amplexus esset. Itaque reputanti mihi, in codd. K. P. et apud Joann. Dam. legi ὧς τε, haec conjectura in mentem venit:

Ἰρέψαι μὲν λυκιδεῖς, Ἰρέψαι, κυνάς, ὧς τὲ φάγωντι.

---

\*) Hanc non levem causam esse puto, quamobrem vulgaris verborum interpunctio, quam mutavit Ahrensius, retinenda esse videatur. Accedit aliud argumentum in versuum concinnitate positum, quam scio virum amplissimum aliis locis plurimi fecisse. Haec duo mihi infirmare videntur quod cum ad mutandam interpunctionem permovisse suspicor. Scilicet plerumque ejusmodi formulae non collocantur in enunciati principio. Cf. praeter Wuestemann. Schneidewin. ad Sophocl. Phil. 989.

„Nutri, quaeso, nutri, o canis, lupos catulos, ut te devorent“. Cf. ad sententiam v. 44. ὥς τὲ commendasse videtur jam Ameis. praef. p. X, quem vide etiam de infinitivo pro imperativo posito Adn. p. 66. — Possem hic singula vocabula memorabilia enumerare, quae Vergilius Theocrito debuit, nisi satius videretur, eorum mentionem una cum disputatione de nominibus propriis a poeta Siculo assumptis rejicere in finem totius de imitatione quaestionis. Itaque ea tantummodo hoc loco in medium proferenda sunt, quibus prae Theocrito Vergilii Musa commendari videtur. Tria me invenisse gaudeo, quorum unum in *pronominis possessivi*, alterum in *pronominis ille* usu, tertium in *quaesita quadam literarum elegantia* positum est. Verum est, quod viri docti non raro observaverunt inprimisque me saepe in scholis de lingua latina habitis admonuit praeceptor meus carissimus, Klotzius, latinam linguam ad exprimendam sensuum teneritatem et molliitudinem maxime idoneam fuisse. Inde derivandus est ille pronominis possessivi usus, quem ad amicum animum testificandum etiam Vergilius non raro admisit (cf. ecl. I. 75. II. 52. V. 51. VII. 22. 40. 59. X. 2). Hic usus etsi Graecis non prorsus ignotus est, tamen apud Theocritum, cui in poesi bucolica pronominis ita usurpandi saepissime occasio oblata erat, si recte numeravi, bis tantum reperitur id. V. 1. 145. Nam contra Adertum, qui *Theocr. Append.* p. 8 sq. in id. II. 145 hanc significationem inducere voluit, dixit Ameis. Ann. phil. 1845. 45. 2. p. 135, etsi fortasse verba τᾷς ἀμᾶς ἀνθρώπου eodem familiaritatis sensu intelligi possunt, quo Adertus Φιλίστας τᾷς ἀμᾶς accipienda putavit. Neque audiendus est Wordsworthius eundem sensum intrudens in id. V. 90 et XXVII. 2.)\* Alterum, quo commendatur poesis

\*) Nihilominus tamen adj. λεῖος id. V. 90 removendum puto. Quos enim locos attulit Ameisius de art. p. 41 ad defendendam hanc articuli collocationem, ex iis eximendos censeo id. XX. 24. XXI. 23. XXIX. 33. Bion. V. 2. Mosch. I. 5, quoniam in his omnibus adjectivum praedicati vi accipiendum est, possuntque cum ejusmodi locis Romanorum talia conferri, quale est Verg. ecl. I. 29: „Candidior postquam tondenti barba cadebat.“ Conjectura nunc remotus est articulus ab Ahrensis id. XV. 145. XXVII. 57, non curandus id. XXV. 181, quod ibi pronomen demonstrativum, non articulus legitur,

Vergilii bucolica, est creber ad evitandum pronomen *is* pronominis *ille* usus: a priore enim tam studiose in eclogis abstinuit, ut exceptis ecl. II. v. 4, in quo *ibi*, et ecl. III. v. 35, in quo *id quod* legitur, neque ipsum neque derivatae ab eo voculae inveniantur. Quandoquidem de pronominis *ille* significatione docte egit Wagner. Quaest. XXI, ego hanc laudare satis habeo atque eos potius locos tractabo, in quibus poeta hoc vocabulo pronomen τῆνος convertit. Permotus enim iis, quae dixerunt de voce τῆνος Ahrens. de dial. Dor. p. 267 sqq. et Ameis. l. l. p. 143 sqq., diligenter quaesivi, num quid ad litem dirimendam e Vergilii imitatione conjicere liceret: licere intellexi. Non potuisse Vergilium pronomen *ille* inferre, ubi τῆνος secundam indicat personam vel cum contemptu dicitur, quoniam sponte apparet, ejus modi loci e quaestione excipiendi sunt et ita potius dicendum, Graecos, quum non haberent pronomen, quod latino *iste* responderet, ad illa quae posui designanda modo propinquitatis modo lon-

XXX. 9, quoniam hoc idyllium recentissimae aetatis est. Eo loco, de quo agitur, pro λείος conjicio αὐτός scriptum fuisse. Requiritur enim fortior oppositio, quum ὑπαντᾶν nihil aliud sit nisi quod nostrates dicunt *entgegenkommen*, Romani *se offerre*. Quare temere egerunt, qui existimaverunt, Vergilium ecl. III. 66 ὑπαντᾶν convertisse „ultro se offerre.“ Legerat sine dubio αὐτός ὑπαντῶν. Contra pronomen αὐτός v. 99 indicat, in stropha aliquid turbatum esse, quod quid sit, alio tempore demonstrabo. Restat id. IV. 49, quem versum non recte ab Ahrensis emendatum puto Phil. l. l. p. 435. Primum rursus reponendum est e conj. Hermannii ροικόν τι, deinde initio versus nihil mutandum, sed e scriptura cod. k πάταξα in fine scribendum ὥς τυ πατάξαι. Non raro infinitivo ita ὥς additur, ut consilii vis, quae in eo inest, aut magis efferatur aut ad effectus potestatem accedat. Locum prorsus similem unum inveni, ubi non debuit e Reiskii conjectura ὥστε pro ὥς recipi, Eur. Alc. 368 ed. Monk.

εἰ δ' Ὀρφείως μοι γλῶσσα καὶ μέλος παρῆν,  
ὥς ἢ κόρην Διμήτρος ἢ κείνης πόσιν  
ὕμνοισι κηλήσαντά σ' ἐξ Ἀίδου λαβεῖν,  
κατῆλθον ἄν.

Cf. praeterea Hertlein. ad Xen. Anab. I. 8. 10. et ad Cyr. I. 1. 2. Schneidewin. et Hermann. ad Soph. Ant. 292. Klotz. ad Devar. II. p. 764 sq. Nos saepe in convertendis hujus generis locis verbo auxiliari „können“ utimur.

gloris distantiae notionem magis prementes αἴτιος et ἐκεί-  
 νος vel Doricum τῆνος idem atque pronomen ἐκείνος signi-  
 ficans usurpasse. Hos igitur locos si exceperis, pronominis  
*ille* apud Vergilium et pronominis τῆνος apud Theocritum  
 usum amicissime conspirare, ex iis videbis, quae Wagnerus  
 et Ameisius disputaverunt, nisi quod poeta Romanus sae-  
 pius etiam quam Siculus in eclogis — de his autem solis  
 hic dissero — poetica quadam praestantia spatii vel tem-  
 poris remotioris significationem extulit. Est autem in  
 transferenda voce τῆνος pronomine *ille* usus loco apertissimo  
 ecl. X. 13 sq. (coll. id. I. 71. 72), non minus fere apertis  
 V. 49 (coll. id. I. 4 sq.). VIII. 8 (coll. id. VII. 63). VIII.  
 91. 103 (coll. id. II excepto ephymnio priore v. 31. 30. 44.  
 60); idem tamen *illum* pro *viv* dixit ecl. VIII. 43 (coll. id.  
 III. 16). Tertia quaedam Vergilii virtus in eo cernitur,  
 quod literarum sono saepe rem ipsam significare studuit.  
 Cf. ecl. I. 56. III. 27. 55 sqq. V. 46 sqq. 82 sqq. VII. 13.  
 Quod artificium quamquam a Theocrito non neglectum est  
 (vid. e. g. II. 38 sq.), tamen maiore cum diligentia poeta  
 Romanus coluit. Denique ad haec adjungo singulare  
 quoddam artificium, quo usus est Vergilius ecl. VIII. 20:  
 „et fragilis incende bitumine laurus.“ Etenim adjectivum  
*fragilis* eo consilio adscivit, ut utriusque significatus ratione  
 habita, quem tenet subst. fragor, et celeritatem, qua com-  
 busta est laurus, et strepitum in comburendo denotaret.  
 Cf. Klotz. lex. s. v. fragilis et Theocr. II. 23 sqq., quos  
 versus imitatus est. His et talibus confirmatur Horatii  
 iudicium, quatenus ad eclogas pertinet, Sat. I. 10. 44 sq.  
*Molle atque facetum Vergilio annuerunt gaudentes rure Camenae.*

Venio jam ad eas res, quas quum ex parte in primo  
 capite, ubi quid e vita ipsa ab utroque poeta adumbratum  
 esset, demonstrare conatus sum, breviter attigerim, hic  
 uberius tractabo, dico vocabulorum repetitiones et symme-  
 triam in utriusque carminibus conspicuam. E *repetitioni-*  
*bus* principem locum ea tenet, quae invenitur post caesuram  
 bucolicam, de qua ipsa infra dicendi locus erit. Locos  
 Theocriti omnes, qui huc pertinent, collegit Fritzschius  
 p. 20, quibus addendi sunt Vergiliani. Aperte iteratio de-  
 prompta est e Theocriti primo idyllio in posteriore ephymnio

ecl. VIII, aperte etiam ab eodem ecl. X. 11 (coll. id. I. 67) et V. 46 (coll. VIII. 76 sq.) a Moscho ecl. IX. 17 (cf. M. III. 11). Tum reperitur ea in versu ter similiter composito ecl. I. 75. VII. 44. X. 77, praeterea VI. 25. VIII. 33 nec dissimilis est ecl. VI. 80, nisi quod ibi *vocula et* interposita est. Peculiaris generis sunt ecl. II. 14. 15. X. 20. 21, quos cf. cum id. I. 1. 2. 80. 81, et VIII. 7. 9. coll. Theocr. I. 100. 101. 105. 106 et Fritzs. l. 1., quamquam apud Theocritum continuo in alterius versus principio ea vox iterata est, quae posita erat post caesuram bucolicam prioris. Ex hac observatione apparet, Macrobius in eo capite, quo de iis, quae a Vergilio ipso figurata sunt, disseruit, Saturn. VI. 6, non recte §. 12 ed. Jan. inter ea repetitionem ecl. X. 11 retulisse. Rei criticae eandem afferre utilitatem, perspicitur ex ecl. VIII. 109. Ibi optimi codices inter eosque Mediceus hoc praebent „Parcite, ab ab urbe venit, jam, carmina, parcite Daphnis“. Hunc ordinem a Vossio receptum Wagnerus sibi eo confutare visus est, quod contulit v. 61. Nec tamen recte egit vir doctissimus. Nam v. 61 „Desine Maenaios, jam desine, tibia, versus“ eodem ordine procedere debuit atque ephymnium antegressum „Incipe Maenaios mecum, mea tibia, versus;“ ultimus vero versus accommodandus fuit posterioris cantilenae ephymnio priori „Ducite ab urbe domum, mea carmina, ducite Daphnim“. — Alia vocis antegressae repetitio invenitur apud Theocritum omnino in parte versus posteriore, saepe post caesuram legitimam. Cf. id. I. 65. 83. 130. II. 43. 98. IV. 42. V. 60. VI. 5. VII. 74. VIII. 11. 12. 14. 17. 25. \*) 53. IX. 14.

\*) Utar hac occasione ad conjecturam aliquam in medium proferendam. In idyllii octavi parte priore quicumque eam composuit, operam dedit, ut, ubi monostichis loquerentur pastores (nam recte Ahrens. v. 25 Menalcae, sequentes Daphnidi tribuit), repetitione aliqujus vocabuli versus in duas partes discinderetur. Id in solo v. 13 non videtur factum esse. At offendit ibi non solum illud, quod, si *τῖνα* legimus, *ἄελλος* masculino genere de pignore intelligendum est (nam hic vocis usus, quem adhuc soli grammatici testati sunt apud Hermann. Op. V. 82, neque debuit a Wordsworthio in id. XXI. 52 intrudi neque in nova Passoviani lexici editione pro re explorata sumi), sed codicum etiam lectiones longe aliud quiddam suadere videntur. Praebent enim h. 9. a. L. vel *χάμιν* vel *χάμιν* eodemque ducit,

XI. 63. XV. 82. 90, ubi nunc in priore membro ποτίσασσε scripsit Ahrens. 146. XVI. 13. XX. 36. XXIV. 9. Bion. I. 29. 36. 98. III. 17. Ex his memorabiles sunt praeter ceteros Theocr. IV. 42. VIII. 14. XI. 63. XV. 146. Bion. I. 29, quoniam in primo post subst. positum est adiectivum ex eo compositione factum, in secundo (etiam ex conj. Ahrens.) alia verbi forma repetita, in tertio post verbum finitum participium, in quarto et quinto post vocabulum simplex compositum. Qui similis esset id. XV. 90, qualis ab Ahrensio versus exaratus est, indagare non potui. Apud Vergilium invenitur haec repetitio ecl. I. 33. II. 16. 20. 68. III. 2. 6. 30. (bis-binos) 59. 60. 62. IV. 3. 34. 40. V. 35. 42. 44 (post positivum comparativus positus). 52. VII. 53. VIII. 61. 83. X. 3. 23. 69. Assumptam eam esse a Theocrito apparet ex ecl. VIII. 83, qui, quamquam sententia et iteratio est deprompta ex id. II. 23, tamen in iterationis genere potius ad id. VI. 5 factus est, et ex ecl. X. 23 coll. id. I. 83, simillimique inter se sunt ii versus, in quibus magna interdum cum vi in Graecis post καί, in Latinis post *et*, *atque*, *que* vox iterata est. Cf. id. I. 65. II. 43. V. 60. VII. 74. XI. 63. XV. 82. XX. 36. XXIV. 9 cum ecl. IV. 34. V.

quod legitur in v. 6. ὃ κεν ἀμύν (ὃ κεν 6 sec.). Praeterca a. exhibet καί τι ita, ut post τι aliquid erasum sit. In fine versus ἄρκιος est in k. a. p. s. 9. L., ἄρκιον v. 6 (ubi v sec.). Quare sic locum restituendum puto: καί τί νυ δησεύμεσθα; τί χάμυν (χάμυν) ἄρκιον εἶη; Intelligitur, voculis τί νυ in τίνα corruptis, etiam ἄρκιος pro ἄρκιον et pro „δησεύμεσθα τί“ δησεύμεσθ' ὅτις aut ὅστις scriptum esse. Verbi genus medium et vocem ἄρκιον explico, ut fecit Ameis. Adn. p. 54. Particula νυ, de qua cf. Hartung. Part. II. 101 sq., legitur nunc in ed. Ahrens. I. 78. Ceterum facile apparet, alteram versus partem altera eodem modo explicari, quo factum v. 17. 25 (coll. XVI. 13). Hoc ipsum mihi in causa est, cur improbem Ahrensii conjecturam; Wordsworthii sententia et propter vocis ἀελλος significationem et propter transpositionem particulae καί rejicienda est. Propter hanc repetitionis legem etiam id. XXII. 117 ex auctoritate codd. 23. D. M. ὡς scribendum videtur, quamquam optimus 9 ὅσσ' habet. Nam eadem particula fraudi librariis fuit, id. XXV. 3, ubi mihi non dubium videtur quin secundum codd. w. 9. 18. 23. M. ὡς ἐρεῖνεις reponendum sit. Saepe numero enim poetae Graeci ὡς dixerunt, quum ὅσα vel ἃ exspecta. Cf. Hom. h. in Cer. v. 172 ὡκα δὲ μητρὶ ἐννεπον, ὡς εἶδόν τε καὶ ἐκλυον, et quae adnotaverunt Hermann. ad h. l., Wunder. ad Soph. O. C. v. 1119. Matth. §. 485. p. 1076 ed. III.

35. 42. X. 23. Sed exaggerasse rem poetam Romanum, probant ejusmodi loci, ubi in Graecis iteratio non habetur. Cf. id. IV. 2 cum ecl. III. 2, id. V. 80 sqq. cum ecl. III. 60. 62. In duobus postremis locis eam ad evitandum pronomen is admissam esse, inde perspicitur, quod apud Theocritum pronomen αὐτός pro repetito nomine usurpatum erat. Atque ut hanc rem hoc ipso loco profligem, tertiam quoque pronominis evitandi viam poeta ingressus est. Interdum illud prorsus omisit. Inde facilem explicatum habent tales structurae, quales sunt ecl. V. 36 sq. IX. 2 sq., de quo loco vid. Ameis. Spic. p. 15 et Ladewig. in not. Atque etiam ad crisin exercendam haec quaestio affert quandam utilitatem. Etenim quod Reiskius olim id. IV. 2 ex ingenio scripsit αὐτός, id propter Vergilii imitationem ecl. III. 2 probaverunt Koehler. Not. et Emend. in Theocr. p. 19 et in altera edit. Valckenar. Contra facit non solum, quod, si αὐτός legisset Vergilius, non nomen Aegon iterasset, sed ipse scripsisset, verum etiam, quod noluit pronomine *id* uti. Inde concludere, poetam αὐτάς non reperisse, aequè inconsideratum est, ac si quis e v. 71 „cras altera mittam“ conjiciat, apud Theocritum id. III. 11 pronomen τοι removendum esse. Nam ibi Vergilius, quoniam secundae pronomine personae uti non poterat, ei ponere debebat, si accurate auctorem exprimere volebat. Neque ad scripturam οὗτος, quam aut praebent aut suadent nonnulli codices, aliquid auctoritatis e Vergilii versu erui potest, quoniam pronomen *hic* non vitavit poeta. Singularis quaedam repetitio est, quum idem vocabulum e chiasmo quodam in principio et in fine versus ponitur, quam a Theocrito id. I. 80 acceptam usurpavit Maro ecl. X. 39 et VII. 4, quamquam in iis versibus, quos hic spectavit (id. VIII. 3 sq.), ea vocula, quae in principio versus posita erat, post caes. buc. repetita est: item, quum vocabulum aliquod bis in priore, semel in posteriore versus parte legitur, cujus generis exempla quum apud Theocritum saepius reperiantur (cf. I. 113. II. 82. III. 42. VII. 77. XV. 123), bis inveni apud Vergilium ecl. VIII. 41. 44, qui vss. ex id. II. 82 (III. 42). VII. 77 adumbrati sunt: denique, si una vox sine intercapedine iteratur ἀναδιπλώσει. Versus initio id factum

est a Graeco poeta in nomine proprio I. 121. XI. 72, a Romano posterioris versus ratione habita ecl. II. 69, in vocabulo *φῆ* ab illo IV. 26. V. 86, in *vaí* IV. 54, ex quibus priores spectans hic duplicavit *heu* II. 58. III. 100: ante caesuram bucolicam a Theocrito VI. 8. VIII. 73 et ex imitatione a Vergilio V. 64. VI. 44 et III. 79. Nam hunc locum postremum nominavi, quoniam mihi de eo cum Ameisio agendum est. Putavit enim vir doctissimus Spic. p. 7, in verbis „vale, inquit“, repetitae vocis vale primam syllabam per totam thesin ita producendam esse, ut ultima in arsin sequentis pedis caderet, ubi per elisionem quantitas ejus supprimeretur. Contra mihi ex comparatione reliquorum et Theocriti et Vergilii versuum apparere videtur, vulgarem rationem, ex qua servatur etiam caesura bucolica, tenendam et amplexandam esse.

Jam transeundum est ad eas repetitiones, quae non unius versus finibus continentur. Interdum apud poetas antecedentis versus unum vel plura vocabula in principio alterius tertiive iterum ponuntur, quod factum apud Theocritum id. I. 142. 143. VII. 118. 119. XII. 1. 2. XXIV. 72. 73, apud Vergilium ecl. IV. 24. 25 (nam vera videtur Vossii distinctio). 60. 62. V. 10. 12. Deinde vox antecedentis versus ita in sequenti repetitur, ut nova aut verba aut sententiae addantur, quibus, cur iterata vox sit, appareat (cf. Theocr. id. I. 29. 30. 95. 96. 144. 145. VII. 57. 59. XIII. 43. 44. XXIV. 7. 8 cum ecl. I. 28. 30. VIII. 55. 56. IX. 27. 28 quibus similes sunt ecl. V. 65. 66, et Hermann. ad Bion. p. 50). Ab hac repetitione diversa est simplex anaphora, per quam duae sententiae vel sententiarum partes ab eodem vocabulo incipiunt (cf. id. VII. 149. 151 cum ecl. IV. 50. 52. V. 27. 29). Injuste facerem, Vergilio in his quoque rebus Theocriti imitationem attribuens, nisi eum in reliquis, quae similia sunt, illum secutum esse compertum haberem inprimisque poetam septimum idyllium in deliciis habuisse, in quo omnia harum repetitionum genera conjuncta reperiuntur, permulta ostenderent. In eclogae quidem IV vss. 60. 62 certasse videtur cum id. XXIV vss. 8 et 9. Singularis est ea repetitio, quum altera pars prioris versus in posteriorem adscisci-



tur, quod ad Theocriti exemplum id. IX. 1. 2 fecit Vergilius ecl. V. 51. 52, ut animadversum est a Briggsio, et similiter ecl. IX. 64. 65. Quam utilis sit hujus imitationis observatio facile demonstrari potest. Nam nisi ecl. V. vss. 51. 52 ipsa repugnarent, ex alio Vergilii loco (ecl. III. 58) non minus quam e schol. Genev. conicere posses, id. IX vss. 1. 2 in unum contrahendos esse, et ita Wordsworthius solo Vergiliano versu permotus revera faciendum putavit\*). Peculiare quiddam etiam ea repetitio habet, quum aliqua vox bis in priore, semel in posteriore versu collocatur. Cf. Theocr. I. 71. 72. 74. 75. II. 38. 39. XVIII. 10. 11. Hanc Vergilius semel adscivit ecl. X. 13. 14, spectans. id. I. 71. 72. Hoc si Ahrensius attendisset, ei conjecturae, quam ad v. 75 (74) protulit, aliam addere poterat. Mihi enim perquam verisimile videtur quod pro πολλαὶ δ' αὖ coniecit πολλαὶ οἱ. Hac admissa conjectura πολλαὶ vel πολλοὶ bis in priore, semel in posteriore versu collocatum est, οἱ initio prioris et posterioris. Eadem orationis elegantia nascetur in versibus, qui his respondent, 71 et 72, si scripseris v. 71 καὶ pro μάν. Atque suadere id videtur imitatio Vergiliana. Etenim hic prorsus eodem modo *etiam* bis v. 13, semel v. 14 posuit, praeterea *illum* semel v. 13 et 14. Magis etiam Vergiliani versus cum Theocriteis conspirarent, si e cod. Rom. Pier. scriberemus: „Illum etiam lauri, illum etc.“ At videtur poeta propter numerorum volubilitatem repetitionem vocabuli „etiam“ praetulisse. Cognatum est, quod Theocritus id. I. 77 sqq. ἦνδε et ἦνδον magna cum vi et suavitate per plures strophas repetiit, ad ejusque exemplum se composuit Vergilius ecl. X. 19 sqq. Theocrito in hoc orationis colore praevisse videtur Homerus Od. 2. 322 sq., Vergilio non Homerus, quod putavit Ernesti. l. l., sed Theocritus praeivit. Nec minus suavis est iteratio nominis proprii apud poetam Siculum III. 3. 4, id quod perspexit Romanus, qui hunc locum ecl. IX. 23. 24. imitatus est. Concedendum tamen est, hunc saepius quam illum huic orationis colori indulsisse, cujus rei exempla plurima vel ecloga

---

\*) Accedere aliam causam, in eo positam, quod Vergilius versus Theocriteos nonnunquam in brevius contraxit, hic indicasse satis erit.

prima praebet. Restat unum, quod memoratu dignum videtur. Apud Theocritum nonnunquam et in principio et in fine totius aut cantilenae aut versuum complexus eadem vocabula reperiuntur. Vide id. X. 26 et 36. VII. 52. 61. 83. 89, quibus locis cognati sunt id. II. 3. 10. VII. 148. 154. Hinc deprompta sunt quae similia leguntur apud poetam Romanum ecl. IX. 39. 43. 46. 50. VIII. 1. 5. 85. 89, quibuscum cf. ecl. I. 47. 52. Quare mirari satis non potui, quum Ahrensiū stropharum causa — aliam enim investigare nullam potui — id. VII. v. 61 ejecisse viderem. Poeta enim quoniam in hoc idyllio paullo altius assurrexit, diligentissime quae huc faciunt amplexanda et conservanda existimo. Idem autem idyllium poeta Romanus in tota poeseos indole pariter atque in colore singulis versibus addendo maximopere ante oculos habuit.

A variis his repetitionum generibus progrediendum est ad eam rem, quae intima cognatione cum iis continetur ac ne divelli quidem interdum potest, ad *versuum concinnitatem*. Atque, ut a levioribus incipiam, saepe singuli versus, quamquam non iteratur aliquod vocabulum, tamen sententia ipsa in duas partes aequales discernuntur. Cf. Theocr. IV. 55. VI. 45. X. 11. 13. XV. 144. XVI. 19. 20, quamquam VI. 45 et XV. 144 cognatae significationis vocabula posita sunt, (Mosch. I. 5. 12. 15) et Vergl. II. 18. 53. III. 58. IV. 57. X. 8. Deinde et Theocriti et imitatoris Vergilii poesis maxime eo conspicua est, quod non raro per plurium versuum complexionem ea invenitur orationis symmetria, ut ii sententiis et, quoad ejus fieri potest, etiam verbis aptissime inter se respondeant. Hanc partium aequabilitatem quum sedem tamquam propriam in cantu amoebaeo habere demonstraverit Zetzschius in dissertatione cui inscribitur: „Secundum amoebaeorum carminum leges denuo in examen vocatur locus Theocr. Id. VIII. 33—60“ p. 8 sqq., tum inveniri apud Theocritum etiam in aliis locis permultis, ea ostendunt, quae collegit Fritzsche l. l. p. 23\*). Itaque reliquum est, ut eos versus enumerem, in

---

\*) Quanta utilitas ex hujus legis observatione ad emendandos Theocriti versus redundet, documento est recentissima Ahrensii editio.

quibus eadem sententiarum verborumque aequabilitas apud Vergilium reperitur. Sunt autem exceptis carminibus

Vide id. I. 11 coll. Philol. I. 1. p. 407, id. V. 93 coll. p. 442, id. XVIII. 27. Quare veniam impetrabo a viro doctissimo, si ipse quoque eadem lege fretus meam qualemcunque opinionem de aliquot locis proposuero. Quod eiecit id. VIII v. 29, ejus rei causa, nisi egregie fallor, non alia est nisi ea, quae Briggsium permovit, ut  $\chi\omicron\iota \mu\acute{\epsilon}\nu \pi\alpha\iota\delta\epsilon\varsigma \tilde{\alpha}\rho \epsilon\tilde{\iota}\pi\omicron\nu$  conjiceret. Et recte profecto doctus ille Anglus contendit, caprarii voluntatem judicandi significandam fuisse antequam canere inciperent. Nec tamen ant illius conjectura aut versus omissio, quem consulto poeta antegresso accommodavit, probanda est, quum unius literae mutatione omnis difficultas sublata videatur. Ita enim verum scribendum puto:  $\chi\omicron\iota \mu\acute{\epsilon}\nu \pi\alpha\iota\delta\epsilon\varsigma \acute{\alpha}\epsilon\iota\delta\epsilon\nu$ ,  $\delta \delta' \alpha\lambda\pi\omicron\lambda\omicron\varsigma \tilde{\eta}\tilde{\nu}\epsilon\lambda\epsilon \chi\rho\acute{\iota}\nu\epsilon\iota\nu$ , i. e. „et pueri quidem ad canendum, caprarius vero ad judicandum paratus erat.“ Premenda enim est h. l. significatio verbi  $\tilde{\epsilon}\tilde{\nu}\epsilon\lambda\epsilon\nu$ , de qua cf. Buttm. Lexil. p. 26. Frank. ad Dem. Ol. I. 1. Passov. lex. s. v.  $\beta\omicron\upsilon\lambda\omicron\mu\alpha\iota$  et  $\tilde{\epsilon}\tilde{\nu}\epsilon\lambda\omega$ , e verbo  $\tilde{\eta}\tilde{\nu}\epsilon\lambda\epsilon$  autem ad prius membrum  $\tilde{\eta}\tilde{\nu}\epsilon\lambda\omicron\nu$  cogitatione addendum est. Ejusdem generis sunt id. XV. 144. XXII. 25. Verg. ecl. IX. 16. 35, fortasse etiam ecl. III, 33: „Est mihi namque domi pater, est injusta noverca.“ De quo versu explicans Ameisius Spic. p. 6 non recte mihi dixisse videtur, alterum *est* pro copula *et* positum esse. Nam iis certe locis, quos congessit Wagner. ad IV. 6 (Jahnii editione, quem laudavit ad VI. 61, mihi uti non licuit), semper in priore membro *et* aut *que* antecedit. At fateor, mihi illo loco nihil e sequenti membro repetendum, sed substantivum *pater* cum emphasi dictum videri, ita ut haec oriatur sententia: „*Ich habe noch einen Vater zu Hause, ich habe eine ungerechte Stiefmutter.*“ Cf. Ladewigum ad similem locum Georg. II. 473. Verum ut redeam ad rem propositam, ad idem genus pertinent non solum Tib. II. 6. 23. Hor. Carm. I. 11. 4, sed omnes ii loci, in quibus olim *que*, *ne*, *ve* transposita esse putaverunt, cujus generis multa exempla collegerunt Dissen. ad Tib. I. 1. 51, ex cujus adnot. sumpsimus duos postremos locos, et Dillenburger. ad Hor. C. II. 7. 25. Explicandi hi sunt e chiasmi quodam genere, cujus interiora membra e vocabulo bis posito constant. Accidit autem interdum, ut id vocabulum, quod bis ponendum erat, semel omitteretur, remaneret autem eadem verborum collocatio, ac si adesset revera chiasmus. Sic Tib. I. 1. dicendum erat „O quantum est auri percat potius potiusque smaragdi“, sed prius potius omissum. In locis a me allatis semper a priore membro vox repetenda abest; posse rem etiam inverti, ostendit Verg. ecl. VIII. 49, de quo infra dicendum erit, et de pedestri oratione Naegelsbach. Stil. p. 466 sq., videnturque etiam ii loci ex hac chiasmi ratione interpretandi esse, de quibus dixit Wagner. ad ecl. IV. 6, id quod suadet certe verborum collocatio. Graecos eodem dicendi genere usos esse quum ex iis appareat, quae supra posui, addere tamen licet Mosch.

amoebaeis ecl. III. 60—107. VII. 21—68 hi fere memorabiliore: I. 71—73. 80—82. II. 8—9. 63—65. III. 56. 57. V. 16—18. 32—34. 76—78. VI. 29—30. VIII. 29—30. 39—40. 69—71. 73—75. IX. 39—43. X. 29—30. Quinam ex his ad exemplum poetarum Graecorum compositi sint, suo loco demonstrabo; addo tamen unum, poetam interdum versuum architecturam magis quam sensum unius alteriusve loci imitatum esse. Cf. ecl. VI. 29. 30 cum Mosch. III. 89 sqq., ecl. V. 16 sq. cum Theocr. XII. 3 sqq., quorum locorum similitudinem perspexerat jam Ursinus. Non inutilem esse hanc concinnitatis observationem ad singulos Vergilii versus melius accuratiusque interpretandos, aliquoties docuerunt viri docti. Cf. inprimis Ladewig. ad III. 88—91, Ameis. Spic. p. 3 ad I. 54, cujus verbis nunc etiam Ladewigus in veram viam reductus est. Sed huic ipsi loco mihi in alia re succurrendum videtur. Etenim commotus v. 52 „hic inter flumina nota“, v. 54 „Hinc tibi, quae semper, vicino ab limite, saepes“ ita interpretor, ut ad verba „*quae semper*“ cogitatione vel *suasit* vel simpliciter *id fecit* addendum putem et versu sequenti participium *depasta* sensu temporis praesentis accipiam, de quo usu cf. Wagner. Quaest. XXIX. 3. Loci igitur hanc esse senten-

I. 12. Versus initium articulo, opinor, commotus, non recte interpretatus est Ameisius: „pulcre cincinnatum est illi caput“; nam *ἔχει* etiam ad antegressum membrum pertinet. Neque aliter intelligendus est v. 5 scriptura vulgaris τὸ δ', ὃ ξέει. — Id. IX. v. 13 etsi ad sensum satis facit, quod nunc e D. reposuit Ahrensius *ἀκούει*, flagitare tamen puto antistrophae versus ultimos (20. 21), ut genitivus *μύλων* a verbo *μελεδαίνω* pendeat. Quare conjecerim, poetam *ἀκούων* scripsisse; nam *ὁμοιοτέλετον* consulto illatum videri potest. — Id. X. v. 45 *εἴποι*, quod Ahrensius exaravit, verissimum est, sed mutanda interpunctio antegressi versus. Fac enim ferri posse optativum e praesenti tempore aptum, eae tamen strophae, quae leguntur vss. 46—49. 52—55, postulant, ut hi quoque versus in duo membra distraherentur, quod fit, si maiore discrimine ea verba, quae post v. *δράγματα* sequuntur, ab superioribus separamus et verba *μὴ παρών τις εἴποι* optantis esse statuimus. — Bion. III. 14 Ameisius versuum concinnitati consulens conjecerat *οὐ λῶ pro οὐλλον*, quod recte se habere crederem, si *ἦμεν*, non *φέρειν* sequeretur. Itaque aliam conjecturam proferre audeo. Videtur enim mihi versus sic scribendus esse: *οὐδ' αὖ χεῖμα φέρω· νιφετὸν κρυμῶς τε φοβεῦμαι*.

tiam existimo: „Hinc, vicino ab limite, consueta saepes, quum flores salicti Hyblaeis apibus depascetur, saepe tibi levi susurro somnum inire suadebit.“ Ad crisin factitandam ex eadem concinnitate permultum auxilii peti posse, uno exemplo demonstrare liceat. Ecl. VII. v. 65 paucis verbis mutatis iterum legitur v. 68. Idem curavit poeta in stropha, quae huic opposita est v. 61—64, ita quidem, ut in illa primum et quartum versum, in hac secundum et quartum inter se congruere vellet. Haec congruentia conjunctaque ei stropharum concinnitas magno-pere augebitur, si v. 64 auctore Servio, etiam Dresdensi, quem plurimis locis Wagnerus praestantissimum dicit, pro *corulos* posueris *Veneris*. Conferas modo inter se hos versus:

v. 62 Formosae myrtus Veneri, sua laurea Phoebō.

v. 64 Nec myrtus vincet Veneris, nec laurea Phoebi.

v. 65 Fraxinus in silvis pulcherrima, pinus in hortis.

v. 68 Fraxinus in silvis cedat tibi, pinus in hortis.

Librarii, quum viderent, *vincet* absolute dictum, interpretationis causa corulos suprascripserunt. Quod contra disputavit Wagnerus, ambitiosius Phyllidis et Veneris nomina inter se opponi, non ejusmodi est, quod vulgatam lectionem muniat. Nam praeterquam quod mire Phoebi nomen prolatum, non prolatum est Veneris, sive additur sive omittitur vox, ambitio, quae est in oppositione deae et puellae, una eademque manet.

Cognatum est genus aequabilitatis et concinnitatis, quum aut alter colloquentium alterius verba repetit aut idem antegresso versui sequentem accommodat. Prius legimus Theocr. id. VIII. 11 et 12.

χρήσδεις ὧν εἰσιδεῖν; χρήσδεις καταδεῖναι ἄεθλον;

χρήσδω τοῦτ' εἰσιδεῖν, χρήσδω καταδεῖναι ἄεθλον.

et vss. 18. 19. 21. 22. Ex his quum valde similes sint v. 18 et 21, tum iisdem verbis compositi sunt v. 19 et 22 λευκὸν καρὸν ἔχουσιν, ἴσον κάτῳ, ἴσον ἄνωθεν. Hos quatuor versus ante oculos habuit Vergilius ecl. III. 36. 37. 43. 44. 47. Nam sicuti v. 36. 37 et 44 similem continent sententiam, ita v. 47 integra verba versus 43 „necdum illis labra admovi, sed condita servo“ repetita sunt. Quare non recte egit Arensius, quod Theocriti solos vss. 18 et 21 cum

Vergilii vss. 36. 37. 44 contulit. Nam ut versus reliquos comparare omitteret, non potuit eum commovere, quod sententia versuum 43 et 47 ex id. I. 59 deprompta est. Apparet potius ex his maxime versibus, C. F. Hermannum de Daphn. Theocr. p. 11 satis incaute Theocriti vss. 21 et 22 sublato voluisse. Legerat eos Vergilius et ante eum nihil intrusum est, nisi quae ab Artemidoro, ad quem omnia nos revocant, ita cum Theocriteis conjuncta sunt, ut ἀποσπάσματα poetae in unius carminis ambitum concinnaret\*). Alterum concinnitatis genus, de quo dixi, invenitur e. g. id. XI. v. 22 et 23:

\*) Magnam laetitiam percepi, quum ex Ahrensii editione viderem, virum doctissimum similem sententiam de id. VIII et IX tenere, atque ego jam diu foveram. Nam idyllii octavi mihi praeter carmen elegiacum, quod juvenis poeta ad exemplum dramatis Sosithei (cf. arg. et Hauler. p. 44 et 52), in versuum genere secutus Philetam et Hermesianactem (cf. Bach. Quaest. el. spec. p. 15 sq.), composuisse videtur, et v. 63—70, 72—79 nihil genuinum videtur, quamquam de vss. 80—92 certius quidquam statuere nolim propterea, quod ipse Ahrensius nunc forma ἀνάχτο v. 90 non ita laesus videtur, ut Phil. l. l. p. 413. Ut initium pro suppositicio (maxima certe ex parte) habeam, mihi non solum insolens hiatus ante vocem ἀνός v. 14 et 15, quem grammaticorum doctrinam redolere puto, sed etiam illud suadere videtur, quod poeta sine ulla arte v. 5 et 8 Menalcae et Daphnidis orationi praefatus in versibus subjectis id facere omisit. Nam si quid video, potius v. 5 dicendum erat: Hi, quum alter alterum conspexisset, talia inter se confabulati sunt“, deinde nulla amplius poetae verba interponenda. Eadem orationis conversio quamquam invenitur id. XXII. 53 sqq., tamen ex carmine epico de bucolico non judicaverim. Accedit, quod poeta ea carmina bucolica, quae non tota mimica sunt, semper amicorum alicui dedicavit. Cf. id. VI. XI. In id. VII id facere non poterat, quod hoc carmen multis simul dicatum est. Quare per se non ineptum erat, quod Piersonus Veris. p. 46 putavit, v. 2 Διόφαντε pro ὡς φαντί scribendum esse. Videturque poeta in omnibus omnino carminibus hanc rationem tenuisse, si vera est de reliquis idylliis Ahrensii sententia. Excipienda enim esse id. XVI et XVII satis apparet, et de id. XVIII mihi recte Fritzsche p. 42 disputasse videtur carminis initium deesse existimans. Cf. tamen de eodem idyllio Hauler. p. 39. Ut autem redeam ad id. VIII, v. 72—79 praeter quatuor priores adeo nullo sententiarum vinculo inter se cohaerent, ut credere vix possim, hac ratione eos a poeta in publicum emissos esse. Videntur potius carminis amoebaei initium fuisse, cujus singulas strophas Theocritus e binis versibus

φοιτῆς δ' αὐτῷ οὐτῶς, ὅκκα γλυκὺς ὕπνος ἔχη με,  
οἴχη δ' εὐδὺς τοῖς, ὅκκα γλυκὺς ὕπνος ἀνῆ με,

et id. XXII. 25 et 26:

Κάστορος ἢ πρώτου Πολυδεύκεος ἄρξομ' αἰδεῖν;  
ἀμφοτέρω ὑμνέων, Πολυδεύκεα πρώτον αἰέσω.

Cum his cf. Verg. ecl. IV. 58 et 59:

Pan etiam, Arcadia mecum si iudice certet,  
Pan etiam Arcadia dicat se iudice victum.

De hoc loco disputans Macrobius Saturn. V. 14 6 ed. Jan., ab Homero, cujus contulit II. χ. 127, Vergilium repetitionem sumpsisse putavit. Falsum esse grammaticum, non solum versus Theocritei ostendunt, sed comprobatur etiam, quod apud Homerum prorsus alia ratione ultima pars prioris versus eadem est ac prima posterioris, cujus epanalepseos genus reperis praeterea v. 371. ψ. 641. Rectius cum versu Homero comparasset ecl. V. 51. 52 et IX. 64. 65, quamquam ne hic quidem poeta potius Homerum quam Theocritum vel quem putavit Theocritum secutus est.

Hactenus semper laudabili cum cura et diligentia poetam Romanum in versibus ad concinnitatis legem pangendis vocumque iteratione ornandis cum Siculo contendisse existimo. Addi haec duo possunt. Nimirum ut fructus lectionis carminum Theocriteorum etiam in ceteris poetae operibus conspicuus est (id a consilio meo alienum hoc loco non persequor accuratius, sed laudare satis habeo Georg. IV. 525 sqq.), ita imitatoris vitia auctoris exemplum exaggerantis non pauca inveniuntur. Atque hoc reputare debuerunt et ii, qui ecl. X v. 76, quum abesse a nonnullis codicibus viderent, sublaturum volebant, et G. Hermannus, qui ad Bion. p. 47 propter rationem strophicam ecl. VIII

---

constare voluit. Sunt autem unius tantum pastoris neque ad finem perducti. Quominus poeta et huius cantum perficeret et versus alterius, qui responderent, adderet, morte, opinor, impeditus est. Artemidorus, ut eos invenerat, cum vss. 63—70 conjunxit, qui et ipsi, quamquam absolutum canticum exhibent, tamen eo consilio a poeta facti videntur, ut et alterum canticum et pastorum colloquium adderet. Haec si vera sunt, videmus, qua ratione poeta in elaborandis carminibus amoebaeis versatus sit. De carmine nono, cujus omnes tres strophae mihi a poeta profectae videntur, infra dicam.

vss. 47—50 in tres contraxit. Ex his v. 49 mihi ita explicandus videtur, ut ex chiasmi lege vocula „magis“ in fine prioris membri collocata repetenda sit in principio posterioris (Crudelis mater magis est an magis improbus ille puer?), ita ut cum Wagnero sententiam huc redire arbitrer: postquam pastor commemoravit, ab Amore Medeam adeo ad liberos trucidandos impulsam esse, subito hujus facinoris memoria ita commovetur, ut in verba erumpat „Crudelis tu quoque mater“. Dubitans deinde, an majore etiam nota digna sit Medea, quaerit, utrum in matrem magis crudelitatis an in puerum magis improbitatis opprobrium conveniat. Denique rem ita absolvit, ut graviolem improbitatis notam puero, leviolem crudelitatis matri attribuat. Ita si versus explicaverimus, neque erit, opinor, cur cum Hermanno dicamus, v. 48 non *quoque*, sed *quidem* dicendum fuisse, quae particula in commotam orationem minime apta est, neque probandum esse putabimus, quod idem adjecit „Ecquis dubitare potest an crudelior sit mater, quae liberos suos interficiat?“ quoniam non simpliciter de crudelitate agitur, sed hoc maxime efferendum, comparisonem inter matris crudelitatem et pueri improbitatem institui. In quo tamen jure haerere possis, est quaesita illa verborum repetitio, qua efficitur, ut frigidior sit oratio. Frigida vero etiam tum manebit, quum auctore Hermanno vss. 48 et 49 ita contraxerimus:

commaculare manus: puer, ah puer improbus ille:

improbus ille puer, crudelis tu quoque mater.

Nam matris crudelitas non „leviter tangenda“, sed omnino non commemoranda erat. Quare mihi persuasissimum est, virum egregium, nisi stropharum concinnitatem restituere voluisset, aut omnia aut nihil reprehensurum fuisse. Cf. praeterea, quae Vossius disseruit de vss. 22 sqq. quaeque alio tempore ipse dicam de ecl. X vss. 15 sqq. 37 sqq.

*Alliterationes*, quas hic illic apud Theocritum inveniri demonstraverunt Fritzsche. l. l. p. 23 et Notter. l. l. p. 5, quum non tam crebrae sint, ut legentibus ultro se offerant, non videtur Vergilius ab eo sumpsisse ecl. III. 109. 110 (amores-amaros), ubi cf. Wagner., et ecl. VII, 5 (pares-parati). Neque ecl. VIII. v. 80 (durescit-liquescit) hanc vim in me



habet, ut id. I. v. 96 contra Ahrensium γελάοισα retinendum censeam. Nam hoc ὁμοιοτέλευτον non, quemadmodum putavit Fritzschi p. 23, ex Theocriti, sed e carminum magistorum imitatione expressum esse existimo.

*Apostrophes* usum Vergilius ecl. VI. 47 sqq., ut jam Ursinus animadvertit, lectioni id. VII. 83 sqq. debere videtur, quoniam ex hoc idyllio permulta petivit. Sed amplificavit quae apud Theocritum leguntur ita, ut nova orationis conversione v. 55 Pasiphaen ipsam exclamantem induceret.

A nullo denique animadversum est, poetam eam orationis elegantiam, quae est ecl. IX. 19 sq., Moschi id. III. 82 sq. debere. Nam utroque loco, quae a Bione et Vergilio alias descripta sunt, ita proferuntur, quasi fecerint ea poetae, non quasi cantu celebraverint. Quod Vergilius eandem figuram in eclogae sextae, quam post nonam conscripsit, v. 46 et 62 sq. liberiore quodam modo usurpavit, non prohibet, quominus eam primam originem a Graeco poeta traxisse putes. Non ignoro, Ahrensium hoc idyllium a Moscho abjudicasse. Quare etsi scire non possum, cui tempori illud tribuat, tamen fortasse et haec et reliquae imitationes, quas hic afferre non attinet, ad carminis aetatem definiendam non inutiles erunt.

## Caput quartum.

### De re metrica.

Vergilium numeris apte eligendis egregiam operam dedisse, res est notissima. Itaque mirum esse non potest, quod aut hac in re poetam Siculum cum prospero successu aemulatus est (cf. id. I. 8 cum ecl. V. 47. id. III. 2—5 cum ecl. IX. 23—25), aut, ubi non poterat verba ejus imitari, metro rem adjuvit (cf. id. V. 7 cum ecl. III. 27. id. V. 89 cum ecl. III. 65. id. VII. 48 cum ecl. IX. 36, ex quibus quos postremo loco laudavi versus propterea memorabiles sunt, quod, quum poeta Graecus verbo κοκκίζειν et spondeis

vani irritique laboris imaginem pulcherrimam ante oculos nostros ponat, Romanus praeter sonum, de quo jam dixi, dactylorum frequentia malam sedulitatem optime significat). Atque haec quidem brevius a me tractari poterant; uberius dicendum est de *caesura bucolica*, quam a Theocrito acceptam persaepe usurpavit poeta Romanus, quandoquidem quae de ea disputaverunt Valckenarius in ep. ad Roever. p. XV sq. et Worthsworthius in praefatione, non sufficere perspexi. E veteribus grammaticis, qui de caesura bucolica commemoraverunt, primo loco excitandus est Terentianus Maurus cujus vss. 2123—2134 ed. Lachmann. haec sunt verba:

„Pastorale volet cum quis componere carmen,  
tetrametrum absolvat, cui portio demitur ima,  
quae solido a verbo poterit connectere versum:  
bucolicon siquidem talem voluere vocari.  
plurimus hoc pollet Siculae telluris alumnus.  
ne Graecum inmittam versum, mutabo Latinum,  
*Dulce tibi pinus submurmurat, en tibi, pastor,*  
*proxima fonticulis: et tu quoque dulcia pangs,*  
jugiter hanc legem toto prope carmine servat,  
noster rarus eo pastor Maro, sed tamen inquit  
*dic mihi, Damoeta, cujum pecus? an Meliboei?*  
*non, verum Aegonis: nuper mihi tradidit Aegon.*“

Terentianum tetrametrum eum significare, cujus ultimus pes dactylus sit, testantur praeter conversos Theocriti et allatos Vergilii Pomponii Secundi versus, quos in proximis subjicit v. 2138 sqq. Dactylum in quarta versus regione partem orationis finire debere, si quidem revera metrum bucolicon nominandum sit, affirmant etiam Diomedes p. 463 ed. Gaisf. „Bucolici sunt, quotiens in quarta regione dactylus finiens partem orationis invenitur“: Servius Honoratus *centim.* p. 369 „Bucolicum constat hexametro catalectico, ita ut quartus dactylus partem terminet orationis, ut est hoc

Rustica silvestres resonat bene fistula cantus.“

denique Marius Plotius in operosa et inutili quaestione de singulis pedibus bucolici hexametri p. 254 sq. ed. Gaisf. et bucolici tetrametri p. 261 sqq. Nam dicit p. 254. §. 26 „Nam de quarto nulla quaestio est quod dactylus sit.“ p. 261. §. 53 „Nam quartus semper dactylus sit necesse est in bucolico hexametro.“ p. 262. §. 55. „Sic ergo bucolicum quidem

tetrametrum octo schemata habet, quarto pede semper dactylus.“ Praestare versum, cujus quartus pes partem orationis finiens dactylus sit, commemorat Donatus vit. XXV. 104: „Nam cum tribus probetur metrum, caesura, scansione, modificatione, non erit bucolicus versus, nisi in quo et pes primus partem orationis absolverit et tertius trochaeus fuerit et caesura, et *quartus pes dactylus magis quam spondeus partem orationis terminaverit*, quintus et sextus pes ex integris dictionibus fuerit: quod *Virgilius, a Theocrito saepe servatum, victus operis difficultate neglexit*.“ Neque aliter Servius in praef. ad ecl. p. 95 ed. Lion. „Adhibetur autem (character humilis) ad carmen bucolicum, quod debet quarto pede terminare partem orationis. Qui pes si sit dactylus, meliorem efficit versum, ut: Nos patriae fines et dulcia. Primus etiam pes secundum Donatum dactylus debet esse et terminare partem orationis, ut: Tityre. Quam legem Theocritus vehementer observat, Virgilius non adeo. Ille enim in paucis versibus ab ista ratione deviavit, hic eam in paucis secutus est. Terentianus cum de hoc metro diceret: Plurimus hoc pollet Siculae telluris alumnus, Noster rarus eo pastor Maro.“ Quae deinceps sequuntur, ad aliam rem pertinent ideoque prorsus sejungenda sunt, neque dubium esse potest, quin post verba „pastor Maro“ apodosis interciderit. Dactyli mentionem omittit Probus p. 348 ed. Lion. „Carmen bucolicon legem habere videtur, uti versus ejus quartus pes partem orationis finiat, quod Theocritus custodivit. Nam Virgilius in primo versu attendit (significat verba *recubans sub tegmine fagi*), sequentem protinus alia ratione fecit (*meditaris avena*)“: et Atilius Fortunatianus p. 349 ed. Gaisf. „Bucolicus similiter ab heroo venit. Heroos, si quarto pede partem orationis finiat, bucolicum facit, ut

Ab Jove principium, Musae, Jovis omnia plena.

Theocritus hanc legem custodivit, Virgilius comtempnit.“ Quamquam e versu allato conjeceris, hunc quoque pedem quartum dactylum esse voluisse. Id dicere non licet de Mario Victorino. Etsi enim p. 157 ed. Gaisf. haec scripsit „Ergo tetrameter sive versus sive hexametri heroi tome tertia: nam post duas incisiones, ejus proprias, i. e. penthemimeren

et hephthemimeren, tertia est ea, quam βουκολιχὴν appellant; quae quarto pede semper sensum claudente distinguitur ideoque a Graecis sic appellatur, quod bucolici carminis haec lex sit, ut versus ejus ea observatione formetur, ut ante duos ultimos quarto pede terminet aut partem orationis aut sensum, quam legem per omne opus sui carminis Theocritus Syracusanus, exceptis tribus aut quattuor ferme versibus (laudat id. I. v. 28 et 39, sed falsum esse grammaticum, jam Camerarius vidit, cujus verba attulit Gaisford.) custodit. At noster Maro haud ita, quod utrum *scrupulosum an supervacuum duxerit, ipse norit*, quod Graeci sanxerunt, ne pars orationis aut sermo integer ullo verbi discidio interveniente sejungeretur, tamquam

Forte sub arguta consederat

tetrametrus. Sequitur

ilice Daphnis.

Hoc comma dimetrum epicum nuncuparunt. Item

O crudelis Alexi, nihil mea

dehinc

carmina curas.

Unde intelligi datur, bucolicum carmen seu metrum ex tetrametri (conjectura addendum videtur *et dimetri*) copulatione subsistere“. Etsi, inquam, ex his concludas, hunc et ipsum de quarto dactylo cogitasse, tamen aliud suadent quae attulit p. 87 sq. „Nonnunquam autem evenit, ut in eodem versu plures incisiones, i. e. penthemimeren et hephthemimeren et eam quae quarta caesura partem orationis terminat (quam bucolicon Graeci dicunt) reperiamus, ut:

Arma virumque cano, Trojae qui primus ab oris,

Nam *jae qui* pes in versu quartus eam divisionem explicat, quam bucolicon vocari dictum est, subque pedum percussione sensus impletur. Nam bucolici metri haec lex est, quam per omne opus sui carminis Theocritus Syracusanus observat, exceptis paucis versibus, de quibus in processu dicemus.“ Non poterat grammaticus Aeneidis versum excitare, nisi putasset, salvo metro bucolico quartum pedem etiam spondeum esse posse.

Haec omnia non propterea exhibui, quo demonstrarem, quid de caesura bucolica in Theocriti carminibus iudicandum esset, sed ut appareret, eos grammaticos, qui quartum pedem etiam spondeum esse posse putaverunt, Vergilii magis quam Theocriti opus spectavisse. Nam etsi Wordsworthio non concedo, qui id. VIII. 13 et X. 38 caesurae gratia mutare, id. VIII. 31 et 32 ejicere, id. XI e carminum bucolicorum numero excludere voluit, quoniam idylli VIII principium maximam partem ab Artemidoro profectum, in idyllis X et XI ad significandum rudius et incultius eorum qui producuntur ingenium et caesuram saepius neglectam et spondeum immissum censeo, tamen ex his paucis carminum vere bucolicorum locis, ubi spondeus in quarta sede reperitur, grammatici vix poterant concludere, promiscue et dactylum et spondeum poni. E contrario propterea, quod omnes quos attulerunt versus a solo fere Vergilio petiverunt, quodque hic ipse pro dactylo saepissime spondeo usus est, manifestum esse puto, illos de spondeo tantummodo poetam Romanum ante oculos habuisse. Ac profecto Maro in eclogis tam saepe intulit in pedem quartum spondeum orationis partem terminantem, ut omnes locos enumerare inutile et supervacaneum habeam. Causas, cur idem raro dactylo eadem ratione in quarta versus sede usus esset, veteres grammatici has attulerunt: poetam aut sprevisse eum dixerunt aut operis difficultate victum putaverunt. Meam sententiam si quaesiveris, mihi, si univsum Maronis opus spectamus, prima causa in eo posita videtur, quod, quum Theocritus viva popularium carmina ante oculos habuisset, quae quotidie audire poterat quaeque semper ei nova incitamenta suggerebant, ipsi talis adhortatio defuit. Sin vero singulos versus spectamus, quos e Graeco transtulit, ita statuendum puto, eum magna ex parte rei insolentia a caesura imitanda prohibitum esse, id quod apparebit clarissime ex imitationum conspectu, quem extremo hoc opere exhibebo, nihilominus tamen, ubi usurpavit caesuram, id praecipue Theocriti ejusque aemulorum versibus permotum fecisse. Id intelligetur, ubi omnes eos locos excitavero, in quibus ita factum esse, adjecti Graeci versus ostendent, quamquam mihi fatendum est, de

nonnullis accuratiore disputatione opus esse, quam nunc in aliud tempus rejicere libelli hujus angustiis coactus sum. Sunt autem omissis illis, in quibus aut post caesuram bucolicam vocabulum repetiit aut ante eam vocis ἀναδ' ἔλ' ὠσιν adhibuit, fere hi: *Ecl. I. 8* (coll. Theocr. ep. I. 5). *Ecl. II. 6* (Theocr. id. III. 6). 18 (XXIII. 28. 29). 26 (VI. 35). 28. 31 (XI. 63—66, quamquam ibi quoque v. 63 et 66 non usurpata est caesura). 37. 38 (IV. 30. I. 126—128. I. 3, quamquam deest caesura a v. 126, quam v. 128 restituit Ahrens.). 40. 42. 43 44 (III. 34—36. XI. 40. 41. deest tamen a v. 41). 45. 46 (XI. 56—59, etsi caret ea v. 57, qui tamen dactylus est). 56 (XX. 3 sq.). 58 (III. 24). 63. 65 (X. 30. 31, e quibus posterior tantum habet illam caesuram). 68 (II. 40. v. 38 et 39 vacant caesura aequae atque apud Verg. 66 et 67). *Ecl. III. 1. 2. 3. 4* (IV. 1—3). 11 (v. 112. 113. cf. nomen Miconis). 23. 24 (XV. 91). 25 (V. 5. 6. deest caesura a v. 7 non sine idonea causa, et id ipsum factum a Vergilio v. 26 et 27, aptissima de causa v. 27). 30 (I. 25sq.). 34 (VIII. 16). 36. 37, quibus fortasse etiam v. 38 adnumerare licet, quia praepositio *super* recitando facile a verbo dirimitur (I. 27. V. 104. 105). 44 (VIII. 21. 22). 50 (V. 62 sqq.). 52 (V. 78). 60. 61 (V. 80. 81). 62 (V. 82. 83). 65 (V. 88. 89). 66 (V. 90. 91). 68 (V. 96. deest a v. 97, ut apud Verg. a v. 69). 83 (V. 134. 135). 86 (VIII. 35. 39. significo repetitum „pascite“ v. 85 et 86, e quo lectioni ποιμαίνετε v. 39 aliquid auctoritatis accedit). 89 (V. 125). 96 (IV. 44). 100 (IV. 20. 23. 24). 103 (VI. 39). *Ecl. IV. 52* (VII. 149. 151. significo anaphoram). 54 (VII. 86—89. X. 32. 33 propter structuram). *Ecl. V. 2* (VIII. 3. 4). 6 (I. 21)\*). 8 (IV. 9. non usus est Theocritus caesura v. 8, neque Vergilius v. 9). 18 (V. 92—95, e quibus tamen caret caesura v. 93). 25. 26 (IV. 14. Mosch. III. 23. 24. v. 24 caret cae-

\*) Tamquam praeteriens commemoro, Vergilium in hac quidem ecloga loci laudationem v. 3 et 5. 6 sumpsisse ex id. I. 12. 13 et 21 sq. Id ex totius eclogae ratione, quae magis interdum quam singula verba spectanda sunt, tam manifestum fit, ut vel hac de causa Theocriti v. 13 servandus sit. Quod Ahrensius Phil. I. I. p. 407 contra Hermannum dixit, etiam id. V. 44 non legi uberiores loci descriptionem, id nihil valere puto propterea, quod Laco jam laudaverat locum v. 31 sqq.

surā, non tamen dactylo). 36 (Mosch. III. 31—34). 49 (I. 3). 50 (VII. 50. 51. posterior caesura, non dactylo vacat). 61 (I. 50. dico scripturam τεύχουσα, quae hinc et Alciph. III. 21, quem locum laudavit Toupius Addend., defendenda est). 67. 68 (V. 54. 59. v. 53 et 58 e concinnitatis lege omissa est caesura). 73 (VII. 71. 72). 85 (VII. 43). 87 (cf. ecl. III. 1). *Ecl.* VI. 30 (Mosch. III. 89—91. v. 89 caesura caret). *Ecl.* VII. 1. 4 (VI. 1—4, e quibus caret caesura v. 3. VIII. 3. 4). 7 (VIII. 49). 8. 9 (V. 66. 67). 18 (VIII. 31. hunc versum jam Vergiliū legisse, certum est). 21. 22 (VIII. 33. 35. 37. 39). 29. 35. 36 (X. 32—35, e quibus v. 35 caesura caret, nec tamen dactylo. ep. IV. 15. 17 propter duplex votum\*). 37 (XI. 19—21. 19 et 20 certe dactylos habent). 46. 47 (VIII. 37. 39). 54. 57. 59 (VIII. 45. 47). 65. 68 (XVIII. 29. 30). *Ecl.* VIII. 7. 8. 9. 10. 11. 12. 13 (I. 121. 122. VII. 63 sqq. XVII. 1. omnes hi versus Vergilio in caesura septies, quod notatu maxime dignum est, usurpatā ante oculos versati sunt, quamquam fatendum est, eam de industria hic admissam esse, ut alacritas orationi adderetur). 41 (II. 82. III. 42). 52. 58 (I. 132—134. carent ea v. 130 et 131, ut apud Verg. 53—56). 62. 63 (X. 24. 25). 67 (II ab initio). 89 (II. 43—51, e quibus carent caesura 46 et 51; nam etsi expressit Varium de morte secundum Macrobi. Saturn. VI. 2. 20, tamen sententiarum conformatio sumpta a Theocrito). 91. 92 (II. 53. 59. 60). 95 (II. 161—162, e quibus vacat incisione v. 162). 102 (XXIV. 92—95. v. 93 certe dactylo exstructus est). *Ecl.* IX. 1 (VII. 21—25. v. 21. 22 carent caesura, non dactylo). 18 (Mosch. III. 11. 12. 65. 66). 23. 24. 25 (Theocr. III. 3—5). 33. 34. 36 (VII. 37—41). 41. 43 (VII. 7—9. cf. v. 8 ὕφαινον, quod coniecit Heinsius, cum v. 42 „texunt“. XI. 43). 57 (VII. 57. 58). 59. 60 (VII. 10. 11). 64 (VII. 36\*\*). *Ecl.* X. 18 (XX. 33). 22. 23 (I. 82. 83). 33. 34 (XII. 10—21. ibi in plurimis certe versi-

\*) Versus Theocriti vel quisquis auctor est epigrammatis 15 et 16 olim ita scribendos esse putaveram ἦν δ' ἄρα νέυση τοῦδε τυχεῖν, ἐξέλω τρισσὰ δύνη τελέσαι ἄρα νέυση nunc enotavit Ahrensius e codd. B. D.

\*\*) E futuro ὄνασεῖ scripturae *laedet* apud Vergiliū magna quaedam probabilitas nascitur.

bus quartus pes aut vocem terminat aut dactylus est). 42 (V. 31—34). 67 (VII. 111—114. v. 113 incisione caret, non tamen dactylo). Efficiunt hi versus, si addideris III. 38, numerum CXX, si exceperis, CXIX. His addendi sunt, de quibus supra dixi, utpote omnes ex Graecorum imitatione tornati, I. 75. II. 15. III. 79. V. 46. 64. VI. 25. 44. 80. VII. 44. VIII (omitto nunc v. 7). 33. IX. 17. X. 11. 21. 77 et versus intercalares eclogae octavae, numero XIX. quorum versuum est summa XXXIII. Apparet autem, poetam in iis eclogis, in quibus Theocritea inprimis imitatus est, ob eos versus, quos sumpsit a Theocrito, etiam reliquos, si fieri poterat, caesura bucolica ornavisse. In hunc numerum refero qui restant versus bucolici generis eclogarum II. III. V. VII. VIII. IX. X, maximeque id cadit in strophas et antistrophas ecl. III. 60—107. VII. 21—68. Sunt autem hi: *Ecl. II.* 53. *Ecl. III.* 75. 77. 90. 93. 94. 99. 104. 107. *Ecl. V.* 31. 40. 41. 42 (si versus huc referri potest propter praepositionem *super*). 58. *Ecl. VII.* 14. 17. 26. 28. 52. 61. 62. *Ecl. VIII.* 17. 20. 29. 30. 49. 75. 106. 108. *Ecl. IX.* 2. 6. 15. 16. 21. 27. 49. 50. 51. 53. 55. 63. 67. *Ecl. X.* 2. 25. 31. 46. 49 (hi duo tamen Galli sunt)\*). 50. 73. Efficiunt hi versus numerum XLIX vel, si detraxeris ecl. V. 42. X. 46. 49, XLVI. Ex his qui notentur inprimis digni sunt ecl. VII v. 20 et 52. Nam priore loco adumbravit poeta Theocr. id. IX v. 14, qui caesura bucolica caret, posteriore IX v. 13 et 21, qui et ipsi ea vacant. Sed utroque loco id e versibus juxta positis explicandum est. Jam vero, si numeros computes, hucusque versuum bucolicorum summa est CCII vel CXCVIII. Restant ecl. I. 3. 4. 7. 11. 14 (v. 18 utpote suppo-

\*) Apud Servium ad v. 46 haec verba leguntur: „hi autem omnes versus Galli sunt, de ipsius translatis carminibus.“ Non potest dubium esse, quin vss. 44—49 significaverit. Nam comparatio cum Theocrito v. 50 sq. a solo Vergilio profecta sit necesse est (cf. ecl. VI. 64 sqq.). Quod si tenemus, mirum minime videtur, quod v. 44 ab allegoria ad veram vitam transit, de qua re multis disputavit Wagnerus in nota critica. Id unum adjicere licet, particulam *nunc*, de qua cf. Wagnerum, fortasse alio modo a Gallo usurpatam fuisse. Mutavisse talia Maronem, ostendit ecl. VIII. 88 collato Varii loco Macrob. VI. 2. 20. Nam apud Varium vox „perdita“ ad ea, quae sequuntur, referenda est, apud Vergilium ad ea, quae antecedunt.



siticiū omitto). 24. 25. 27. 36. 38. 45. 47. 48. 58. 60. 71, quamquam alio tempore demonstrare studebo, poetam in adornandis nonnullis eclogae partibus magis quam putatum est idyllium VII ante oculos habuisse. *Ecl.* IV. 20. 34. 35. 39. 41. 49, etsi v. 49 tales Theocriti versus, quales sunt I. 38. VII. 48, meminisse poterat; v. 34 eum similes auctoris versus memoria tenuisse, ex iis, quae de vocabulis post caesuram legitimam repetitis disputavi, certissimum est. *Ecl.* VI. 3. 7. 9. 21. 23. 35. 49. 55. 58. 65. 71. 75. Sunt hi numero XXXIV. Itaque exceptis Galli versibus habemus bucolicos Vergilii CCXXXIV, e quorum numero non aegre fero si etiam *ecl.* III. 38. V. 42 ejiciendos putes, et habet quidem ecloga prima de versibus LXXXIII bucolicos XVIII, secunda de versibus LXXIII bucolicos XX, tertia de CXI bucolicos XXXVII vel XXXVI, quarta de LXIII bucolicos VIII, quinta de XC bucolicos XXI vel XX, sexta de LXXXVI bucolicos XVI, septima de LXX bucolicos XXVII, octava de CLXIX bucolicos XLIV, nona de LXVII bucolicos XXVIII, decima de LXXVII bucolicos XVII vel XV. Quod in ecloga quarta tam pauci versus metri bucolici reperiuntur, documento est, me recte disputasse, poetam tum maxime, quum Theocriti vel reliquorum versus spectaret, hoc metro usum esse. In ecloga sexta paulo plures ea ratione conformavit, in quibus non aemulatus est poetam Syracusanum, quia poetarum epicorum more tertia hac caesura orationi vim et alacritatem tribuere voluit. Cf. v. 55 et 48 coll. *ecl.* VIII, 7—13 et Hermann. Elem. doctr. metr. p. 339. Epit. p. 120 ed. II.

Ne tamen fructu suo careat haec disputatio, ea etiam rei criticae succurratur. Quemadmodum enim *ecl.* VII. v. 14, ubi Wagnerus e fragmento Moreti *neque* scripsit, *ecl.* IX. 6, ubi idem post Vossium ex optimis codicibus pro *nec bene vertat* reposuit *nec vertat bene*, aliquid certe caesurae bucolicaetribuendum erat, ita *ecl.* IX. v. 35, qui interjectus est tribus versibus bucolicis, quibuscum et ipse a Theocrito depromptus est, eadem caesura donandus videtur. Restituendum videlicet *neque* pro *nec* existimo, quod ex uno codice Moretano apud Wagnerum enotatum est. Nam etsi diligenter disputata sunt, quae dixit vir doctissi-

mus Quaest. XXXII, tamen haec peculiaris causa minime negligenda est. Accedit, quod poeta etiam in ceteris hujus eclogae versibus una cum verbis caesuram quoque ab auctore suo petivit. Praeterea vehementer gauderem, si ecl. VII. 64 propter responsionem, de qua antea dixi, e codicibus *neque* restitui posset. At donec accuratior facta erit librorum collatio, nihil hic quidem mutare ausim. Alius planeque diversus est ille fructus, quem ex hac nostra quaestione in judicandos singulos Graecorum versus redundare existimo. Videor enim mihi animadvertisse, poetam Romanum, quo usurpare posset caesuram, interdum a verbis Graecis paululum declinavisse. Id vero quantae utilitatis sit ad cohibendam pravarum conjecturarum audaciam, e duobus exemplis clarissime elucere puto. Unum offert ecl. V v. 85: „Hac te nos fragili donabimus ante cicuta“ aperte adumbratus ex id. VII v. 43 τάν τοι, ἔφα, κορύνναν δωρύττομαι. Poterat poeta salva verborum sententia et praesenti uti et futuro tempore; hoc praetulit, ut caesuram bucolicam admitteret. Quare etiam hac a parte satis munita est forma δωρύττομαι, quae nunc pro δωρήσομαι propter Gregorii Corinthii et codicum k. Q. auctoritatem in editionibus legitur. Aliud exemplum praebet ecl. X v. 18: „Et formosus ovis ad flumina pavit Adonis“. Hic versus etsi e pluribus locis compositus est — nam ut Adonidem poeta *oves pascentem* induceret, motus est id. I v. 108, quod de poeta, qui quidquid potuit a Theocrito assumpsit, dubitare non debuit Hauptius Mus. Rhen. Nov. IV. p. 262, ut *pulchrum* vocaret, non voce ὠραίος, quae ibidem legitur, sed alio sensu, de quo cf. Ameis. Adn. p. 6, verum, si omnino in eo epitheto aliquem Graecum locum spectavit, Bionis idyllio primo — sententia tamen deprompta est ex id. XX v. 33. Nihilominus quo adscisceret caesuram bucolicam, non convertit quae ibi leguntur verba ἐν ἄγχεσι, sed posuit *ad flumina*. Explodenda est igitur et Jacobsii opinio, qui Animadv. in Theocr. p. VI sq. propter Vergilii versum id. I. 108 ἐπ' ὄχθαις vel ἐπάκτια pro ἐπεὶ καὶ corrigere voluit, et Eichstadii, qui Quaest. phil. spec. p. 7 eadem de causa ἐπ' ἀκτῶν conjecit. Neque inutilis est ad rem criticam una cum aliis rebus caesurae bucolicae usus ecl. V vss. 45 sqq.:

Tale tuum carmen nobis, divine poeta,  
 Quale sopor fessis in gramine, quale per aestum  
 Dulcis aquae saliente sitim restringere rivo.

Expressit poeta duos Theocriti locos, id. I v. 7 et 8. id. VIII v. 77. Illud manifestum est e v. 45 coll. v. 7 ἄδιον, ὃ ποιμάν, τὸ τεὸν μέλος, hoc e repetitione vocabuli post caesuram v. 46, quam sumpsit e versu proximo 76, et e transitu a substantivo ad verbum facto (*quale sopor* et *quale restringere*, ut ἄδὲ τὸ πνεῦμα et ἄδὲ αἰσχροχοτεῖν), quamquam poeta, ut congruerent versus cum verbis quae respondent vss. 82—84, aliis adjectivis usus est. Praeterea id. I v. 8 et VIII v. 77 magna quadam arte ita in rem suam convertit, ut quo concinerent hae duae imagines, et demeret et adderet quaedam. Nam dactylorum frequentia et ejusdem literae repetitione et adjectione participii *saliente* satis habuit v. 47 id indicare, quod descripsit Syracusanus loco priore accuratius. Novam sitis restinctae imaginem intulit ratione alterius loci habita, e quo assumpsit etiam verba *per aestum* (τῷ θέρει). Jam huic imagini non potuit priorem accommodare, nisi in ea speciem potius efferens pro αἰσχροχοτεῖν, quod magis universi est significatus, vocem *sopor* adhibuisset et oppositionis causa non solum *fessis* adiecisset, sed etiam verba παρ' ὕδωρ θέον — nam occuppasset ea, quae alterius imaginis erant — neglexisset. Addidit autem *in gramine*, ut imitaretur versus Theocritei caesuram bucolicam. Itaque haudquaquam poeta v. 46 id. IX v. 33 spectasse putandus est, neque stare possunt, quae Vergiliano versu innisi statuerunt de Theoriteo Wordsworthius ad l. l. et Hermannus de art. poes. buc. p. 6. Versum enim illo loco excidisse, ex Maronis imitatione, quae nulla est, conjicere, incautum atque inconsideratum est.

Alia quaestio est eaque gravissima, quid existimandum sit de *stropharum ratione*, quam animadvertimus apud Graecum poetam et apud Vergiliū. De qua quamquam pleraque nondum satis explorata sunt, tamen ita ea comparata est, ut in investiganda poetae Romani imitatione silentio praetereunda non videatur. Atque ut ab iis, quae certiora sunt, disputandi initium capiam, cantilenas amoebaeas et breviores et interdum etiam longiores compositas esse pari

stropharum longitudine, res explorata et concessa est. Bre-  
viores dico versus alternos id. V et VIII. 33—60 ac Ver-  
gilii ecl. III et VII, de quibus in sequenti capite uberius  
dicam. E longioribus cantilenis huc pertinent strophae  
id. X. 24—37. 42—55, quae artificiose ita exaratae sunt,  
ut, quamquam bini versus sententiam absolvant, tamen omnes  
interno quodam vinculo cohaereant. Id enim de vss. 42—55,  
in quibus res primo adspectu minus elucere videtur, bene  
demonstravit Ameisius Adn. p. 65. Pari longitudine etiam  
ea odaria sunt, quae leguntur id. VIII v. 63—70 et 72—79.  
id. IX. 7—13. 15—21. Verum id. VIII vss. 72—79 quum  
sine justo sententiarum ordine pronuntiati sint, mihi, ut  
supra commemoravi, potius pro fragmento carminis amoe-  
baei, quam pro integro cantico habendi videntur. Duabus  
autem strophis idyllii noni longitudine parem fuisse exi-  
stimo tertiam (v. 31—36) eamque ab ipso Theocrito com-  
positam. Versus 30, qui ad cantum referri non potest,  
sed ab Artemidoro ad carmina conglutinanda, ut vss. 1—6.  
22—29, adiectus est, mihi sic scribendus videtur: μηδὲ μ'  
ἐπὶ γλώσσας ἄκρας ὀλοφυδὼνα φῦσαι, „Musae, salvete et in  
carmine recitando mihi subvenite neve velitis me pustulam,  
mendacii signum, in lingua producere“. Precatur pastor a  
Muis, ut carmen sic, ut olim cecinerit, sibi nunc in memo-  
riam revocent. Ad structuram verborum cf. Aeschyl. Sept.  
c. Theb. 235 ed. Herm. θεοὶ πολῖται, μή με δουλείας τυχεῖν.  
Thuc. VI. 34. 8 πείθεσθαι οὖν, μάλιστα μὲν ταῦτα τολμή-  
σαντες, εἰ δὲ μή, ὅτι τάχιστα τᾶλλα εἰς τὸν πόλεμον ἐτοιμά-  
ζειν, καὶ παραστῆναι παντὶ τὸ μὲν καταφρονεῖν τοὺς ἐπιόντας  
ἐν τῶν ἔργων τῇ ἀληθῇ δείκνυσθαι κτλ. Matth. §. 546. not.  
p. 1269 ed. III. Krueger. §. 55. 1. not. 4. In ipso cantu  
nonnulla egregie ab Ahrensio restituta puto, sed restant  
duo vitia. Primum enim verba οὔτε γὰρ ὕπνος | οὔτ' ἔαρ  
ἐξαπίνης γλυκερώτερον οὔτε μελίσσαις | ἄνθεα inter se non  
congruunt. Itaque aut dativus vocabulis ὕπνος et ἔαρ  
addendus aut μελίσσαις removendum. Quum autem Words-  
worthius et Hermannus, qui priorem rationem inierunt, et  
audaciora protulerint neque recte a Vergilio sententiae  
suae praesidium petiverint, equidem μελισσᾶν pro μελίσσαις  
scribendum opinor. μελισσᾶν ἄνθεα sunt flores, quos apes

in deliciis habent\*). De sententia cf. id. XXII. 42: ἄνθεα τ' εὐώδη, λασίαις φίλα ἔργα μελίσσαις et Verg. ecl. VII. 37: „Nerine Galatea, thymo mihi dulcior Hyblae.“ Praeterea e v. 36 duos faciendos puto. Id suadet non solum Eustathius 10. 6 et 1656. 57: οὓς οὐ προσορῶσιν αἱ Μοῦσαι, τούτους ποτῶ δηλήσατο Κίρκη, verum etiam scholiasta ad v. 35: οἷς μὲν ἔστε φίλαι, ὧ Μοῦσαι, χαίρουσιν· ἐκεῖνοι δέ, οὔστινας οὐ προσβλέπετε\*\*) δηλονότι, διὰ τοῦ ποτοῦ ἔβλαψεν ἡ Κίρκη et ad v. 36: οὓς δέ οὐδαμῶς ὀρῶσι, δηλονότι καὶ ἐπισκέπτονται, αἱ Μοῦσαι, τούτους ἐδήλησατο καὶ ἔβλαψεν ἡ Κίρκη ποτῶ, τούτεστι διὰ τοῦ κυκεῶνος τοῦ φαρμακώδους. Hos quominus verum perditum invenisse credamus, prohibet, ut videtur, adjecta vocula δηλονότι, legerunt tamen non τῶςδ' vel τῶς δ' οὔτι, sed τῶς δ' αὐτε. Itaque versus sic scribendos esse verisimile est:

οὓς μὲν ὀρῆτε,  
γαῖεῦσιν. . . . .  
. . . τῶς δ' αὐτε ποτῶ δαλάσατο Κίρκη.

„Quos adspicitis, o Musae, laetantur, a quibus autem oculos vestros avertitis, hi illi sunt, quos potu laeserit Circe, i. e. hi voluptatum illecebris capi se patiuntur“. Sententia relativa incepisse videtur a particula δέ, ita ut structura eadem fuerit atque Hesiod. op. et di. 298 sq. ὅς δέ κε μήτ' αὐτὸς νοέῃ, μήτ' ἄλλου ἀκούων ἐν Συμῷ βάλληται, ὃ δ' αὐτ' ἀχρήϊος ἀνὴρ. — Jam vero ut accedam ad Vergilium, is tria haec idyllia spectavit in ecl. V et IX. Illic enim Mopsi et Menalcae carmina pari longitudine composuit, hic in pangendis odariis, quae leguntur vss. 23—25. 27—29. 39—43. 46—50 elegantissime sic elaboravit, ut numero versuum primum alteri, tertium quarto, argumento autem primum tertio, quarto secundum responderet; nam primum et tertium a Theocrito transtulit, secundi et quarti sententiam ad describendas vel suas vel populi Romani res ipse invenit.

\*) Fortasse μελίσσαι ἄνθεα significare etiam possunt *succum* i. e. *mel* ab *apibus* e *floribus collectum*. Vide de hac vocabuli ἄνθεα significatione Ameisium Adn. p. 47 et de eadem substantivi *flores* Verg. Georg. IV. 39 Spic. p. 37 sq.

\*\*) προσβλέπετε et ἔβλαψεν scripsi e sententia Geelii.

Exemplum Theocriti Vergilius etiam in *ephymnio* eclogae octavae adhibendo secutus est. De hoc versuum genere quandoquidem sagaciter, ut solet, disseruit Ahrensius ad Bion. Epit. Adon. p. 29 sqq., mihi pauca tantummodo addenda sunt. Vocatum est ephymnium *versus intercalaris* a Servio ad ecl. III. 21 „Dicitur autem hic versus intercalaris, qui frequenter post aliquantulos interponitur versus, sicut intercalares dies et menses vocantur, qui interponuntur, ut ratio lunae solisque conveniat. Fecit autem hunc versum ad imitationem Theocriti, qui frequenter dicit in Pharmaceutria: ὤγξ, ἔλας τὸ τῆνον ἐμὸν ποτὶ δῶμα τὸν ἄνδρα, o turbo, maritum meum adducito, sicut in his sequentibus: Ducite ab urbe domum, mea carmina, ducite Daphnin.“ Itaque videtur versus intercalaris appellatio proprie Romana fuisse, quae postea etiam ad Graeca carmina translata est. Aliter tamen Maji interpres ad eundem versum: „Antiquorum more hanc clausulam veluti *epodon* repetit Theocritum secutus: Ἀρχετὲ βουκολικᾶς μούσαι φίλαι ἄρχετ' αἰοιδᾶς.“ Conspirat in hac appellatione Vergilii scholiasta cum Theocriti ad id. I. 64 et 84, cujus verba e Duebneri emendatione protulit Ahrensius. — Jam quum Vergilius in eo consentiat cum Theocrito quam maxime, quod versu intercalari singulas strophas clausit — nam in Theocriti idylliis I et II ephymnia ultimo cuique stropharum versui adjecta, non primo praemissa esse, idem vir doctissimus docuit —, eo magis mirandum est, quod ceteroquin adeo ab eo recessit, ut non solum in utraque cantilena ultimae demum strophae aliud ephymnium adhiberet, sed prohymnium etiam omitteret. Quodsi dicimus, hoc poetam Moschi exemplo fecisse, qui id. III prohymnium omisit, id propterea non accipiendum est, quod in illo carmine unum modo ephymnium legitur quodque Vergilius in ecloga octava totum cantilenarum colorem e primis istis Theocriti idylliis deprompsit. Quare hoc loco e poetae Romani imitatione conjicere licet, aliquid turbatum esse in alterutro carmine. Illud non posse nisi primum esse, et per se apparet et intelligitur ex Vergilii ephymniis. Sunt videlicet in priore cantu hi duo:

Incipe Maenalios mecum, mea tibia, versus.

Desine Maenalios, jam desine, tibia, versus.

in posteriore:

Ducite ab urbe domum, mea carmina, ducite Daphnim.

Parcite, ab urbe venit, jam, carmina, parcite, Daphnis,

Fugit Servium\*), poetam in priore cantu expressisse primi idyllii ephymnia:

ἄρχετε βουκολικᾶς, Μοῖσαι φίλαι, ἄρχετ' αἰοιδᾶς.

λήγετε βουκολικᾶς, Μοῖσαι, ἔτε, λήγετ' αἰοιδᾶς.

In posteriore autem quamquam spectavit prius secundi idyllii ephymnium:

Ἰγὲ, ἔλκε τὸ τῆνον ἐμὸν ποτὶ δῶμα τὸν ἄνδρα,

simul tamen primum carmen ante oculos habuit; nam alter versus intercalaris Vergilii non ad alterius in secundo, sed rursus ad alterius in primo idyllio exemplum compositus est. Inde nullo negotio conjici potest, poetam Romanum semel tantum alterum Theocriti ephymnium legisse. Ac mea quidem sententia tam inepte quater hic versus ponitur quam commode totum carmen claudit. Accedit alia causa non levissima. Quod enim statuit vir doctissimus Hauptius Mus. Rhen. Nov. IV. p. 261 sq., praeter duo ephymnia idyllii primi etiam tertium aliquod inveniri, id re accuratius pensitata non novum est ephymnium, sed primum una voce φίλαι mutatum, cujus loco in optimis codicibus πάλιν legitur. Quodsi vero reputaveris, in codd. k. a. p. alterum hoc vocabulum statim v. 73 exhiberi, suspicari licet, id hic primo ponendum esse et a principio carminis prohymnium removendum. Quo facto prius ephymnium adjectum est primae strophae et reliquis deinceps omnibus excepta ultima, ita tamen, ut, quemadmodum sententia flagitat, ab altera strophā usque ad paenultimam voce πάλιν pro φίλαι posita paululum immutetur; totum carmen claudit ephymnium posterius. Haec si vere a me disputata sunt, quod haudquaquam pro certo affirmare

---

\*) Similiter erravit grammaticus ad ecl. X. 7. „*Simae*. Graecum est nomen, i. e. pressis naribus, unde et simias dicimus: quod epitheton Theocritus (7. 80) dat praecipue apibus.“ Nam verba *simae capellae* expressa sunt ex id. VIII. 50: ὦ σιμαὶ δεῦτ' ἐφ' ὕδωρ ἔριφου.

velim, cadit ea sententia, quam de tribus idyllii partibus ephymniis inter se disjunctis primus protulit Hauptius, probaverunt Hermannus et Ahrensius. Expressit autem accuratissime Vergilius auctorem suum in hac ephymniorum ratione, nisi quod prius ephymnium usque ad paenultimam stropham immutatum retinuit\*). — Carmina Theocriti, quorum singulis partibus ephymnia addita sunt, in tales strophas fuisse divisa, quae versuum numero inter se responderent, concedi ab omnibus puto. Easdem autem a simplicitate poesis popularis non remotas esse debere, quisquis poetam Siculum eam ante oculos habuisse persuasum habet, semper tenendum contendet. Itaque mea quidem opinione ii reprehendi non possunt, qui hac sententia imbuti, a codicibus si parum auxilii offerebatur, etiam ad conjecturas confugerunt. Verum id cadit tantum in primum et alterum idyllium, in quorum posteriore — de priore aliter sentio — recte fecit Ahrensius, quod ejecit v. 61, adjunctus etiam codicis optimi k. et scholiastae auctoritate. De reliquis carminibus ita judico, ut, si strophae simplicitate quadam commendabiles ultro se offerunt, eas amplexandas et retinendas, sin minus, cavendum esse existimem, ne poetam ipsum corrigamus. Et hac de causa probo ea, quae de tertio carmine disputavit Ameisius Adn. p. 26 sq., quae de eodem et de reliquis statuerunt Hauptius, Hermannus, Ahrensius, quippe magnam partem valde dubia et incerta, nunc in medio relinquo. Id vero certissimum mihi videtur, nisi prorsus idonea explicatio accesserit, neutiquam probanda esse, quae hac de causa neglectis apertissimis quibusdam Vergilii et Ovidii imitationibus nuperrime Ahrensius novavit. Nam ad haec excusanda non

---

\*) Non invenisse Vergilium in codice suo *πάλιν* pro *φίλει* usurpatum, facile illud quidem suspicari possis, putavitque etiam Ruhnken. Ep. crit. p. 65, jam Vergilii tempore in Theocriti libris vitia fuisse, sed caret haec opinio, si exceperis quae ab Artemidoro profecta sunt, omni veritatis specie nec, quantum adhuc Theocriti reliquorumque versus cum Vergilianis comparavi, ullum vestigium inveni, unde confirmari possit. Nihilominus semper ejus in perscrutandis imitationibus memor ero. Maji quidem interpres l. l. videri potest *πάλιν* non legisse.



satis esse apparet quae leguntur praef. p. LXXIX. At quum de ejusmodi locis alio tempore sententiam meam proponere statuerim, hic iis omissis quaedam de Vergilio adjiciam. In ecloga octava strophas agnoscendas esse, versus intercalaris manifesto declarat. De industria autem a poeta factum esse, ut prius carmen aliquatenus cum posteriore congrueret, statim concedet, qui vss. 21 sqq. contulerit cum vss. 68 sqq. Hac ratione Hermannus ad Bion p. 46 sq. suam opinionem firmare debuit, qua putavit, hanc congruentiam etiam ad numeros versuum singularum stropharum transferendam esse. Sed vehementer erravit vir doctissimus. Silentio praetereo, etiam in ecloga quinta initium posterioris carminis (vss. 56 sqq.) cum prioris (vss. 20 sqq.) ad sententiam congruere, quamquam ne levissima quidem vestigia exstant, quibus probetur, singulos utriusque cantilenae versus ita in strophas dividi posse, ut strophae prioris cantici cum strophis posterioris versuum numero conspicerent, neque hoc pro certo affirmo, in ecloga octava poetam, si concinnitatem stropharum curasset, in eo elaboraturum fuisse, ut utrumque carmen ex ejusmodi strophis constaret, quae pari versuum numero containerentur\*), nec vero, ut prioris cuique strophae altera posterioris responderet: verum quae mutavit vir doctissimus, non solum nimiam audaciam prae se ferunt, sed etiam omnia e falsis opinionibus nata sunt. Ex quibus unum jam tetigi, reliqua aliis locis persequar. Hermannum Ladewigus etiam in altera editione ita secutus est, ut in media via subsisteret. Nam apud hunc, quum ejus editio reliquas Hermannii conjecturas contineat, tamen prioris carminis strophae antepaenultima trium, paenultima quinque versuum est, posterioris vero cantus antepaenultima quinque, paenultima tres versus complectitur. Hanc

---

\*) Dixit Hermannus p. 46: „Sed de hac (ecloga octava) dicendum est explicatius, ne cui nihil curasse monstratas a Graecis leges videatur Virgilius.“ Quid Graeci ad eam quam voluit vir eximius efficiendam concinnitatem poetae demonstraverint, non video. Neque enim ullum Theocriti aut reliquorum idyllium exstat, quo duo contrarii argumenti carmina in hunc modum comprehenduntur, ut prioris strophae cum alterius numeris versuum concinant.

inconcinnitatem, siquidem semel nobis persuasimus, stropharum concinnitatem restituendam esse, cur ille praef. p. XVI diverso carminum exitu effectam esse dixerit, neque ego perpiscio neque quisquam perspiciet. — Nihilominus etiam apud Vergilium si quae concinnitas ultro se offert, eam lubenter amplector, inveniturque praeter parem versuum numerum universarum cantilenarum, de quibus antea dixi, aequabilis quaedam partium descriptio in *ecl.* V. vss. 45—55, qui numeros efficiunt: V. III. \*) III. et vss. 81—90, quorum numeri sunt: IV. III. III. Nec repugnaverim, si quis initium quoque eclogae existimaverit aliquam concinnitatis speciem prae se ferre, quippe hosce versuum numeros complectens: III. IV. I. I. III. III. III. I. Apertior etiam res in ecloga *quarta* videtur esse. Etenim ut a principio et fine incipiam, constat ea e prologo et epilogo, quorum prior (vss. 1 — 3) trium, posterior (vs. 60 — 63) quatuor versuum est. A v. 4 usque ad v. 17 quatuor versuum complexiones sententiam absolventes his numeris se excipiunt: IV. III. IV. III. Sequuntur usque ad v. 95 tres carminis partes, quae sententia inter se divisae hos numeros praebent: VIII. XI. IX. Denique restant usque ad epilogum duae partes septenorum versuum. Itaque totius carminis rationem strophicam ita significare licet:

III. | IV. III. IV. III. | VIII. XI. IX. | VII. VII. | IV.

Non aegre ferrem, si ii versus, quibus diversi aetatis gradus Asinii Galli describuntur, majorem aequabilitatem praeberent, et haereri fortasse potest v. 37 in verbis „erunt etiam altera bella,“ quae, quum *alter Tiphys* et *altera Argo* rectissime dicantur, minus apta videntur. Quare mihi suspicio mota est, hunc versum a librario adjectum esse, ut explicaret versus 34 verba extrema „et altera quae vehat Argo.“ Potuisse autem verbum vehendi sine accusativo poni, non est quod pluribus ostendam, et commendatur haec opinio etiam propterea, quod ita elegantissime uno versu sententia absolvitur. Ingenue tamen profiteor, me non tam cupere, vera a me pronuntiata putari, prae-

\*) Etsi vss. 45 — 52 omnes Menalcae sunt, tamen apte in duas partes sententia inter se sejunctas dividi possunt.

sertim quum qui versu deleto prodeunt numeri: VIII. X. IX. si reliquos versus spectamus, prorsus satisfacere non videantur, quam optare, ut scrupulus iste de versu 35 mihi injectus ex animo meo evellatur. E reliquis eclogis, quae apta proportionem in partes aequales dividi posset, nullam inveni.

Ad res metricas pertinet etiam *hiatus*: Hujus crebriorem usum quamquam probe scio Vergilium non ab uno Theocrito, sed a Gracis omnino repetisse, tamen e Wagneri Quaestione XI, siquidem is omnes hiatus enumeravit, facile intelligitur, poetam eum in eclogis saepius usurpasse quam in reliquis operibus. Revera ex imitatione Theocriti ejus modi hiatus explicari possunt, quos illius versus in sermonem latinum convertens coactus erat immittere. Cf. ecl. VIII. 41 cum id. II. 82. III. 42. ecl. VIII. 44 cum id. VII. 77. Alii hiatus ex eo more excusationem habent, quo secutus exemplum Theocriti versum in duas partes divisit. Cf. ecl. III. 6. VII. 53. X. 13 et similem locum ecl. III. 63. Eadem de causa excusandus hiatus in caesura κατὰ τρίτον τροχαῖον ecl. II. 53, quocum versu maxime congruit id. XXIV. 71 coll. id. VI. 12 (ex Ahrensii correctione). VII. 8. XIII. 24. XXII. 116. Ex imitatione Theocriti natus est etiam hiatus in caesura bucolica ecl. III. 79. VI. 44, quamquam non id sibi indulsit poeta, ut, quemadmodum ille fecit id. I. 67. II. 154. [XIX. 5. 8. XXIII. 48], etiam brevem vocalem in hiatu poneret. Denique hiatus, qui est in geminata interjectione *heu* ecl. II. 58. III. 100, etsi neminem offendet, tamen propterea huc referri potest, quod ibi Theocriteum *φῆῦ φῆῦ* expressit. Qui restant hiatus ecl. II. 65\*). VI. 44 (prior) VII. 53 (posterior). VIII. 108. X. 12, non ii esse videntur, quorum explicatio praecipue e Theocriti imitatione derivanda sit.

---

\*) Cf. tamen cum hoc loco id. I. 113. XV. 123, cum ecl. VII. 53 (castaneae hirsutae) et X. 12 id. I. 98. II. 46. X. 28. XIV. 49 etc.

---

## Caput quintum.

### De similitudine ac dissimilitudine cantus amoebaei Theocriti et Vergiliani.

*Cantum amoebaeum* hic illum angustioribus finibus circumscriptum intelligo, in quo duo pastores versibus alternis ita inter se certant, ut alter pastorum praebeat canendo, alter respondeat statim sententiis ac verbis similibus, cujus generis sunt apud Theocritum id. V. 80 — 135. VIII. 33 — 60, apud Vergilium ecl. III. 60 — 107. VII. 21 — 68. Si quaerimus de nomine, videntur et haec cantica et longiora pastorum odaria in Sicilia βουκολιασμοῦ appellatione significata esse. Hanc tamen rem, etsi silentio praeteriri non poterat, quandoquidem Zetzschium in dissertatione supra laudata p. 5. not. Artemidori versibus id. VIII. 31. 61. in fraudem inductum videbam, accuratius propterea non persequor, quod spero fore ut Ahrensius eam satis patefaciat atque illustret. Interim cf. praeter ea, quae ex hujus editione concludi possunt, de variis vocabuli significationibus Welckerum Op. I. p. 410 sq. Apud Romanos huic cantus generi *alternorum* vel *versuum alternorum* nomen inditum fuisse, supra commemoravi. Ut autem propius jam accedam ad quaestionem propositam, apud Zetzschium l. l. p. 7 sq. haec leguntur: „Etsi autem ex his (Theocr. id. V. 80 — 137. VIII. 32 — 40) tamquam primo fonte amoebaeorum carminum leges derivandas esse video, non tamen dubitavi, etiam Virgilium in partes vocare, cujus carmina ad singulos Theocriti locos vel explicandos et illustrandos vel sanandos (?) et defendendos felici cum successu a viris doctis adhibita sunt. Et miro quodam casu accidit, ut etiam in Virgilii bucolicis exstent duo amoebaea carmina, quae non tantum in singulis locis fere ad verbum imitentur Theocritea, sed etiam in universum ad eorum similitudinem ita accedant, ut alterum, Ecl. III. 60 — 107, mimici sit generis, alterum, Ecl. VII. 21 — 68, lyrico recte adnumeretur, nec dubium est, quin Virgilius illo Theocriti Id. V, hoc exprimere voluerit Id. VIII. Quae

quum ita sint, quumque omnium iudicio constet, plurimum profecisse in hoc genere Virgilium, non sine idoneis causis in ea quaestione, quae de legibus amoebaei carminis instituitur, etiam Virgilii carminibus usus esse mihi videor ea ratione, ut, quas apud Theocritum observassem leges, aut explerem e Virgilii comparatione aut iis ex illius conspiratione munimentum et fulcra pararem." Quae dixit vir doctissimus de Vergilii carminibus quum pleraque eleganter et recte disputata sint, extremis tamen artiores terminos constituendos esse, mihi quidem persuasum est. *Primum* enim etiam Romani carmina amoebaea habebant, quae etsi non constat quibusnam legibus circumscripta fuerint, solutiores eas fuisse certe conjicere licet; et haec, ut in aliis fecit, quae apud populares exstabant, poeta magis interdum quam Thèocritea spectare poterat. *Deinde* in ecl. III. non omnia e quinto, in ecl. VII. non omnia ex octavo idyllio hausit, ex qua observatione quaedam facilem explicationem habent. *Tum* quae artificiose ab auctore instituta erant, eum ut imitatore nonnunquam neglexisse verisimile est. *Denique* in eo certe idque data opera Theocriti auctoritatem neglexit, quod suam ipsius personam in haec carmina inferre non dubitavit. Haec omnia, quae partim jam tractavi partim in proximis persecuturus sum, in comparatione instituenda considerari debent quam diligentissime. Quamobrem, si recte agere cupimus, primo prorsus omittenda est Vergilii imitatio, tum vero explorandum, in quibusnam rebus ille aut consentiat cum auctore aut ab eo recedat. Ac si verum fateri volumus, apud Theocritum unde carminis amoebaei leges derivari queant sunt tantummodo id. V vss. 82—135; nam vss. 136 et 137 recte nunc Ahrensius Morsoni tribuit. In his versibus apparet non solum eundem canendi ordinem, quemadmodum ab initio institutus erat, usque ad finem servatum, sed etiam ab utroque pastore pari versuum numero certatum esse. Atque hanc primam legem Zetzschius optime exposuit. Idem bene observavit, certantium versus semper sententiarum, saepe etiam verborum similitudine inter se cohaerere, oppositionis vinculum semel inveniri vss. 132—135. Tertiam legem, quam adjecit vir doctissi-

mus, ex qua utrique canentium eam servandam fuisse dicit ingenii indolem morumque constantiam, quam poeta ab initio utrique tribuit, propterea omitto, quod non modo non propria est servata haec morum aequalitas cantus amoebaei, sed ad omnia pertinet idyllia, in quibus diversorum ingeniorum homines producuntur, verum etiam in idyllio quinto, quod moverit Morsonem, ut Comatae victoriam decerneret, non tam e versibus alternis, in quibus uterque pari impudentia, arrogantia, rixandi cupiditate conspicuus est, quam e versibus proxime antegressis eruendum esse videtur. Nihilominus ex hac maxime ingenii constantia ad versus idyllii octavi recte apteque constituendos subsidia petenda sunt. Hanc legem igitur praetermittendam aliamque potius in ejus locum substituendam esse existimo. Revera enim Theocritus, quae erat exima ejus artis scientia, per totum cantum idyllii quinti id egit, ut pastores eam retinerent vitae condicionem, qualem in introitu carminis depinxit. Quae contra disputavit Zetzschius, ea explicatione facile dilui possunt. Nihil omnino illud argumentum valet, quod vir doctissimus ad probandam sententiam contrariam p. 13 sq. e munerum varietate duxit. Nam diversa dona etiam in idyllio III. (cf. v. 10 sq. 21 sqq. 34 sqq.) puellae a pastore offeruntur. Graviorem dubitationis materiam diversorum amorum nomina praebere videntur. Etenim nominatur a Comata v. 88 Clearista, v. 132 Alcippe, a Lacone v. 90 et 99 Cratidas, v. 134 Eumedes acceditque etiam aliud, quod miror a Zetzschio, qui hinc suae sententiae aliquid firmamenti quaerere debuit, prorsus neglectum esse. Nimirum quum praeter locos laudatos Comatas semper puellam (cf. v. 85. 96. 105), puerum Laco (cf. v. 87. 107) commemoret, sane offensionem parare potest, quod v. 127 ab hoc pastore puellae mentio injicitur. At est ibi articulus collective intelligendus, ut non certam aliquam puellam significet, sed omnes puellas aquae hauriendae causa ad fontem venientes comprehendat. Jam ad quaestionem absolvendam haec considerari velim. Primum quidem in eo jure aliquis haerere possit, quod in extremis tantum strophis (v. 132 — 135) Comatas alius puellae, Laco alius pueri

mentionem facit. Etenim si pastoribus in cantu amoebaeo extra fines vitae principio carminis ipsis assignatae evagari licuit, qui explicandum sit, quod in fine tantum alios amores induxerint, haud facile indicari poterit. Tum vero Comatas v. 132 commemorat ille quidem aliam puellam, sed tantum abest ut illam se in deliciis habere profiteatur, ut eam a se non amari aperte pronuntiet. Spernit igitur nunc Alcippen, antea amavit. Ad confirmandam hanc opinionem carmen tertium in auxilium vocari potest, si quis in eo omnia simpliciter pronuntiata esse putat. Nam ibi quoque praeter Amaryllidem a caprario v. 35 alia puella commemoratur, quam se illi antepositurum esse minatur. Quae quum ita sint, certe Comatam dicendum erit suis moribus constare, non alienam personam induere. Neque aliam vitae condicionem simulat alter pastor Laco. Hic quem antea πατρωνυμικῶς Cratidam vocaverat, v. 134 jam vero nomine Eumedem appellat, et haec causa est, quamobrem suam stropham alterius opponat puerumque magnopere a se amari dicat. Artificiose vero poeta id curavit, ut Laco, quoniam de uno eodemque homine loquebatur, aliud semper donum commemoraret (cf. v. 98 sq. 106 sp. 134 sq.), quum Comatas idem munus, palumbem, se Clearistae daturum esse (v. 96 sq.) et Alcippae dedisse (v. 132 sq.) recte dicere potuerit. In explicando nomine Κρατίδας auctorem habeo Papium s. v., et scholiasta codicis K ad v. 90 et 99 eatenus certe verum vidit, quod utroque loco Eumedem significari putavit. Nec enim necesse esse, id quod idem voluit ad v. 99, Cratidam pro Cratidae filio accipi, quem patronymicorum usum tetigit Meinekios ad id. VII. 40, manifesto apparere credo. Ceterum quemadmodum Theocritus hic eundem hominem et πατρωνυμικῶς et proprio nomine appellavit, ita id X. 15 eadem puella ἡ Πολυβότα vocatur, quae postea (v. 26 et 36) Βομβύχα dicitur, ita ut facile credere possis, hanc nominum varietatem ex ipsa vitae consuetudine a poeta expressam esse. Ultimo loco quaerendum est, unde poetam suspicari liceat exitum certaminis, quod est in id. V, arbitrique iudicium suspensum esse voluisse. Ac Greverus quidem l. l. p. 55 merito Comatae victoriam concessam esse putavit propterea, quod,

quum hujus cantus inventionis laude delectet, Laco nihil aliud fecit quam ea variavit quae ille prior finxerat. At falsam esse viri docti opinionem, vel ex hoc perspicuum est, quod ita poetae semper id agendum fuisset, ut ei, quem victoriam reportare volebat, prior in canendo locus obtingeret. Cui rei repugnant leges de canendi ordine observatae, de quibus exposuit Vossius ad Verg. ecl. III. 52\*). Meliora docuerunt Wernsdorfius (Cantores p. 17 sqq.) eumque secutus Zetzschius p. 11. Nimirum poeta operam dare debuit, ut vel per ipsum certamen vel, si hoc minus fieri poterat, per verba antegressa, quae jam praesens arbitri audivit, uni pastorum eam indolis morumque labem adspargeret, qua commoveretur iudex, ut alteri magis faveret eique victoriam decerneret. In quinto idyllio causa, cur Comatas certaminis pretium abstulerit, non repeti potest, nisi e vss. 66—79. Aperuerat Laco post Morsonis adventum nimiam rixandi cupiditatem maxime vss. 74 et 75, eamque ob causam alter pastor v. 77 eum notaverat his verbis: τὸ γὰρ μὲν φιλοκέρτομός ἐσσι. Verum autem id opprobrium arbitro visum est; nam v. 137 ad Laconem conversus haec verba profert: τὸ δ' ὃ τάλαν, ἐσσι φιλεχθής. Jam quo magis contemnendum Morsoni pastoris ingenium videretur, non sine artificio quodam poeta Comatam majorem, Laconem minorem natu finxit, quandoquidem hominis natu minoris erga eum, qui longius aetate proventus erat, modestia et verecundia inprimis exspectanda erat. Ac si proferre licet opinionem quandam nugarum fortasse non absimilem, mihi ne nomen quidem Λάκων sine causa pastori tributum esse videtur. Hoc quominus Valckenarii auctoritatem (Ep. ad Roev. XXXI.) sequentes e patria hominis repetendum esse censeamus, rationes metricas prohibere, verissime dixit Meinekius ad v. 1. Quare mihi in mentem venit, illud cum verbo ληκέω cohaerere, apprimeque in hunc locum convenire puto

---

\*) Has tamen leges, quae nituntur loco valde suspecto Theocr. id. VI. 5, paululum immutandas esse, alio tempore demonstrare studebo.



canis nomen *λάκων* a Columella traditum loco p. 5 laudato R. R. VII. 12. 6. Neque enim ibi de canis nomine a terra indito cogitari posse, ostendunt, opinor, quae addita sunt et Graeca et Latina nomina, quamquam non ignoro, canes Laconicos etiam apud Romanos magno honore fuisse adeoque apud Ovidium Met. III. 219 unum ex Actaeonis canibus correpta syllaba paenultima Laconem vocari. Quod si vera est haec quam protuli suspicio, Theocritus clamosam et vere caninam pastoris indolem satis superque ipso nomine significavit.

Idyllii octavi carmen elegiacum omnis generis difficultatibus laborare gravissime, testantur innumerabiles paene virorum doctissimorum conatus, quibus illud in pristinum nitorem restituere studuerunt. Hos omnes quum diligentissime perlustrassem, nullum reperire potui, qui mihi ab omni parte satisfaceret. Namque ut incipiam ab altera earum legum, quas supra posui, eam tantopere in iis strophis, quae leguntur in huius carminis vss. 49—60, laesam esse persuasum habeo, ut non dubitandum esse existimem, quin tres strophae exciderint\*). Utrius cantoris hae fuerint, idcirco dictu est difficilior, quia omnino quaeri potest, puellamne an puerum Daphnis celebraverit. Nam Milonem ab eo laudatum esse, post Eichstadium (Quaest. phil. spec. p. 42 sqq.) evincere conatus est C. F. Hermannus l. l. p. 11 sq. Cujus totam disputationem, qua, quae diversissima sunt, conjungere aggressus est, per omnes partes refellere quum longum sit et ab instituto meo alienum, equidem potius, quam ipse conceperim sententiam, paucis hoc loco significare constitui. Verum esse puto, quod plerique viri docti statuerunt, id. VIII. a Daphnide puellam, puerum a Menalca celebratum esse, idque eo magis, quod mihi verisimile videtur, Theocritum ea spectasse, quae a Sositheo, sive ab ipso ficta, sive, ut rectius fortasse statuitur, ex aliqua fabula populari hausta sunt, narrata esse scholiasta in argumento tradit. Ex eo sequitur, ut v. 49—52

---

\*) Tres strophas intercidisse, mihi propterea etiam verisimile videtur, quod ita demum justam existere videmus cantus amoebaei longitudinem.

Menalcae, v. 57—60 Daphnidi tribuendi sint et exciderit antistropha, quae versibus 49—52, stropha, quae versibus 57—60 responderet. Eam stropham, quae excidit ante versus 57—60, legisse et risisse videtur Callimachus ep. LV:

τὸν τὸ καλὸν μελανεῦντα Θεόκριτον, εἰ μὲν ἔμ' ἔχῃ,  
 τετράκι μισοῖς, εἰ δὲ φιλεῖ, φιλέοις.  
 ναίχι πρὸς εὐχαίτῳ Γανυμήδεος, οὐράνιε Ζεῦ,  
 καὶ σὺ ποτ' ἠράσῃς. οὐκ ἔτι μακρὰ λέγω.

Non enim credo, v. 3 Callimachum, quae est sententia viri mihi magnopere colendi, Fritzscheii, l. l. p. 6, id. XII. 35, sed stropham nunc perditam ante oculos habuisse, in qua Menalcas pueri amorem exemplo Jovis Ganymedem deperientis excusavit\*). De stropha, quae media interjecta est, non possum judicare, nisi aliud quiddam persecutus fuero, quod in hoc carmine maximi momenti esse puto. Poetam enim, quandoquidem Daphnidem pretium certaminis auferre voluit, in eo elaborasse consentaneum est, ut hujus ingenium morumque indoles prae Menalcae arbitro placere posset. Negligenda autem esset haec res potiusque sic existimandum, poetam illam morum diversitatem in iis versibus, quos certamini praemittere voluit, significare statuuisse, nisi id in ipso cantu factum esse, luculenta signa exstarent. Nam in iis strophis, quae leguntur vss. 33 — 48, videmus Menalcae verba sublimitate quidem illa et magniloquentia insignia esse, sed ob suavitatem et modestiam magis commendari Daphnidis orationem. Haec morum discrepantia quum tollatur et pessumdetur, si, quod fecit Ahrensius, secutus auctoritatem Viri Docti in Ephem. Goth. 1803. n. 22, sedem versuum 41—43 et 45—47 permutaverimus, nihil hic mutandum esse censeo praeter unum, quod suasit Meinek. Hunc enim recte statuuisse opinor, versum 43 in antistropham, versum 47 in stropham transferendum esse.

---

\*) Si verum est, id III. 35 sq. veram personam eamque poetae amicam significari, verba Callimachi τὸν τὸ καλὸν μελανεῦντα Θεόκριτον ad hunc locum spectare videntur. Potuit enim propterea poeta ab aequali *pulchre nigricans* vocari, quod puellam nigri coloris in deliciis haberet. Nec tamen huic opinioni multum tribuerim.

Oppugnaverunt quidem ejus sententiam Bachius Quaest. eleg. spec. p. 20, Zieglerus in editione, Ameisius Adn. p. 57 et Praef. ed. p. XII, sed Bachii explicationem jam Ameisius falsam esse intellexit, quae autem Ameisius et Zieglerus dixerunt, quamquam a carminis amoebaei legibus non abhorreere videntur, tamen propterea non satisfaciunt, quod prorsus incredibile est, pastores, quum primum amorum mentionem fecerunt, statim alterum de alterius amore locutos esse. Contra quod Ahrensium permovisse existimo, ut tres versus transponeret, id nihil valere mihi recte disputasse videtur Zetzschius p. 20. Nimirum si recte conjicio, vir doctissimus non alia causa ductus est, quam quod, ut vss. 35 et 49 sqq. ostendere videntur, Menalcas per carmen elegiacum ovium et caprarum custos fingitur. At vero, quum, quae in prioribus utriusque strophae versibus leguntur, universe dicta sint, apte etiam Daphnis oves et capras commemorare potuit, nec transpositione versuum propterea quidquam proficimus, quod vss. 41 sq. verba παντῶ δὲ γάλακτος — τρέφεται non minus de pecore quam de bubus intelligi et possunt et debent. Jam, ut convertam me ad versus 53—56, videtur vox μᾶλα v. 56 vehementer flagitare, ut Menalcae stropham adscribamus, et fateor, hanc unam rem eam in me vim habere, ut id revera faciendum putarem, nisi aliud accederet, quod hoc ipsum vocabulum corruptum esse satis superque ostenderet. Gravem enim offensionem habet, quod pronomen τὸ sine vocativo positum est. Nam vocativus non solum propter alterius strophae oppositionem, in qua eandem apostrophē usurpatam fuisse certum habeo, adjungi debuit, verum etiam propterea, quod vitanda erat ambiguitas, ex omissione nominis quae oritura erat. Fac enim, versum 56, ut nunc in editionibus legitur, ab ipso poeta profectum esse: nihil profecto obstat, quominus accusativum τὸ v. 55 aut, ut scholiasta voluit, ad alterum e certantibus aut ad arbitrum referamus. Utrumque quum perversum sit, medela quaedam circumspicienda est eaque talis, qua succurratur etiam verbis extremis v. 56; nam in his et ipsis jure homines docti haesisse videntur. Nihil aut ad sensum aut ad rationes grammaticas deesse puto,

si v. 56 ita exaraveris: τὴν ἄμα, παῖ, ἐσορῶν τὰν Σικελὴν ἐς ἄλλα\*). Cum structura verbi ἐσορᾶν cf. id. VI. 35 ἐς πόντον ἐσέβλεπον (ἐσέδρακον e Junt. Ahrens.). Haec conjectura si ferri posse videtur, Daphnidi strophā assignanda est, in quem etiam idcirco convenit, quia quae ex his versibus elucet pastoris indoles non diversa ab illa est, quam in versibus antegressis conspici supra dixi. Ultima strophā quum, nisi ad lubidinem cantus amoebaei leges violari posse putaveris, Menalcae tribui nequeat, nihil restat, nisi ut existimemus, in strophā perdita sublimiores et magnificentiores comparationes prolatas fuisse, iis videlicet oppositas, quae leguntur v. 57 et 58. Nam ne ex duorum extremorum versuum sententia, Menalcae hanc strophā habendam esse, conjiciendum credas, quod accidit Zetzschio p. 24 sq., inconsiderato Wernsdorfii iudicio (l. l. p. 21)\*\*) in fraudem inducto, vel hoc vetat, quod e concinnitatis lege eadem excusatio, Jovis exemplum amorī praetexens, etiam alteri pastori usurpanda fuit. Ceterum, quum una certe Daphnidis strophā exciderit, non necesse esse existimo, quod e Meinekii sententia fecit Ahrensius, Naidis nomen in v. 43 inferri. Nam poterat verum ejus nomen in hac ipsa strophā prolatum esse. — His de Theocrito disputatis, jam ad Vergilii carmina accedam. In cujus cantibus amoebaeis accurate observata est ea lex, quam supra primo loco posui. Secunda ex iis legibus, quas observaverat Theocritus, poeta Romanus ita usus est, ut saepius quam ille oppositionis vinculo certantium cantilenas conjungeret. Cf. ecl. III. 72 — 75. 80 — 83. 88 — 91. VII. 37 — 60. Verum eandem tamen non semel laesit, ut putavit Zetzschius p. 10, sed bis ecl. III. 60 — 63. VII. 45 — 52. Sed causam, quamobrem id aliter fieri vix potuerit, neque a

---

\*) Fortasse tamen e codd. k. Q. Σικελικὴν ἐς ἄλλα omisso articulo reponendum est.

\*\*) Omnino Wernsdorfius in dissertatione sua saepe modum egressus est. Ita p. 23 sq. non recte aliquam morum diversitatem etiam in carmine amoebaeo idyllii quinti invenire sibi visus est, planeque ridicula sunt, quae p. 21 de Menalca dixit: „Agnoscas inflatum homuncionem, qui deos crepet assidue.“

Zetzschio neque a quoquam indicatam video. Nimirum est illa in eo posita, quod ecl. III. v. 60 sq. magis initium Phaenomenorum Arati quam Theocriti id. V. v. 80. 81 expressit, quare fieri non poterat, quin vss. 62 et 63, qui adumbrati sunt ex id. V. v. 82. 83, minus cum strophis congruerent, et quod ecl. VII. v. 45 sqq. ex id. VIII. v. 37 sqq., v. 49 sqq. ex id. IX. v. 15 sqq. et id. XI. v. 51 translati sunt, quod et ipsum in causa fuit, cur minor h. l. concinnitas quam quae aliis locis reperitur effici posset. Deprehendimus igitur in his versibus imitatoris vitium cum eo cognatum, de quo in fine primi capituli (p. 15) commemoravi. Quod vero hoc vitio Zetzschius p. 10 et p. 23 sq. ita usus est, ut inde demonstrare studeret, etiam id. VIII. vss. 49 — 56 strophae et antistrophae necessitudine conjungi posse, meo quidem iudicio a vera via aberravit. Tertiam denique legem, quam ex Theocriti idyllio quinto prodire supra evincere conatus sum, a Vergilio non observatam esse, et interpretes ostenderunt et exposuit diligenter Zetzschius p. 14. Hujus disputationi ea tantum addere decrevi, in quibus dissentendum mihi videtur a viri doctissimi iudicio. Primum enim in eo erravit, quod in ecl. III. propter versus 32—34. 94—95. 98—99. Menalcam capras et oves pascere contendit. Nam unicus locus, unde de ea re aliquid colligere liceat, sunt vss. 32—34, in quibus eum caparium fingi videmus. Versus 94. 95. 98. 99 non solum idcirco ex quaestione eximendi sunt, quia ad cantum amoebaeum pertinent, in quo pastores aliorum personas induisse ipse statuit, sed etiam propterea nihil probant, quod, qui juxta collocati sunt versus 92. 93. 96. 97, et ipsi ficti argumenti sunt adeoque v. 98 sq. Menalcas non simplicem pastorem agit, sed *pecoris magistrum*, cujus imperio servi humilioris ordinis subditi erant. Deinde animadvertere licet, poetam in eadem ecloga legem a Theocrito observatam magis quam in septima spectasse. Nam si recte in secundo capite (p. 21) disputavi, Phyllidem puellam esse a poeta ipso amatam, in amoribus certe omnia in hoc carmine inter se conspirare videntur. Exceptis enim vss. 76—79 et v. 107 Menalcas semper Amyntam commemorat (cf. v. 66. 74. 83), Damoetas Galateam (cf. v. 64 et 72). Quod autem prae-

terea Menalcas v. 67 Deliam, Damoetas v. 81 Amaryllidem profert, id facilem explicationem habet. Delia, quippe pristina amica, ab illo leviter tantummodo tangitur et Amaryllis hunc non amat, sed ira persequitur. Velim autem haec cum iis conferas, quae dixi de Theocriti idyllio quinto. Nam quod Menalcas de uno semper homine loquitur, in eo spectavit poeta exemplum Laconis Theocritei, quod autem Damoetas praeter amorem Galateae iram Amaryllidis commemorat, in eo Maro Comatae exemplum secutus est. Hinc verisimile esse puto, etiam Vergilium Theocriti Eumedem eundem cum Cratida habuisse.

Contra Vergilius prorsus a Theocriti instituto in fingenda hac illave pastorum sorte ac condicione descivit in ecloga septima, quo ex genere maximè memorabile est, quod v. 29 sqq. Corydon adeo aliud nomen assumpsit, et v. 41 Thyrsis pronomine *tibi* eandem puellam compellat, quam in stropha antegressa *πρωταγωνιστῆς* allocutus erat. Mirari autem possis, posteriore loco Zetzschium (p. 23 n.\*\*\*)) eo adductum esse, ut id. VIII. v. 55 pronomen *τυ* ad Milonem referendum esse putaret. Immo ut redeat jam oratio mea, unde profecta erat, ex hac libertate, qua poeta modo hanc modo illam pastorum condicionem finxit, neutiquam de Theocriti cantu amoebaeo conjecturam facere licet. Nam si discedas a concinnitatis lege a Vergilio bis neglecta aut certe non satis religiose observata, de qua quid iudicem, jam exposui, poterat poeta Romanus aut popularium interdum magis quam Theocriti carmina spectare aut, si vel maxime ad illius idyllia se composuit, tamen, quum vel sua ipsius persona illata omnem fidem ac veritatem huic cantui detractam esse intelligeret, lubens volensque eam artem, qua Siculi poetae carmina amoebaea composita sunt, negligere. Ceterum num jam Vergilii tempore carmini elegiaco tres strophae defuerint, adhuc in medio relinquo, quamquam id perquam verisimile esse, propterea existimo, quod, ut jam aliquoties dixi, persuasum habeo, postquam Artemidorus\*) dispersa poetae carmina bucolica

\*) Artemidorum primum poetae carmina bucolica in unum corpus conjunxisse, etiam Ahrensius statuere videtur. Hoc propterea suspicor,

in unum corpus collegit, usque ad Vergilii aetatem nihil in iis turbatum esse. Certe non recte egerit, si quis ex ecl. III. 80—84 coll. cum id. VIII. v. 57—60 conjecerit, Vergilium eam stropham, quae excidit ante versus Theocriteos, in codice suo invenisse. Nam alio loco demonstrabo, poetam Romanum saepe iis, quae ab auctore deprompserat, de suo quaedam vel addidisse vel opposuisse.

Postremo commemorandum est Vergilium in ecloga VII nimia fortasse cum diligentia curasse, ut Thyrsidis strophae fastus, arrogantiae, rusticitatis plenae essent, contra Corydonis cantus modestia, simplicitate, suavitate commendaretur. Ac debuit poeta hanc morum diversitatem propterea in cantum ipsum inferre, quod, unde certamen exortum esset, in versibus antegressis accuratius describere noluit. Eandem ingenii discrepantiam — nam non moror Wernsdorffum, qui, quum rectissime p. 25 sq. de ecloga octava explicaverit, contra poetae consilium p. 24 sq. Damoetae prae Menalca favendum existimavit — Vergilius in ecloga III idcirco significare non necesse habuit, quia pastores ab arbitro pares pronuntiari voluit.

---

## Caput sextum.

**Demonstratur quomodo intellexerit Vergilius Theocr. id. I.  
vss. 64—104.**

Daphnidis fabulam, qualis describitur a Theocrito id. I. vss. 64—104, intellectu esse difficillimam, constat inter omnes. Quae quidem difficultas, quum coepissem in Vergilianas Theocriti imitationes accuratius inquirere, vehementer me movit, ut, num quid ad verum ejus intellectum e poetae Romani eclogis conferri posset, investigare atque explorare studerem. Atque hac de re quum jam certam

---

quod id epigramma, quod ex vulgari ordine est vicesimum alterum, inter dubia et spuria rejecit. De eodem nuper disseruit etiam Hauler. p. 57 sq. coll. p. 31 sqq.

quamdam opinionem conceperim, eam ita hic in medium proferam, ut me ingenue profitear cupere, si a vera via aberraverim, ab hominibus doctis meliora edoceri. Ita autem in hac quaestione versabor, ut primum quidem omissa omni Vergilii imitatione de solis Theocriti versibus disseram, deinde vero uberius exponam, ubi et quomodo poeta Romanus eos idyllii versus, qui hic in disceptationem vocandi sunt, vel adumbraverit vel spectaverit.

Ac capiendum quidem puto disputandi initium a versibus 138 sq.

χῶ Δόφνης ἔβα ῥόον. ἔκλυσε δῖνα  
τὸν Μοῖσαις φίλον ἄνδρα, τὸν οὐ Νύμφαισιν ἀπεχῆ.

Hunc locum non posse de descensu ad Acherontem intelligi, verissime contendit C. F. Hermannus de Daphn. Theocr. p. 19 sq. Nam etsi praeter Ov. Amor. III. 9. 27: „hunc quoque summa dies nigro submersit Averno“, quo versu vir doctissimus vulgarem explicationem defendere non licere bene docuit, mentio facienda fuit etiam loci Propertiani, qui legitur III. 16. 9 (IV. 18. 9 ed. Lachm.): „His pressus Stygias vultum demisit in undas“, tamen ne his quidem verbis ullo modo evinci posse puto, quae apud Theocritum leguntur eo modo, quo voluerunt interpretes, accipienda esse. Hactenus igitur Hermannum verum vidisse puto. At vero quam ipse explicationem protulit, significari Daphnidis profluvium, quo nivis ad modum dissolutus decedendo quasi fontem effecisset inque undas abisset, cohaeret illa quidem cum universa sententia, quam de Daphnidis fabula concepit, sed multo magis coacta est multoque durior quam vulgaris interpretatio, neque cum simplicitate sermonis Theocritei ullo modo congruere videtur. Equidem eum, qui mentem animumque nusquam alio nisi in Theocriti versus converterit, assensurum mihi puto, iis tantummodo significari posse, *Daphnidem in fluctus se praecipitasse et ita undis obrutum esse*. Hunc Daphnidis exitum scio a nullo scriptore commemorari; nec tamen hoc mirum fore existimo, si illud reputaveris, et diversarum terrarum fuisse hanc fabulam et in ipsa Sicilia eam ab aliarum regionum pastoribus aliter tradi potuisse. Nam tantum abest ut Theocritum ipsum quidquam finxisse credam, ut prorsus



persuasum habeam, omnia, quae ab eo narrata sunt, ex carmine populari desumpta esse.\*) Cui etsi multa propria ac pecuiliaria fuerunt, non deesse tamen, quae ab altera fabula non multum discrepent, ex disputatione mea apparituum esse arbitror. Sed, ut redeam ad rem propositam, videtur adeo testimonium aliquod, quo confirmetur mea de pastoris exitu opinio, erui posse e scholiastae verbis ad id. VIII. 92: οἱ δὲ λοιποὶ φασιν αὐτὸν τυφλωθῆναι καὶ ἀλώμενον κατακρημνισθῆναι. Quum ex iis, qui caecitatem Daphnidis commemorant, nemo eum de rupe cecidisse narret, suspicari licet, diversa hic confusa esse et verba postrema sic esse corrigenda: καὶ ἄλλοι ἔτι κατακρημνισθῆναι, i. e. alique etiam, eum de rupe se dejecisse. De morte voluntaria accepit haec verba etiam Adertus Théocr. p. 43, eodemque modo usurpatum est verbum κατακρημνίζεσθαι arg. id. IX: οὐδὲν δὲ ἔχει πρὸς τὸν Μενάλκαν τοῦτον ὄντα Σικελὸν ὑπὲρ Μενάλκου Χαλκιδέως, ὃν φησιν Ἑρμειάναξ ἐρασθῆναι τῆς Κυρηναίας Εὐίπτης καὶ διὰ τὸ μὴ ἐπιτυγχάνειν αὐτῆς κατακρημνισθῆναι. Utrum ii, quorum auctoritatem scholiasta secutus est, et ipsi rem ita tradiderint an Daphnidem se de rupe in fluctus praecipitasse narraverint (cf. id. III. 25 sq. V. 15 sq.), in medio relinquo, quum satis me id probasse existimem, mortis voluntariae testimonium non uno Theocriti loco contineri. Jam si vere disputavi de id. I versibus 138 sq., sequitur primum quidem, ut reponendum sit id. I v. 136 ἀπεπαύσατο, quod plurimi libri praebent, deinde vero, ut iis verbis, quae statim sequuntur, τὸν δ' Ἀφροδίτα ἦδε' ἀνορθῶσαι, hunc sensum subjectum esse credamus: „hujus animum Venus erigere ac confirmare volebat.“ Neque vero id satis est; immutanda et convertenda est tota fabula.

Quum enim ne tenuissima quidem suspicio e reliquis poetae versibus elici queat, unde demonstrare liceat, pastorem Nympham in matrimonium duxisse et postea alius puellae desiderio correptum esse, ne ea quidem quae leguntur vss. 82 sq. ἃ δὲ τε\*\*) κώρα πάσας ἀνὰ κράνα, πάντ'

\*) Cf. etiam quae dixit hac de re Hauler. p. 47.

\*\*) Verba ἃ δὲ τε retinenda esse puto. Nam etsi e verbis Vergilii ecl. X. 22 „tua cura, Lycoris“ conjici potest, ἃ δὲ τοι veram esse

ἄλσεα ποσσὶ φορεῖται ex vulgari ratione explicanda esse puto; sed certum mihi videtur, poetam nihil significare voluisse nisi hoc: „puella fugit quorsum potest, ut ex conspectu tuo se eripiat.“, vel ut proverbio germanico utar: „das Mädchen läuft davon über alle Berge“. Cf. praeterea quae similiter dicta sunt id XIII. 70. XIV. 42. Eodem modo verba Theocriti accepit Nonnus Dion. XV. 307: ἃ πῶσα Δάφνης ἄειδεν ὁ βουκόλος· ἀμφὶ δὲ μολπῇ παρθένοιο ἀστιβέεσσιν ἐκεῦθετο μᾶλλον ἐρίπναις, ποιμενίης φεύγουσα βοῆς μέλος. Quatenus ista puella fuerit, nisi in hanc sententiam detorseris v. 66 sqq., e solis Theocriti verbis conjici non potest; sed Naidem eam fuisse, ostendit Ovidius Art. Am. I. 732: „Pallidus in lenta Naide Daphnis erat“. De hoc loco disputavit etiam Hermannus l. l. p. 7 sq., sed, quae erat ejus praejudicata opinio, statuere aliud non potuit, quam Ovidium praeter nomen nihil ex tota fabula cognovisse. Quod quum per se incredibile sit tum falsum esse evincit, quod alius etiam fabulae meminit Met. IV. 276 sqq. Apparet autem, adjectivo *pallidus* id indicasse poetam Romanum, quod significavit Theocritus verbo τήχεσθαι v. 66 coll. v. 19 et id. V. 20. Infelicis hujus amoris causam e Veneris contemptu repetendam esse clare indicat poeta v. 87 sq. At haereri potest in his verbis propterea, quod non intelligitur, quo modo solus ille fastus, quo pastor se Amorem superaturum esse, gloriatus erat, tam gravem poenam efficere potuerit\*). Accedit, quod non verisimile est, hanc fabulam ab ea, quam primum Stesichorum tractasse putant, tam diversam fuisse, ut in ea ne jurisjurandi\*\*)

---

scripturam et substantivum κόρα corruptela laborare, talia tamen, qualia sunt μέλαινα δέ οἱ (I. 53), ἐγὼ δέ οἱ (II. 72. 138), τηρεῖ δέ οἱ (II. 98), χέρεις δέ τοι (XX. 9, ubi legitur in nonnullis codicibus δέ τι), ὁ δέ τοι κ' ἔρος (XXIX. 12), me ad hanc opinionem deducunt, ut pronomen a librariis illatum existimem. Certe non veri dissimile est, eos memoria tenentes ejusmodi locos, ubi particula δέ cum dativo pronominis conjuncta erat, h. l. invitos peccasse. Quod praeterea in libris legitur δέ τι, non minus e scriptura δέ τοι quam ex altera δέ τε corrumpi potuit.

\*) Similiter judicavit etiam Welckerus Opusc. I. p. 195, quamquam reliqua, quae disputavit, a sententia mea discrepant.

\*\*) Jusjurandum aperte commemoratur a Servio ad ecl. V. 20:

quidem aut certe promissi cujusdam mentio fieret. Quibus causis ductus, jusjurandum illud ita in Theocriti fabulam transferendum esse puto, ut Daphnidem existimem in prima adolescentia se sancto quodam promisso Dianae cultui totum addixisse. Atque hanc deam magnopere a Daphnide cultam esse, et aperte dicit Diodorus eo loco, quem in adnotatione huic paginae subjecta excitavi: μυθολογοῦσι δὲ τὸν Δάφνιν μετὰ τῆς Ἀρτέμιδος κυνηγετεῖν, ὑπηρετοῦντα τῇ θεῷ κεχαρισμένως καὶ διὰ τῆς σύριγγος καὶ βουκολικῆς μελωδίας τέρπειν αὐτὴν διαφερόντως, et indicat ejus venationis studium, de quo cf. Serv. l. l. et Theocr. ep. II. III. Caelibatū igitur se acturum esse, Daphnis coram dea castitatis praeside sancte affirmaverat. Hoc ejus consilium Veneris animum laeserat gravissime ideoque pastori Nymphae amorem immiserat. Neque vero hanc poenam ita intelligendam esse arbitror, quasi dea ex cruciatu hubulci atque aegritudine magnam quandam voluptatem perceperit, sed hoc unum, opinor, egit, ut jamjam agnosceret Daphnis numinis sui potentiam supplicibusque precibus a sese pe-

---

„qui cum et venationis et musices peritissimus esset, adamatus a nympha est, qui etiam jurejurando adstrictus est, ne cum alia concumberet.“ His addi possunt, quae protulit ad eundem versum C. G. Mueller in programme, quod inscribitur: Commentaria Junilii Flagrii, T. Galli et Gaudentii in Virgilio septem priores eclogas, nunc primum ex codice Bernensi edita. Rudolphipoli 1847. „Daphnis pastor hic cum amaret Caedinam nympham et fidem ei dedisset, expertem se omnium feminarum praeter eam, juravit (pejoravit?) et in quandam nympham lapsus est, et ob hoc pejurium luminis orbatus est, carminis tamen meruit scientia et venerabilis inter pastores fuit pro carmine. Junilius dicit“. Haec statim subsequuntur: „Daphnis Mercurii et *Hersae* filius, in Sicilia pastor eximiae formae fuisse dicitur.“ Integra haec scholia attuli, quoniam continent quaedam, quibus nemo adhuc usus est. Quamquam ea ficta esse a grammatico, admodum verisimile puto. Pactum quoddam, non jusjurandum commemorat Aelian. V. H. X. 18: συνθήκας δὲ ἐποίησαντο, μηδεμιᾷ ἄλλῃ πλασιάσαι αὐτόν. Vide etiam quae ibi sequuntur. Neutrum legitur apud Diod. Sic. IV. 84 et Parth. Narr. Am. 29, sed dicit ille: λέγουσι δὲ αὐτοῦ μίαν τῶν Νυμφῶν ἐρασθεῖσαν προειπεῖν, ἐὰν ἄλλῃ τινὶ πλασιάσῃ, στερηθήσεσθαι τῆς ὀράσεως, hic in eandem sententiam: τούτου λέγουσιν Ἐχναΐδα νύμφην ἐρασθεῖσαν παρακελεύεσθαι αὐτῷ γυναῖκα μὴ πλησιάειν· μὴ πειδομένου γὰρ αὐτοῦ συμβήσεσθαι τὰς ὄψεις ἀποβαλεῖν. Jusjurandum jam a Timaeo omissum videtur, sed injuria.

teret, vellet mutuum amorem Nymphae injicere. Quare nihil mihi obstare videtur, quin id. I v. 96 id, quod omnes fere libri praebent, λάῳρα μὲν γελώσα pro vera scriptura haberi possit. Fac enim, Venerem id, quod voluerat et spectaverat, a bubulco factum iri non solum sperasse, sed etiam confisam fuisse, eamque praeterea pastoris miseria mitigatam et emollitam esse: apparebit clarissime, cur dici potuerit, eam *ridentem*, i. e. *laetam* accessisse. At quoniam nondum se superatum esse Daphnis aperte confessus erat, occultare debuit hoc reconciliati animi signum et paululum etiamtum reprimere. Itaque factum est, ut accedens ad eum fronte iram simularet. Etenim verbum ἀνέχειν significare h. l. *in altum attollere, prae se ferre*, mihi recte disputasse videntur Valckenarius in ed. et Doederlinus *Reden und Aufsätze* II. p. 161 sq., qui etiam in explicandis verbis antecedentibus plane mecum consentit. Commendat hanc interpretationem etiam Nonni quae videtur imitatio, cujus verba attulit Jacobsius, Dion. XXXIV. 302 sq. ὥς ἐτεὲν κοτέων πρόμος ἥπιος· ἀμφοτέρων γὰρ, εἶχε νόον γελόωντα, χόλον δ' ἀνέφηνε προσώπω.\*) Verum quod magna cum fiducia Venus exspectaverat, id non assecuta est. Daphnis sanctum illud promissum, quod dederat deae, in cujus tutelam se commiserat, usque ad vitae finem religiose servavit. Quamobrem v. 102 sq. recte praedicare potuit, sibi nondum omnium dierum solem occidisse, immo se etiam apud inferos Amori gravem dolorem paraturum esse. Est enim satis manifestum, bene cognitum habuisse pastorem, quod esset Veneris consilium; at quominus ei morem gereret, religione prohibitum esse. Nec vero haec sola causa fuit, sed maxime, quod Diana ipsa praesens adstabat. Hanc enim praesentem affuisse et tota fabula suadet et indicant ipsa poetae verba. Ex ea sententia, quam concepi de fabula Daphnidis Theocritea, apparebit, me de sensu versus 85

---

\*) Dubius adhuc hacreo, vox ἀδεῖα, quae legitur v. 95, utrum ex Buttmani sententia pro genere neutro accipienda et cum participio γελώσα jungenda sit an, ut voluit G. Hermannus, appositionis loco ad verbum ἦντε referri debeat. Ahrensii quidem sententia, qui eam cum verbis καὶ ἡ Κύπρις conjunxit, mihi propter articuli collocationem probanda non videtur.

G. Hermann adstipulari. Qua de causa aut recipiendum est ζατεῦσαι, quod conjecerat Hermannus et postea in uno codice Zieglerus invenerat, aut, quod magis etiam probandum videtur, e scriptura codicum k. (ζάτεια) et D. (ζατεια) versus ita refingendus est: ζάτει· πᾶ δύσερως τις ἄγαν καὶ ἀμήχανός ἐσαι; „quaere eam! qui fit, ut nimia cum miseria et inopia in amore veriseris?“ Adjectivum enim ἀμήχανος h. l. activo sensu *inopem* significat explicatque accuratius vocabulum δύσερως, quod in universum eum denotat, qui *infelicit* vel *misere amat*. Profiteor tamen, me non aegre laturum esse, si δύσερως h. l. is esse posset, qui *male*, *perversè amat*, quod significationis temperamentum adhaeret substantivo δυσβουλία. Hoc utut est, illud certe apparet dilucide, Priapum adhortari Daphnidem, id quod in dei lascivi indolem egregie convenit (cf. ep. III), *ne contabescat amore, sed investiget puellam fugientem eaque adeo per vim potiri studeat*. Ab hac sententia prorsus abhorrent versus sequentes (86—91). Namque in iis pastori opprobrio vertitur, quod, quum viderit puellas ridentes, amore contabescat et choreas cum iis ducere cupiat, satisque maligne cum caprario comparatur. Quocirca Doederlinum, quamquam in reliquis ab eo dissentio, tamen hoc recte disputasse puto l. l. p. 159\*), haec verba a Priapi oratione sejungenda esse. Jam quum desit v. 86 a cod. 6. m. pr., verisimile esse arbitror, eum a grammatico quodam in versus genuini locum substitutum esse et hujus sensum hunc fuisse: „Accessit etiam Diana graviter irata et haec dixit: Caprarius quando videt etc.“ Praeterea removendum est ephymnium, quod legitur post v. 88 et tres versus antecedentes (nam perditum quoque versus nunc rationem habeo) cum versibus 90—93 in septem versuum stropham jungendi. Cui respondebit alia strophæ, si, quod suadet idem cod. 6., ordinem versuum 84 et 85 permutaris et ejeceris etiam ephymnium, quod nunc legitur post

\*) Non latent me, quae contra Doederlinum dixit Ameisius Ann. 1845. 45. 2. p. 108 sq., sed quae disscruit vir praestantissimus, non sufficere videntur, praesertim si ea sententia probatur, quam ego verbis antegressis subjectam esse puto. Mira sunt quae de Priapi oratione nuper Hauler. l. l. p. 46 protulit.

v. 78. Ahrensium enim neque hoc recte egisse puto, quod ejecit versus 92 et 93, neque illud, quod omisit versus 77 et 87. Duos priores ut retineamus, mihi sententia prorsus flagitare videtur, sed offendit me vulgaris interpretatio verbi ἄνυσεν v. 93. Explicavit hoc Wuestemannus ita: „ἀνύσειν est perficere, ab uno fine ad alterum perferre“, Valckena-rius autem ed. I sic: „sed suum tolerabat amorem acerbum, atque in illo fortiter ferendo vitam ad finem usque transigebat“, reliqui, quantum scio, nihil certius de eo dixerunt. Mihi quidem maxima vis in imperfecto ponenda videtur, quod de conatu intelligo, significarique existimo h. l. ἀνύσειν *extinguere*, ita ut huc redeat sententia: „studebat pastor suum amorem extinguere vel comprimere.“ Conferri potest de hoc vocabuli significato Hom. Od. ω. 71: αὐτὰρ ἐπεὶ δὴ σε φλόξ ἤγνυσεν Ἥφαιστοιο. De altero loco, quem ejecit Ahrensius, ita disputabo, ut dicendi initium a versuum sententia faciam. Nimirum artificiose a poeta res ita instituta est, ut primum ii accederent, qui etiam tum benevolo animo erga pastorem erant. Ex his primo loco nominandus erat Mercurius, quippe qui princeps esset deorum agrestium (cf. Valcken. ad h. l. et Ameis. Ann. l. l. p. 108); hunc subsequi debebant pastores, quandoquidem hi aegritudinis causam ignorabant, quemadmodum etiam non satis de ea edoctus erat Mercurius; tertio denique loco Priapus commemorandus erat, quum, etsi cognitum habebat, cujus amore Daphnis contabesceret, tamen perversum ei consilium daturus esset. Quod autem poeta Priapi orationi hunc locum tribuit, ea re etiam id assecutus est, ut magis efferrentur Dianae verba, quippe illius prorsus opposita. Haec ipsa enim acerba comparatione usa pastorem reprehendit acerrime, quod castitatis officium plane deseruisse videretur. Cum ejus verbis quaedam, quae ad ipsum Daphnidem pertinent, ita in unam stropham conjuncta sunt, ut eam aptissime claudant. Denique accessit dea Venus. Cujus ira eo die adeo extincta erat, ut simularet tantummodo odium, animo jam erga Daphnidem benevolo esset eumque ab omni cruciatu liberatura fuisset, modo bubulcus, id quod impetrare volebat, se ab ipsa victum professus esset et, ut Nymphae

amorem sibi conciliaret, supplicibus precibus orasset. At noluit pastor Dianae cultum deserere; quum tamen pectoris aestum amplius perferre non posset, paratus ad mortem sibi consciscendam, omnibus, quae ei cara erant, valedixit Panemque ex Arcadia advocavit, cui fistulam suam traderet. Pastoris consilium quum Venus animadvertisset, ejus animum erigere voluit, sed sero: Daphnis sese in fluctus dejecit.

Summam orationis vim et gravitatem constare in eo, quod quae singuli loquuntur inter se prorsus opposita et contraria sunt, non est, quod multis verbis exponam. Quare converto me ad oppugnandam eam causam, quam Ahrensium permovisse video, ut Mercurii verba omitteret. Nempe, quae est viri doctissimi diligentia in usurpandis omnibus rei criticae subsidiis, ad firmandam suam sententiam adscivit quae exstant schol. ad v. 92: πρὸς τοὺτους, ἤγουν τοὺς νομεῖς καὶ τὸν Πρίαπον, οὐδὲν ἔλεξεν, ἀντὶ τοῦ οὐδὲν ἀπεκρίνατο ὁ βουκόλος. At accidit scholiastae h. l. idem, quod ei accidisse apparet ad id. IX. 33: ἥστινος ὥδῃς ο οἶκος ὅλος γένοιτο πλήρης! οὔτε γὰρ ὕπνος ἡμῖν γλυκερώτερος, οὔτε τὸ ἔαρ ἐξαίφνης ἔλθδὸν (τοσοῦτον) γλυκὺ, ὅσον ἡ μουσουργία. Nam quemadmodum illic Mercurii orationem non spectavit, ita hic neglexit verba οὔτε μελίσσαις ἄνῃσαι.\*)

---

\*) Item mihi vir doctissimus non recte usus esse videtur scholiastae verbis ad id. IX. 49 (v. 43 ed. Ahr.). Putavit enim, grammaticum pro infinitivo ἔχειν legisse participium ἔχων; at meo judicio falsus est. Nam si ipsa verba scholiastae (τίς τοσαῦτα ἔχων, ὅσα ἐγὼ ἔχω δηλονότι, ἀφελὶς ταῦτα προέλοιτο, ἤγουν προκρίνοι, οἰκεῖν θάλασσαν καὶ κύματα;) accuratius consideraveris, apparebit, opinor, clarissime, eum infinitivo οἰκεῖν alterum infinitivum ἔχειν explicasse. Verba autem quae antecedunt τίς τοσαῦτα ἔχων longe aliud quid atque Ahrensius voluit indicare videntur. Conferenda enim sunt cum glossa codicis L. Ἐνεκα τοσοῦτων. Praeterea reputandum est, scholiastam neque κα neque κεν legisse, quandoquidem solo optativo in interpretatione usus est. Nihil igitur magis perspicuum esse puto quam scripsisse poetam: τίς κῆκ τῶνδε θάλασσαν ἔχειν καὶ (id recte Ahrensius reposuit) κύματ' ἔλοιτο. Significant verba ἐκ τῶνδε: *in talia rerum condicione, pro tali rerum statu*, quod h. l. nihil aliud est nisi *taliam quum offerantur vel taliam quum habere possit*. Cf. Soph. Aj. 537. 823. Trach. 1109. Eur. Med. 459. Androm. 1184 quaeque et de hac formula et de similibus dixerunt Matth. §. 574.

Contra aliud scholion, quod exstat ad eundem id. I. versum, nonnihil eam sententiam fulcire videtur, quam de Dianae praesentia exposui. Nam leguntur ad v. 92 etiam haec: πρὸς τοὺτους δὲ, οὕστινας ἄνωθεν εἵπομεν, ἤτοι τοὺς βούτας, τοὺς ποιμένας καὶ τοὺς αἰπόλους, τὸν Πρίαπον καὶ τοὺς λοιποὺς, οὐδὲν ἐφθέγγετο ὁ βουκόλος, ἤτοι ὁ Δάφνης. Qui hic commemorantur οἱ λοιποί, eos a scholiasta Mercurium et Dianam intellectos esse puto, quamquam cuiquam credibile videri possit, verba ἤτοι τοὺς βούτας — αἰπόλους temere ab alio scholiasta interjecta esse.

Cum hoc fabulae argumento ea conspirant, quae legimus id. VII. 73 sqq. Neque enim video, cur id negaverit Haulerus l. l. p. 45. Xenea, quae ibi profertur, est illa ipsa Nympha, cujus amore Daphnis correptus erat. Variam lectionem Ξάνθα (vid. in h. l. Ahrens.), quam tradidit scholiasta, verisimile est a grammaticis ex Stesichori carmine huc translatam esse, videturque ille poeta hoc nomine regis filiam designasse. Vide quae de nominibus Calyca et Rhadina, quae in duobus carminibus similis argumenti a Stesichoro usurpata erant, bene exposuit Welcker. Op. l. l. p. 186 sqq.

Restant quaedam, quae ad solam stropharum compositionem pertinent. Ac primum quidem vere disputasse puto Hauptium Mus. Rhen. Nov. l. l. p. 265 sq., versus 118 et 119 post v. 128 collocandos esse; quo facto duae strophae quinorum versuum habentur. Probaverunt viri doctissimi sententiam G. Hermannus de art. poes. buc. p. 9 et Ahrensius in ed., et magnopere laetor, quod prior horum extremo vitae tempore eam sententiam abiecit, quam conceperat olim propter Verg. ecl. V. 40 sqq. De versibus

---

p. 1335. ed. III. Bernhardy. Synt. p. 230. Particula καί, modo retineatur versuum ordo vulgaris, quem mutasse Ahrensius video, eodem modo concludendae orationi inservit, quo factum est id. I. 60. XXI. 61. Exposuit elegantissime de hoc usu Fritzsche l. l. p. 54 eique assensus est Ameisius praef. p. VII. Optativum a poetis bucolicis sine particula positum esse, negaverunt Hermannus ad Mosch. p. 64. Ahrens. Phil. l. l. p. 425 sq., sed mea quidem sententia calidius egerunt. Quod si solus optativus nullo modo ferri potest, scribendum est κ' ἐκ τῶνδε.



105—111 difficillimum est certius quiddam statuere. Si tamen ex diversis hominum doctorum opinionibus unam eligere licet, profiteor, id mihi maxime probandum videri, quod existimavit de hoc loco Hermannus. Arbitratus est vir egregius ibidem, ante v. 110 duos vss. excidisse, quorum argumentum ex Odyssea sumptum fuisset; Daphnidem enim in iis Venerem admonuisse retis, in quo Marti concubantem Vulcanus risui deorum exposuisset. Quod si verum est, duas alias strophas quaternorum versuum habemus. Quod idem putavit, versus 64 et 65 inverso ordine ponendos esse, ut Thyrsis, antequam carmen suum caneret, hoc fuerit praefatus: Θύρσις ὅδ' ὧς Αἴτνας καὶ Θύρσιδος ἄδ' ἃ φωνά, ita invertendum opinor, ut ephymnium delendum, nihilominus tamen versum 65 pro praefatione totius cantilenae habendum esse censeam. Si denique ex ejusdem sententia versus 66—69 proodum, versus 136—139 epodum carminis constituere volumus, stropharum rationem numeris ita describere licet:

IV. | . II. II. VII. VII. | IV. IV. IV. IV. | IV. IV. V. V. | IV.  
Neque enim repugno, quominus tres carminis partes fuisse putentur, dum ne existimes, eas diversis ephymniis inter se disjunctas fuisse. Ahrensii sententia, quam in editione proposuit, mihi maxime propterea improbanda videtur, quod vss. 113—116 (in ejus ed. 103—106) secundae parti adscripsit.

Quae disputata sunt a me de Daphnidis fabula Theocritea, fulciri confirmarique videntur duabus Vergilii eclogis, *decima* et *octava*. Ansam eclogae decimae componendae Vergilio dedit Lycoridis perfidia. Haec crudeliter deseruerat amicum poetae Cornelium Gallum; nam quum ipse duce Octaviano ad classes Pompejanas a litoribus Italiae arcendas in armis esset, aliquem militem ex eo exercitu secuta erat, quem Agrippa in Galliam ducebat. Dolore oppressus Gallus amicum oraverat, ut aegritudini suae carmine pastoritio subveniret. Hoc unum colligere licet e v. 3: „Carmina sunt dicenda: neget quis carmina Gallo?“ minime, quod Vossius Martyni iudicio obsecutus statuit, Gallum aliquando a Vergilio petisse, ut idyllium primum Theocriti imitando exprimeret. Nam hoc ut in parte prima

adumbraret, adductus est poeta similitudine, quam inter Galli et Daphnidis sortem intercedere videbat, idque eo magis, quod quosdam idyllii locos priore tempore nondum imitatus erat.

De singulis eclogae verbis, quum quae ad imitationem pertinent jam supra ex parte tractaverim et uberius tractaturus sim alio tempore, hic ea tantum persequar, quae spectant ad propositum. In disceptationem vocandi sunt inprimis versus 9—30, in quibus adumbravit poeta quae exstant apud Theocritum vss. 65—91. Atque expressit v. 9—12 versus Theocriti 66—69 ita, ut mutaret, quae propter scenam in Arcadium translatam invertenda erant. V. 13—15 ante oculos habuit versus 71 et 72, ut e vocabulorum repetitione apparet; sed quum sententiam horum versuum jam adumbrasset ecl. V. 27 sq. et videret etiam, quae de Daphnide narrantur, apte non posse ad Gallum transferri, magis se accommodavit ad id. VII. 74, eoque simul hoc lucratus est, ut montes Arcadiae, Maenalum et Lycaeam, commemorare posset. Licet autem ex hac imitatione id concludere, Vergilium quoque existimasse, eandem Daphnidis fabulam in primo et in septimo idyllio intelligendam esse. Versus Theocriti 74 et 75 adumbravit v. 16—18, de suo et ex aliis Theocriti ejusque assectatorum locis addens, quibus excusaret, cur Gallum opilionem finxisset. Paululum immutavit Theocritea in versibus sequentibus. Nam ab auctore deflectens primos accedere finxit pastores, opiliones, subulcos (propter sues Arcadum) et semet ipsum ut bubulcum. Menalcae nomine poetam semet significasse, mihi persuasum est propterea, quod alioquin nomine proprio prorsus abstinuisset. Quare etiam hac de causa rectissime Wagnerus v. 19 scripturam *subulci* retinuisse videtur. Nam ibi si vocem *bubulci* reponimus, poeta *subulci* speciem assumpsit, quod omnem probabilitatem excedit. In iis, quae v. 21 pastores loquentes fecit, spectavit et Mercurii orationem (v. 78) et pastorum (v. 81). Hoc manifestum est ex versus forma et ratione rythmica (*Omnes, unde amor iste, rogant, tibi? Venit Apollo coll. πάντες ἀνθρώπων, τί πάδοι κακόν ἦνδ' ὁ Πρίηπος*), illud e sententia verborum: *unde amor iste?* coll. τίς το κατὰ τρύχει;

τίνος, ὧγαδῆς, τόσσον ἐράσσαι; Hinc satis elucet, legisse Vergilium in suo codice orationem Mercurii. Quod vero ordinem versuum mutavit, id eo consilio fecisse putandus est, ut deos conjunctim induceret. Non aliter quae a Theocrito in idyllio quinto diversis locis (vss. 84—99. 104—107. 132—135) de amoribus dicuntur, in ecloga tertia (vss. 64—83) juxta collocavit, nisi quod paucis verbis ad eos rediit v. 101 et 107. Ex diis primum accedere finxit Apollinem v. 22 sq.: „Venit Apollo: | Galle, quid insanis? inquit; tua cura Lycoris | Perque nives alium perque horrida saxa secuta est.“ Ex hac imitatione haec duo lucramur. Primum etiam Vergilius putasse videtur, Mercurium apud Theocritum principem locum tenuisse propterea, quod dignitate princeps esset inter deos agrestes. Id nisi existimasset, pro eo non posuisset Apollinem, qui cognomine Nomius praecipuo honore colebatur ab Arcadibus. Cf. Cic. de nat. deor. III. 23. 57 ibique Schoemann. Deinde vero ex loco Vergiliano magnus quidam fructus redundat ad explicandos versus Theocriti 82 et 83. κῆφα· Δάφνι τάλαν, τί τὸ τάχιστα; ἃ δέ τε χώρα | πάσας ἀνὰ κράνας, πάντ' ἄλσεα ποσσὶ φορεῖται. Intelligitur enim, verba Apollinis non e Mercurii, sed e Priapi oratione deprompta esse. Jam utriusque poetae verba si inter ipsa compareris, verissima videbitur G. Hermannii sententia, etiam poetam Romanum hoc arbitratum esse, fugisse Nympham Daphnidem, non quaesivisse. Versum Theocriti 85 Maro usurpare non poterat, quandoquidem tale consilium, quale h. l. Priapus Daphnidi dedit, amico dare nullo modo licebat. Pro Priapo Vergilius v. 24 sq. deum Romanorum, Silvanum, nominavit. Quod vero huic coronam e ferulis et liliis factam tribuit, spectasse videtur similem Priapi ornatum Theocr. ep. III. 3 sq. Verba Silvanus nulla facit, contra consolari studet Gallum qui ultimo loco advenit Arcadum deus Pan v. 26—30. Quamquam ejus orationi nihil cum Dianae verbis commune est\*), tamen ex eo, quod hic post Apollinem et Silvanum

\*) Memorabilis est v. 28 scriptura *Et quis*, quam cum aliis codicibus exhibet liber optimus Romanus (cf. Wagner. Vol. V. praef. p. XXXIX). Huic auctoritatis aliquid accedit e Theocr. v. 77 εἴπε δὲ. v. 82 κῆφα. v. 97 κείπε. Nam in levissimis quoque rebus Ver-

tertius accedit, colligi posse arbitror, revera in codice carminum Theocriti, quo usus est Vergilius, post Mercurium et Priapum Dianam commemoratam esse ejusque verba a verbis Priapi sejuncta fuisse. Nam quae Venus dicit apud Theocritum, eorum Vergilius nullam rationem habuit ideoque statim post Panis orationem Gallum pastores Arcades alloqui finxit. Quocirca ne id quidem dicere licet, non legisse poetam Romanum versus 92 sq.

Haec hactenus de ecloga decima. Ad explicandam ultimam partem carminis, quod Thyrsis Theocriti cecinit, utilissima est pars prior *eclogae octavae*. Hoc carmen, si discesseris a paucis versibus, magna arte elaboratum insignique suavitate conditum est. Atque debuit profecto poeta in pangenda ecloga omni diligentia elaborare, quandoquidem, ut apparet ex vss. 11 sq. (Accipe jussis carmina coepta tuis), ad eam componendam a Pollione, excelsi ingenii viro, excitatus erat. Nam si quaerimus, quomodo intelligendus sit numerus pluralis *carmina*, is neque cum Wagnero et Ladewigo ad omnes eclogas neque cum Vossio tantummodo ad posteriorem cantum referri potest. Wagnerus in editione minore hanc explicationem protulit: „carmen hoc, quod est ex eo genere, sc. bucolico, ad quod temptandum tu me excitasti.“ Kochius vero, praeceptor meus carissimus, relegavit lectorem ad ecl. III. 7, ad quem versum in utriusque editione plures loci laudati sunt, in quibus numerus pluralis nominum eum significat, qui est e numero vel in condicione eorum, qui eo nomine vocantur. At est haec explicatio ejusmodi, quae, cum in quosdam locos egregie conveniat, tamen ab hoc loco prorsus removenda sit.\*) Contra Vossius putavit, Pollionem a Vergilio petisse, ut Pharmaceutrias Theocriti carmine aliquo adumbraret, poetam autem et fautoris precibus satisfacisse et carmini ab illo efflagitato ipsum aliud opposuisse. Id si fecisset Pollio, mirandum profecto esset, quod non apertius et

gilius in hac quidem ecloga se ad auctoris exemplum composuit. Cf. v. 13 sqq. cum Theocr. v. 71 sq., v. 21 cum v. 81, v. 23 cum v. 83. Hinc defendi etiam potest genitivus *Πόδα* v. 67, quam Ahrensius (in ejus ed. est v. 66) in accusativum mutare voluit. Cf. Vergilii verba v. 11.

\*) De ecl. III. v. 7 vide quae disputavit Ameis. Spic. p. 5.

clarius hoc poeta indicasset quam verbis ambiguis „accipe carmina tuis jussis coepta“. Neque commendari existimo Vossii opinionem versibus 62 et 63. Ex his enim nihil conicere licet nisi hoc unum, Vergilium propterea hoc carmen a Musis recitari voluisse, quod illud doctius haberet quam Damonis cantum, non, ut Vossius statuit, quod Pollioni blandiri et insinuare cuperet, cujus hortatu ad componendum carmen aggressus esset. Ac poterat sane poeta praestantiorē judicare posteriorem cantilenam. Nam si quae in ecloga reprehensione digna videntur, ea non inveniuntur nisi in priore cantico\*). At delatus est vir doctissimus in miram hanc opinionem inscriptione eclogae „Pharmaceutria“. Falsum vero hunc titulum esse, non solum hoc ostendit, quod longe alius titulus (Damonis et Alphesiboei Certatio) in codice Mediceo legitur, verum etiam illud, quod reliquarum quoque eclogarum alii libri aliam inscriptionem habent, ita ut, quinam genuini tituli sint, prorsus nesciri fatendum sit. Accedit, quod is titulus eo demum tempore eclogae inscriptus esse videtur, quo apud Theocritum pro vera inscriptione *Φαρμακεύτρια* (cf. Meinek. p. 162 et Ahrens. in ed.) altera *Φαρμακεύτρια* in codices irrepserat. Id jam Vergilii aetate factum esse, non verisimile puto; factum erat tempore Servii, in cujus adnotatione ad eclogae versum 1 legitur *Φαρμακεύτρια*. Quare suspicari possis, vel ab ipso Servio vel ab iis, quibus usus est auctoribus, etiam Vergilii eclogae titulum „Pharmaceutria“ inscriptum esse\*\*). Praeterea perversam esse puto Vergilique ingenio plane

---

\*) Reputari tamen velim, Vergilium praeter id. X. 24 sq. ante oculos habuisse etiam id. XXII, 115 sqq., ubi poeta in media narratione Musam orat, ut sibi, quomodo vicerit Pollux Amycum, dicere velit. Nec tamen contendere licet, Theocritum posteriorem narrationis partem doctiorem habuisse quam priorem. Accedit, quod, si nimium in modum premimus versuum sententiam, parum intelligitur, qui fieri potuerit, ut poeta vss. 1—5 eandem praestantiae laudem utrique carmini tribueret.

\*\*) *Pharmaceutria* a Servio secundum Theocriti idyllium vocatur etiam in scholio supra (p. 57) laudato ad ecl. VIII. (non III) 21. Grammaticus, qui prioris cantilenae versum intercalarem ex secundo idyllio expressum esse putaret, quid mirum, si eo etiam delapsus est, ut totam eclogam Pharmaceutriam vocandam esse existimaret?

indignam Heynii sententiam, qui in arg. contendit, duo eclogae carmina per se constare neque ullo vinculo connexa esse. Hoc iudicium inde natum esse apparet, quod existimavit vir doctus — amplexati autem sunt hanc sententiam omnes reliqui Vergilii interpretes —, Damonis cantum ex idyllio tertio expressum esse. Id vero merum commentum esse, sibi persuasuros credo, quicumque consideraverint, quantopere caprarum verba a cantu pastoris Vergiliani discrepent atque differant. Nam pauci quidam versus, qui ex illo carmine adumbrati sunt, nihil probare possunt, ubi de universo colore carminum quaeritur. Atque usus est poeta in eadem eclogae parte etiam aliorum idylliorum et verbis et sententiis\*). Verum dicam plane, quod sentio. Equidem ea opinione imbutus sum, ut Vergilium existimen excitatum esse a Pollione, ut duo prima Theocriti idyllia uno carmine conjungeret. Huic sententiae haud mediocris commendatio vel ex eo paratur, quod, ut supra (p. 57 sq.) disserui, poeta in versibus intercalaribus se ad primum maxime idyllium accommodavit. Accedit aliud quiddam, quod hac in causa maximi momenti habendum est. Nempe exemplo Thyrsidis Theocritei apud Vergilium Damon et Alphesiboeus non suas res, sed aliorum describunt. Denique totius cantus sententia ita comparata est, ut cum ea fabulae Daphnidis interpretatione, quam ego supra proposui, mirifice congruat. Pastor enim, cujus partes agit Damon, quum cognovisset, Nisam se aspernatam esse atque eo ipso die alteri nupturam, de rebus suis desperans, vitae vim afferre constituit. Continet autem ejus oratio gravem et acerbam de perfidia puellae et de crudelitate Amoris conquestionem, et in extremis versibus pastor, postquam silvis valedixit, se jam in undas sese dejecturum esse claris verbis indicat. Cur poeta non omnes idyllii versus, de quibus agitur, imitari potuerit, ex opposito Alphesiboei carmine intellectum iri existimo. Cujus cantus etsi talis est, in quo idyllii secundi vestigia ubique reperias, tamen finem prorsus diversum habet. Nimirum

---

\*) Ceterum conferas quae de argumento idyllii III. eleganter exposuit Ameisius Adn. p. 27.

quum a poeta Siculo res ita tractata esset, ut Simaetha peracto sacrificio magico, cujus non erat faustus exitus, Lunae amoris sui originem et progressum narraret eoque narrato aliis artibus juvenem Delphidem tentare constitueret, et his si nihil profecisset, adeo interfecturam sese juvenem minaretur, quum denique, ut tranquillus esset carminis exitus, egregio quodam artificio poeta virginem profitentem fecisset, sese tranquillo placidoque animo amorem perlaturam esse: a Vergilio eam puellam descriptam et ante oculos nostros positam esse videmus, quae, quum nihil intentatum reliquisset, quo amorem Daphnidis recuperaret, etiam artium suarum prosperum eventum esse cognosceret. Hoc carminis argumentum si cum sententia prioris cantilenae contenderimus, haud cunctanter, opinor, concedemus, ita Vergilium quod mandaverat Pollio sese optime assecuturum esse putasse si *cum tristi infelicis ac desperati amoris exitu felicem exitum amoris omnia moventis* composuisset. Quod consilium quum cepisset poeta, ei in pangendo priore cantu aliquantum a Theocriti auctoritate deflectendum erat. Praecipue omnia omittenda erant, quae ad peculiarem Daphnidis fabulam pertinerent, et juvenis statim ab initio loquens inducendus. Ita factum esse puto, ut poeta, quamquam, quatenus fieri poterat, totum Thyrsidis cantum ante oculos habebat, tamen extremos tantum versus imitando exprimeret. Imitatus autem est vss. 52—58:

Nunc et ovis ultro fugiat lupus, aurea durae  
Mala ferant quercus, narcisso floreat alnus,  
Pinguia corticibus sudent electra myricae,  
Certent et cyenae ululae, sit Tityrus Orpheus,  
Orpheus in silvis, inter delphinas Arion.  
(Incipe Menalios mecum, mea tibia, versus.)  
Omnia vel medium fiant mare.

Cum his comparentur id. I. Theocritei vss. 130—134:

Νῦν δ' ἴα μὲν φορέοιτε βᾶτοι, φορέοιτε δ' ἄκανῶσαι,  
ἃ δὲ καλὰ νάρκισσος ἐπ' ἀρκεῦσιν κομᾶσαι.  
πάντα δ' ἑναλλα γένοιτο, καὶ ἃ πίτυς ὄχνας ἐνεῖται,  
Δάφνης ἐπεὶ ἡνάσκει, καὶ τῶς κύνας ὦλαφος ἔλκοι,  
κῆξ ὁρέων τοὶ σκῶπες ἀηδόσι γαρύσαιντο.

Ex hac imitatione satis manifestum est, incaute egisse Doederlinum, quod l. l. p. 163 sq. Theocriti versus post

v. 140 collocandos esse statuit. Vulgarem versuum ordinem in suo codice invenerat Vergilius, et gaudeo, me ad ea argumenta, quae protulit contra Doederlinum Ameisius l. l. p. 109 sq., hoc novum adjicere posse, quod mihi non levissimum esse videtur.

Iis verbis, quae sequuntur v. 58 „Vivite silvae“, breviter, sed magna cum vi poeta Romanus id significavit, quod uberius descriptum est a poeta Siculo vss. 112—116:

ὦ λύκοι, ὦ θῶες, ὦ ἄν' ὄρεα φωλάδες ἄρκτοι,  
χαίρετ'· ὁ βωκόλος ὑμῖν ἐγὼ Δάφνης οὐκέτ' ἄν' ὕλαν,  
οὐκέτ' ἄνὰ δρυμῶς, οὐκ ἄλσεα. χαῖρ', Ἀρέθοισα  
καὶ ποταμοί, τοὶ χεῖτε καλὸν κατὰ Θύμβριδος ὕδωρ.

Causam hujus rei a Vossio perspectam esse existimo, cujus verba ita adscribam, ut, quae sententiam meam magis etiam explanare credam, ipse interjiciam: „*Noch ein (kurzes und rasches) Lebewohl den hervorragenden Waldhöhen, und er springt von der jähnen Klippe in die Fluthen herab.*“ Reputantibus enim nobis, apte pastoris desperantis conditionem ita describi, ut, ne diutius a proposito retineatur, non omnia, quae ei cara sint, singillatim enumeret, sed una silvarum commemoratione, quippe quam memoria reliquarum rerum ad vitam pastoritiam pertinentium ultro sequatur, totam rem absolvat: hoc, inquam, reputantibus non ita necessario „rei ratio flagitare“ videbitur, ut Hermannno (ad. Bion. p. 47 sq.) adstipulantes versum hic excidisse credamus. Addendum est aliud, ad quod Hermannus quique eum in lacuna designanda secutus est Ladewigus attendere debuerunt diligentius. Nimirum si revera Vergilius rem accuratius describere voluisset, ei depingendae sine dubio integram stropham dedicasset. Fecit id Theocritus, cujus versibus Hermannus pro argumento usus est. Postremo etiam hoc considerari velim, poetam consulto in sententiarum ordine a poetae Syracusani exemplo discessisse. Nam apud Theocritum Daphnis, antequam optat, ut rerum natura immutetur, valedicit feris et saltibus et fluminibus. Hunc ordinem non mutasset ejus aemulus, si pluribus verbis uti voluisset. Nunc vero paucissimis usus aptissime rem in finem rejecit.



Quominus Vergilius ea verba imitaretur, in quibus Daphnis Pani fistulam suam munus offert, impeditus est pastoris persona. Nam commemorat quidem is, cujus partes agit Alpheisiboeus, extremum quoddam munus, sed, quoniam mortem suam significat, illud magna cum acerbitate perfidae puellae offert. Legitur hoc vss. 59 sq.

Praeceptis aerii specula de montis in undas  
Deferar; extremum hoc munus morientis habeto.

In his versibus infelix pastor, quid jamjam facturus sit, non aliter indicat atque significaverat Daphnis apud Theocritum v. 128: ἡ γὰρ ἐγὼν ὑπ' ἔρωτος ἐς Ἀἶδοι (sic recte Ahr., apud quem est v. 115) ἔλκομαι ἤδη et v. 133: Δάφνις ἐπεὶ θνάσκει. Mortis genus ipsa Daphnidis oratione accuratius describere Theocritus non necesse habuit propterea, quod illud a Thyrside commemorari volebat in fine cantilenae vss. 138 sq. Id fieri debebat a Vergilii pastore, apud quem a principio usque ad finem carminis hic omnia loquitur. Hac autem mutatione poeta Romanus una id assecutus est, ut in rem suam converteret praeter id. XXIII. 20 sq. (δῶρά τοι ἦνδον λοίσθια ταῦτα φέρων, τὸν ἐμὸν βρόχον) etiam id. III. 25 (τὰν βαίταν ἀποδὺς ἐς κύματα τῆνῳ ἀλεῦμαι).

His ita expositis, intelligetur etiam, cur Vergilius in opposito Alpheisiboei carmine integrum idyllium secundum adumbrare non potuerit. Etenim, quo pastorum cantilenae revera inter se oppositae essent, non solum id curavit, quod jam supra commemoravi, ut puellae sacrificium faustum eventum haberet, sed elaboravit etiam in eo, ut illa magis suspicaretur de Daphnidis perfidia quam eam compertam haberet. Ad hoc si adjeceris, a secundae partis idyllii imitatione vel propterea poetae abstinendum fuisse, quod alioquin utriusque cantilenae versus intercalares inter se non congruissent, non erit amplius, quod miremur, Vergilium ex illa parte nihil praeter paucos versus (95 sq. coll. Theocr. vss. 161 sq.) ante oculos habuisse ideoque sub finem eclogae (v. 101 sq.) dissimillimi carminis versus (XXIV. 92 sqq. \*) adumbrare non dubitasse.

---

\*) Imitationem h. l. non agnovisse videtur Ahrensius (est apud eum id. XIX. 93 sqq.), sicut eam non agnovit v. 85 sq. (v. 86 sq.)

De *ecloga quinta*, in qua Vergilius, si omnino Daphnidis fabulam spectavit, alteram secutus est, quam Stesichorus primus tractasse videtur, alio loco sententiam meam in medium proferam. Potuisse Vergilium eam accurate cognitam habere, jure aliquis conjecerit, qui poetam et amicum Cornelii Galli et discipulum Parthenii fuisse reputaverit. Interim cf. Parth. Narr. am. praef. et narr. 29, Meinek. An. Al. p. 257 sq., Jan. ad Macrob. Saturn. V. 17. 18. p. 454, Adert. Théocr. 45 sq.

Appendicis loco quasdam conjecturas proponam, quibus aliquot poetarum bucolicorum locis subveniri posse arbitror. Horum primus est Theocr. id. XXI. v. 48 (Inc. III. Ahrens.):

Τὸν κάλαμον δ' ὑπὸ τῷ κινήματος ἀγκύλον εἶχον  
τῷ χέρει τεινόμενον περικλώμενον εὐρὺν ἀγῶνα.

Sic fere in libris hic versus legitur. Bene Ahrensius majore discrimine eum a versu sequenti sejunxit. Reliqua omnia mihi sana fore videntur, si eum ita scriptum cum versu antecedenti conjunxerimus: τὸν κάλαμον — εἶχον, τῷ χέρει τεινόμενος, περικλώμενος, εὐρὺν ἀγῶνα, i. e. „*arundinem autem a motu inflexam tenui, extensis manibus, incurvatus, late patens certamen*.“ Utrumque participium passivi generis est et accusativus εὐρὺν ἀγῶνα toti enunciato appositionis loco additus, de quo usu cf. Bion. II. 10 sq. „ἄρπασε τὰν Ἑλέναν ποδ' ὁ βωκόλος, ἄγε δ' ἐς Ἴδαν, Οἰνῶνα κακὸν ἄλγος“ et Matth. § 410 p. 916 ed. III.

coll. Verg. ecl. V. 60 sq. et loco p. 92 laudato XXIII. 20 sq. (ap. Ahr. Inc. id. V. 20 sq.). Hoc quam recte fecerit, alio tempore exponam. Praeterea mirum mihi accidit, quod vir doctissimus Calpurnii et Nemesiani prorsus immemor fuit. Hi enim non solum Vergilium ceterosque poetas Romanos, sed etiam Theocritum interdum ante oculos habuerunt. Ut pauca proferam, quae memoria teneo, aperte Calpurnius adumbravit Theocr. III. 9, qui versus ab Ahrensis ejectus est, ecl. III. 86 sqq., id. XI. 36 sq. (34 sq. Ahr.) ecl. II. 70, id. VIII. 82 (85 Ahr.) ecl. IV. 149 sqq. Nemesianus autem. id. VIII. 4 spectavit ecl. IV. 2. Alias horum poetarum imitationes, quas commemorare a consilio Ahrensii alienum fuisse videtur, silentio praeterire praestat. Fortasse enim aliquando copiosius disputabo, quid hi duo poetae et a Vergilio et a Theocrito mutuati sint. Neminem vero post doctam Hauptii dissertationem me reprehensurum puto, quod rursus Nemesiani eclogas a carminibus Calpurnii sejunxerim.

Alter locus est ibid. v. 64: ἴσαι δὲ ψεύδεσιν ὄψεις. Haec verba ita nunc ab Ahrensio exarata sunt: ἴσα δ' ἦν ψεύδεσιν ὄψεις. At quum omnes libri praepositionem ἐν praebeant et praeter unum K, qui numerum singularem ὄψις habet, omnes reliqui, ut videtur, etiam pluralem ὄψεις, locus fortasse ita scribendus est: ἴσας (vel ἴσας δ'), ἐν ψεύδεσιν ὄψεις, i. e. „ut (autem) scis, in mendaciis ducenda sunt visa.“ De forma ἴσας cf. id. XIV. 34. Ahr. de dial. Dor. p. 345. Collocatio defenditur formulis similibus, quae eodem modo orationi antepositae sunt. Cf. id. XVII. 136: δοκέω δ', ἔπος οὐκ ἀπόβλητον φθιγγέσθαι ἐσομένοις ibique Wuestem. et add. etiam δοκῶ μὲν Soph. Oed. Col. 997, ubi vid. Wunder. El. 61 ibique Schneidewin., qui excitavit v. 547, Alead. fr. 8., Eur. Suppl. 794 ibique Hermann.; δοκεῖτε Thuc. IV. 61. 2; δοκεῖ δέ μοι Thuc. I. 3. 1; ὁρᾶς et ὁρᾶτε, de quibus vid. Frotscher. ad Xen. Hier. I. 16. Non prorsus in Theocriti locum quadrant ὅτοιμα Ap. Rhod. III. 479. οἷδ' ἐγώ Soph. Oed. Col. 1197, quoniam utroque loco haec verba protasi et apodosi interjecta sunt. Quaedam exempla commemoraverunt etiam Matth. § 630. 2. g. p. 1521 ed. III. Krueger § 55. 4. n. 8. Ex eodem usu explicanda est scriptura a parte librorum oblata Eur. Med. 287: κλύω δ', ἀπειλεῖς, quam in scholis defendere memini virum dilectissimum Klotzium. Cf. tamen de eodem loco Kirchhoff. p. 95. Denique verba ἐν ψεύδεσιν ὄψεις interpretanda videntur ex locutione proverbiali, cui simile est, quod nostrates dicunt: „Träume sind Schäume.“

Nonnunquam in fine potissimum et in principio veruum vetustate aliquid in codicibus absorptum est. Illud factum puto id. XXIII. 2 (Inc. V. v. 2 Ahr.):

τὰν μορφὰν ἀγαπῶ, τὸν δὲ τρόπον οὐκέτι' ὁμοίω.

Ad duas conjecturas, quas de verbis extremis prolatas video, addo tertiam fortasse leniorem. Scribendum mihi videtur οὐκέτι' ὁμοίως „non item pari modo,“ quibus verbis cogitatione addas ἀγαπῶ. Cf. Dem. Ol. III. 18: εὐξασθαι μὲν, ὃ ἄνδρες Ἀθηναῖοι, ῥάδιον, εἰς ταὐτὸ πάντι', ὅσα βούλεται τις, ἀπρὸς αὐτὰ ἐν ὀλίγῳ· εἰσέσθαι δέ, ὅταν περὶ πραγμάτων προτεσθῇ σκοπεῖν, οὐκέτι' ὁμοίως εὐπορον. Prorsus si-

milis est hic locus, nisi quod in altero membro non rependendum est antecedens adjectivum, sed positum aliud ejusdem significationis.

Alterum accidisse opinor Mosch. I. 10 (II. 10 Ahr.)

ὥς μέλι φωνά,

ἐν δὲ χολὰ νόος ἐστὶν ἀνάμερος.

In verbis distinguendis assentior Ahrensio, neque tamen mihi ea antiquae interpolationi deberi videntur; nam explicant fortius quae antecedunt. At magnopere offendit me, quod v. 9 voci μέλι addita est particula ὥς, nihil additum est v. 10 vocabulo χολά. Non recte hoc se habere, sensit jam scriba codicis 11, qui correxit ὥς δὲ χολά. Neque tamen opus est hac particula, si scribitur πᾶν δὲ χολά; etenim pronomēn πᾶν et vices illius sustinet et fortio-rem reddit orationem. Fortius aliquid requiri, putavit etiam Hermannus, sed falso loco. Est autem πᾶν χολά *merum fel*, de quo pronominis usu cf. Theocr. id. III. 18 (21 Ahr.) τὸ πᾶν λίπος. id. XV. 20 ἅπαν ῥύπον. v. 148 χώνηρ ὄξος ἅπαν. Soph. Phil. 622 ἡ κείνος, ἡ πᾶσα βλάβη. v. 927 ὦ πῦρ σὺ καὶ πᾶν δεῖμα. El. 301 ὁ πάντ' ἄναλκῆς οὗτος, ἡ πᾶσα βλάβη. Herod. I. 32 πᾶν ἐστὶ ἀνδρῶπος συμφορῇ. Apparet ex laudatis exemplis, in hoc dicendi genere pronomēn πᾶς et attributi loco substantivis adjungi et genere neutro vel addito vel omissio articulo adverbialiter poni. Id significasse videtur Ameisius Adn. p. 41 n., disputans ibi contra Wunderum in Soph. Phil. v. 614.

## Corrigenda et Addenda\*).

Pag. 8 lin. 6 corr. *accommodatus*. — p. 10 lin. 7 corr. *proposito*. — p. 15 not. \*\*) lin. 1 sq. corr. *antegressis*. — p. 25 lin. 35 corr. *Ex*. — p. 26 lin. 16 corr. *prooem*. lin. 17 sqq. aliud ellipsis exemplum reperitur ecl. VII. v. 29 sq., explicandum illud ex epigrammatum usu, quem spectavit h. l. poeta. — p. 27 lin. 22 sqq. add. ecl. IX. 24, ubi *et* ad efficiendam orationis alacritatem ita est repetitum, ut *xat* Theocr. id. III. 4 coll. ecl. III. 65 et Wagner. Quaest. XXXV. 7. h. Minantis est *et* ecl. II. 44. coll. Theocr. id. III. 36. Wagner. l. l. 7. c.; magna cum gravitate in enunciati principio positum ecl. III. 56 coll. Theocr. id. I. 141. Wagner. 7. h. *Atque* eodem modo cum vi quadam prolatum est ecl. VII. 7, quo *xat* id. VII. 11. Cf. intt. utriusque poetae et Wagner. l. l. 22. — p. 29 lin. 24 add. id. XXIV. 7 et 8; recte tamen dixisse videor, in carminibus bucolicis hunc usum praeter ll. ll. non inveniri. — p. 32 lin. 5 cum ecl. VI. 80 conferri quodammodo potest id. I. 26, quem v. spectans Vergilius ecl. III. 30 alio genere repetitionis usus est. lin. 17 del. *ab*. — p. 33 lin. 15 cum. ecl. VIII. 83 conferas ecl. X. 3; nam utroque loco non aliter atque Theocr. id. VI. 5 quod positum erat in primo pede vocabulum, in quinto repetitum est, neglecta tamen caesura bucolica. not. lin. 18 corr. *exspectes*. — p. 35 lin. paenult. corr. *vss. 7 et 8*. — p. 37 lin. 24 corr. *Vergil*. — p. 40 lin. ult. corr. *Ahrensius*. — p. 41 not. lin. 6 sq. corr. *videtur*. — p. 45 lin. 8 corr. *Wordsworthius*. — p. 54 lin. 6 sqq. add. ecl. V. 46 sq. iis locis, de quibus dixi p. 27 sq. lin. 23 corr. *occupasset*. — p. 55 lin. lin. 1 corr. *stropharum*. — p. 57 lin. 6 corr. *VIII*. — p. 61 lin. 4 corr. *perspicio*. lin. 27. corr. 35. — p. 62 lin. 9 corr. *Graecis*. lin. 29 add. ecl. II. 24; conferendus est qui h. l. reperitur hiatus cum iis duobus, de quibus dixi in adnotatione (ecl. VII. 53. X. 12), quamquam, ut dixi p. 13, totus mihi versus e Graeco translatus videtur. — p. 63 lin. 5 corr. *pastores*. — p. 65 lin. 16 corr. *eximia*. — p. 72 lin. 24 corr. *caprarium*. — p. 79 lin. 18 corr. *attulit*. — p. 82 not. lin. 15 corr. *in tali*. — 85 lin. 36 corr. *rhythmica*. — p. 94 lin. 15 corr. *ὁρᾶς*.

\*) Leviora quaedam librarii peccata lector benevolus facile ipse corriget.

